

## XTIIDZ DIOS MINE PQUIAA

### LUC

---

**1** ¡Diuzh Tiofl!

Nanle luu ganle, nole bla zha ne bioxco pquiaa zho grë ncuaañe goc zeene baaad Jesús men ne pxeel Dios ga. <sup>2</sup>Ncuaañe nlipaa goca, grë ncuaañe pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bzëniepaa mew, zha ne pso me noneew lo miech.

<sup>3</sup>Yeque naa pquiaa naa wen wen bnabdiidz naa, bleeni naa diidz grëse dien zha psilo grë ncuaañ co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnañ luuw; <sup>4</sup>zeena lozh gacnañ luu zha nac diidzli rii, wseed ne blu zho lo luu i.

<sup>5</sup>Len dze ne nac Herod rey rnabey me dib xtan zha Judé, len dze co no tib pxoz lë Zacarí, me nac tib zha ne nacgrë “Zha Abí”. Niicle tsiel mew, zha xtiit pxoz Aarón ziaad wnaa co, lë me Lisabet.

<sup>6</sup>Zigtaa Zacaríw, zigtaa Lisabeta, noxco me mine rnabey Dios, mban mew zigne naca, ni tib xley Dios rguitsd me. <sup>7</sup>Men gol-le nac me grop me, per ni tib mëed quianied me, sac niaad Lisabet gap me mëed.

<sup>8</sup>Laa tib dzew bgaa grë zha ne nacgrë Zacarí gun zho dziin len yadoo. <sup>9</sup>Nac xcostumbr grë zha ne nac pxoz, rio zho tib rif dien chopaa yгаа tsielaadz goxyaal len yadoo, dzigo bgaa Zacarí. <sup>10</sup>Goxyaal co nolaadz me len yadoo, laa grë miech ne ndxie nëz ley nonabгаа lo Dios, <sup>11</sup>tibaque zeene brieequia tib xanjl Dios bzo cue pcoog nëz derech, zaatne nozëeg me yaal ga. <sup>12</sup>Zeene gon me anjl co bdzieb me, rdzieldraa me zha gun me lo dzeb co. <sup>13</sup>Dzigo rëb anjl co lo me:

—¡Gdzieebd luu! Diidzse zialnie naa lo luu, gacnañ luu ganle mine bnab luu lo Dios ga, pquiaadiag mew; gane niina laa tsiel luu gap tib mëedbgui. Zeene gal win, Juan cueelë to win. <sup>14</sup>Tib guielbley nroob gac win lo to, niicle lo grëragaa miecha, <sup>15</sup>sac tib men nziuu gac win lo Dios. Zeene gac win zha broob, ni tib ro nziu guied win, per ni vin yquiaarod win; ansraa gal win, laa Espiritu Sant nacniele win. <sup>16</sup>Win gac men ne co guic nzian grë zha Israel, gbiire gbig zho lo Dios, men ne rnabey zho. <sup>17</sup>Zigne goc Lí, men ne baaad pteed xtiidz me padzeela, sca gac win tedner win lo me, nroob poder ne gap win. Win gnee lo grë miech rii, gbiire gleynie zho me zigne goc xmengol zho zha

ne bleynie me; csaan zho grë xquielntseeb zho, gban zho zigne racladz me; zeena niowse gac zho ycaania zho me.

<sup>18</sup>Pquiab Zacarí rëb Zacarí lo anjl co:

—iNcuuaane gacd i gon rnee luu! Zigtaa naaw, zigtaa tsiel naaw, mengol-le nac no.

<sup>19</sup>Rëbchaa anjl co:

—Bien ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii. <sup>20</sup>Per ne squi riladzd luuw, na laa luu guiaan ngop, haxta gal dze ne gac mine rne naa lo luu nu, dze co glan xtiidz luu stib.

<sup>21</sup>Grë miech ne ndxie quianab lo Dios ga, quiambëz zho Zacarí, rnabdiidzlsa zho pe goc me, sac ran zho rrieed me zaatne ziezëëg me yaal ga. <sup>22</sup>Zeene brieed me, gon zho gacdraa gnee me, dzigo bien zho no pe blu Dios lo me ga. Tel pe racladz me gnee me, niapse señ rlu me.

<sup>23</sup>Bzase dze ne been me dziin len yadoo, dzigo laa me zey lidz me. <sup>24</sup>Goca bla ngbidz, laa mëed co pquialo zdoos tsiel me.

Dipse len gaay mëë bio zhuz co ro yu, ib brieed me, rley me rnee me:

<sup>25</sup>—iZha wentaa Dios, bneedz me diidz bdzin dze yquianie naa mëed rii, zeena gzhidzniedraa miech naa!

### Güeynie tib anjl diidz laa Jesús gac mëed

<sup>26</sup>Goc xoop mëë zoney Lisabet mëed, pxeel Dios anjl co stib güey me Nazaret, guiedz ne ndxie xtan zha Galilé. <sup>27</sup>Ga no tib ndzooop nguieg lë Marí, len dze co no xtiidz ndzooop co ctsieelnia ndzooop tib zha xtii rey David, lë José. <sup>28</sup>Bdzin anjl co zaatne no ndzooop, pquiaabdiuzh me ndzooop, rëb me:

—iDichos luu gon, sac tib zha nziuu nac luu lo Dios! Me quianap luu.

<sup>29</sup>Zeene gon Marí anjl co, ni gon Marí zha rnee me, bzee zdoos Marí, rien Marí dien pe nac scataa rzë xtiidz me. <sup>30</sup>Dzigo rëbchaa me lo Marí:

—iGdzieebd luu! Laa Dios gon bzooblo luu yгаа luu tib guielnzaac nroob.

<sup>31</sup>Zdoos luu yquiaalo tib mëëdbgui, zeene laa win gal, JESUS cueelë luu win.

<sup>32</sup>Tib men nroob gac win, zien miech ganle Xpëed Dios ro ne no gbaa nac win; ni so me win gnabey win zig bnabey xmengol win David. <sup>33</sup>Win gnabey lo grëse zha Israel, ni gdzind dze ne lozh xquielrnabey win.

<sup>34</sup>Pquiab Marí rëb Marí lo anjl co:

—iMëed ye? ¿Per zha grielo gap naa mëed, ni tib naa zo nu?

<sup>35</sup>Rëbchaa anjl co:

—Niapse por poder ne rap Dios gac min co. Zeene laa Espíritu Sant guiaad gacnie luu, hor co laa poder co gacnie luu, laa mëed co yquiaalo zdoos luu; gacxe waa Xpëed Dios gunbey miech win, mine rnabey Dios min co gun win.

<sup>36</sup>Ye belyeen luu Lisabet, niina lo guielgol-le laa tib mëed pquialo zdoos me; zëëb diidz ib grielod gap me mëed, per na racle xoop mëë zoney me mëed,

<sup>37</sup>sac par Dios tsod ncuuaane grielod gac.

<sup>38</sup>Dzigo rëb Marí:

—Tel scaw, minē rnee luu i, maase gaca. Laa naa zo nu par gun naa minē gnabeytaa Dios naa.

Blozhse ga, laa anjl co zey.

### Güeygan Marí Lisabet

<sup>39-40</sup> Goc bla dzew, brieē Marí ga zie me ziegan me Lisabet tib guiedz win ne ndxie gui glaa ne nac xtan zha Judé. <sup>41</sup> Bdziñ me, wbig me pquiaabdiuzh me Lisabet. Bdiuzh co bnee me, zeene biasoli xpëēd Lisabet zdoo Lisabet; dzigo hor co bdeed Espiritu Sant guielbiini lo Lisabet, <sup>42</sup> nguiedz bnee Lisabet rëb me lo Marí:

—¡Dichos luu Marí bгаа luu guielnzaac qui! Sac gon, lo grëraa no nac no men wnaa, luu bzooblo Dios. Mëēd ne zoney luu i, zha nziuu nac win lo me. <sup>43</sup> ¡Ib guiaanladzd naa dze rii, znu bиаad luu nac luu xniaa men ne rnabey naa, bиаadgan luu naa! <sup>44</sup> Haxta mëēd ne zoney naa nu, rley win biasoli win zdoo naa, zeene pquiaabdiuzh luu naa. <sup>45</sup> ¡Dichos luu, bin luu minē nē Dios, ni bliladz luu zun mew!

<sup>46</sup> Dzigo hor co bnee Marí rëb me:

¡Men nroob nac Dios! ¡Gdib zdoo naa roolnie naa me!

<sup>47-48</sup> Rleynie naa me nac me men ne psilaa naa,  
sac gon niicle peet nond naa, tib ngundziin winse nac naa lo me,  
per laa me bzooblo naa.

Grë miech, zigtaa len dze riiw, zigtaa len dze ne ziaadragaaw,  
ziab zho naa nac tib wnaa ne mazdraa dichos.

<sup>49</sup> Ne nligaa zha nactaa guielnzaac rii bneedz me lo naa.

Men ro, men nroob nac me, ¡guiendraa cho zig me!

<sup>50</sup> Grëse miecha, zha ne rioxco rquiaadiag minē rnabey me,  
tibaque racnie me zho, ib rsaand me zho.

<sup>51</sup> ¡Golwi ganle zha nactaa grë ncuaañe run me!

Grë ncuaañe no guic zha niats gun zho, bnitlo mew,

<sup>52</sup> ptiche me grë zha ne zob rnabey.

Laa grë zha ndooladz, zha ne rzac miech peet nond,  
beñnon me zho.

<sup>53</sup> Grë zha mban ne guieñd pe yquin, nroob guielnzaac ne bdeed me lo  
zho,

laa grë zha ne rapchen, scase bzonëz me zho.

<sup>54</sup> ¡Pe zhidaa ziyacnie me grë zha ne nac xtii Israel, mengol ne goc zig tib  
ngundziin lo me ga! ¡Tibaque rlu me rleynie me zho!

<sup>55</sup> Ib biaanladzd me xtiidz me minē bnee me lo pxozgol ne Abraham,  
zeene rëb me gdzind dze ne csaan me Abraham, ni grëraa zha ne  
grieequia lo xtii Abraham.

<sup>56</sup> Maase tson mëē biaan Marí ga blëz me lo Lisabet, dzigoraa wbi me ga  
bdziñ me lidz me stib.

## Gol xpëed Lisabet

<sup>57</sup>Bdziñ dzew, laa xpëed Lisabet bza mëë, laa me gop win. <sup>58</sup>Grë zha ne no gax lidz me, grë zha ne nac menlidz me, zeene bin zho scataa pquia zdoo Dios me bdeed Dios mëed co lo me, rley zho güeygan zho me.

<sup>59</sup>Dze ne goc mëëdbgui yeen co xon ngbidz, blalaa zha ne güeynal zhits pxoz win, zhits xniaa win güeynie zho win bio win bey ne rio xpëëdbgui zha Israel, parne glu lo Dios ngab win. Tibaque nan zho Zacarí nrieele win, zigne lëque pxoz win, haxta scale nonee zho lo win, <sup>60</sup>per hor co rëb Lisabet, led scad gac lë win, Juan grieele win.

<sup>61</sup>Dzigo pquiab zho rëb zho:

—¿Pe nacne sca grieele win? Ni tib menlidz to lëd Juan.

<sup>62</sup>Bnabdiidzaque zho lo pxoz win, blu zho señ lo me dien zha racladz me gac lë win. <sup>63</sup>Dzigo bnam me bdeed zho tib lë lo zaatne yquiaa me; bzee zdoo zho zeene blozh pquiaa me gon zho rnee lo co: “Juan grieele win.” <sup>64</sup>Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios. <sup>65</sup>Grë zha ne zo ga, zha ne runbey me, zeene gon zhow, per nli rzee zdoo zho.

(Nëzrii nëzrec bzhoon diidz laa mëed co gol, grëse guiedz ne ndxie gui glaa co gocnan miecha. <sup>66</sup>Zha ne rona, rza zdoo zho rnee zho: “¿Bay cho gac mëdyeen co?” Sac nligaa rlu nacnie Dios win.)

<sup>67</sup>Hor co bdeed Espíritu Sant guieibiini lo Zacarí, psilo me bnee me rëb me:

<sup>68</sup>¡Xquizh xquieInzaac men nroob ne rnabey, men ne nac xDios ne nac ne zha Israel!

Sac gon laa me ziaad, ziaadgan me ne, ziadbee me ne lo xquieInë ne.

<sup>69</sup>Nasi laa me pxeel men nroob ne ziaadsilaa ne,

lëë men co ga no grieequia lo zha xtii David, men ne been xtsiin me ga.

<sup>70</sup>Padzeelale bzeet me cxeel me men co,

grë zha ne biaad pteed xtiidz me, bzeet zhow.

<sup>71</sup>Rëb zho, ib xxeel me men ne guiaadsilaa ne ladznia zha ne nosacsi ne, zha ne rlëë lo ne.

<sup>72</sup>Sac ib gdziñd dze csaan me grë zha xtii pxozgol ne, rquianëpaa zdoo me zho.

Ib guiaanladzd me mine rëb me lo Abraham,

<sup>73</sup>zeene rëb me laa me cxeel men ne csilaa ne,

<sup>74</sup>zeena dziodzebdraa ne lo zha ne rlëë lo ne, lo zha ne rsacsi ne; sinque ine tibli gac ne dziuun ne mine rnabey me.

<sup>75</sup>Gzataa dze ne gneedz me guieImban lo ne,

ine mbe zdoo ne, dziuun ne mine rleynie me.

<sup>76</sup>Luu gon xin, bzooblo Dios ro ne zob gbaa, cteed xtiidz me lo miech, luu tedner tsienee luu lo zho, laa men co no guiaad.

<sup>77</sup>Luu gnee lo grë zha Israel, guien zho ganle zha gun Dios zho perdon, parne ycaania me zho.

<sup>78</sup> Ne nligaa rleynie me ne, rquia zdo me ne,  
gane laa me cxeel̄ Xpëed me, men̄ co gac zig tib biini,

<sup>79</sup> Biini co gziini lo grë zha ne mban lo guiel̄cow,  
zeena biini co glu nöz lo ne, guio ne nöz ne peet zhgab, peet dzeb  
guiend̄.

<sup>80</sup> Zigse zie dzew, scase scase zieroo meäyeeñ co, ni scaquegaa dib zdo  
win rleynie win Dios. Zeene laa win broobpaa, dzigo güey win bio win tib  
dan zit, haxta bdziñ dze ne laa win psilo pseed miech laa win blulo lo zho.

### Gol Jesús

(Mt. 1:18-25)

**2** Lëetaque len̄ dze co, laa August, rey nroob ne zob Roma, bnabey top  
lë grëse miech ne no dib dan ne rnabey me, par gacnan̄ me dien̄ palal  
zho. <sup>2</sup>Lëe primer vuelt ga ptop zho lë miech, lëe iz co zob men̄ ne lë Cirein  
zobnabey me Siria.

<sup>3</sup>Bnabey August grëse miech zha ne no stib ladz ben̄, laa zho no tsie zaatne  
nacpaa ladz zho tsiedeed zho lë zho, parne ga ygab zho. <sup>4</sup>Min̄ co nagon̄ nacne  
briee José guiedz Nazaret (xtan Galilé) grop me Marí zie me Belén (xtan Judé).  
Laa me zie ga, sac ga goc ladz xmen̄gol me rey David. <sup>5</sup>Gard ctsieelniapaa me  
Marí, per nole xtiidz me grop me. Len̄ dze co ziaadyobpaa gal xpëed Marí.

<sup>6-7</sup>Bdziñ me Belén, bgaadraa me zaatne nrieelo mbëz me len̄ yu, lega nac  
ti len̄ lidz ma bdeed zho blëz me. Lëetaque bdziñ me ga, laa mëed co gol.  
Racse Marí pchel̄ me win lar, bdiix me win tib len̄ yag ne row ma guizh; lëe  
mëedglo ga lo me.

<sup>8</sup>Guieel co, blalaa zha ne nac baxtor, laa zho ndxie quianap zho xpëcwxiił  
zho dan, <sup>9</sup>tibaque zeene brieequia tib xanjł Dios lo zho, dipse zaatne ndxie  
zho ga biab tib biini nroob. Zeene gon̄ zho anjł co, gon̄ zho biini nroob co,  
per nli bdzieb zho. <sup>10</sup>Dzigo bnee anjł co, rëb me lo zho:

—¡Gdziebde to! ¡Golgon̄ diidz cub ne ganle zial̄nie naa lo to nu! ¡Tib  
guiel̄bley nroob gac diidz rii lo grëse miech! <sup>11</sup>Men̄ ne gon̄ quiambëz to ga  
guiaad csilaa to, laa me blansole lo guidzliu. Me nac Men̄ ne zëëble diidz ga  
cxeel̄ Dios, me nac men̄ ndzon ne rnabey. Belén, zaatne goc ladz rey David,  
ga gol me naguieel. <sup>12</sup>Goltsie, zaatne tsiedziel to tib mëëdbgui yeen̄, nrielse  
win lar zhoob win len̄ yag ne row ma guizh, lëe me ga.

<sup>13</sup>Tibaque zeene gon̄ zho laa stib dzoon anjł brieequia gocgrë anjł ne quianee  
lo zho ga, psilo grë anjł co rool̄nie zho Dios, rnee zho:

<sup>14</sup>¡Haxta zaatne glaaraa gbaa, nozhoobnen̄ ganle pa lotaa men̄ nroob nac  
Dios!

¡Nasi, grëse miech zrieeło guiaanwen̄ zho lo me; zdo me rala laa me  
nobedz zho!

<sup>15</sup>Zeene laa grë anjł co zey gbaa stib, psilo grë baxtor co rnee zho:

—¡Niinaga golgotsaa guio Belén! ¡Gotsaa guiowi ne dien̄, zeena dzian̄ ne  
miñe biaadnie anjł co diidz lo ne nu!

<sup>16</sup>Lëälëd bio zho nëz laa zho zie. Bdziņ zho zaatne blëz José ga grop Marí, nligaa laa mëdyeen co nix ga, nixse win tib len yag ne row ma guizh. <sup>17</sup>Dzigo bzodiidz zho grëse zha rëb anjl co lo zho, zeene güeynie me diidz laa win gol. <sup>18-19</sup>Grë zha ne bina, per nli rzee zdoo zho; laa Marí nosew zdoo me, tibaque rsoladz mew.

<sup>20</sup>Blozh ga, laa zho bio nëz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanjl me güeynie diidz lo zho, rley zho sac brieelo gon zho mëdyeen co.

<sup>21</sup>Dze ne goc xon ngbidz gol win, dze co bio win bey ne rio xpëedbgui zha Israel, par glu xnëz Dios ngab zho; dze coquew bleelë zho win JESUS, zigne rëb xanjl Dios zeene güeynie me diidz ne laa win gac mëed lo Marí.

### Güeynie zho Jesús yadoo

<sup>22-24</sup>Nac ley ne psan Moisés lo zha Israel, wnaa ne sca rap mëedbgui, zeene rac zho tap zhmäl, none tsienie zho chop ma cogon zho len yadoo; yase tsienie zho tib nëz coc, tib nëzgaä palom. Ni rnabeya: “Grëse mëedbgui ne rac mëedglo, ib none gdeed zho win gac win tib zha ne gon xtsiin Dios.” Nacne zeene bza dze co, dzigo brieë Marí zie me Jerusalén grop me José, zienie me mëdyeen co yadoo csan me win ladznia Dios; lëë nëzle ga zienieque me gon ne no gdeed me ga.

<sup>25</sup>Lëëtaque dze ne bdziinne zho win len yadoo, laa tib men lë Simeón no ga. Men Jerusalén nac men co, rleynie me Dios, rioxco me mban me zigne rnabey Dios, ni nacie Espíritu Sant me. Quiambëz me gan me Men ne nole diidz ga cxeel Dios csilaa zha Israel, <sup>26</sup>sac rëble Espíritu Sant lo me ible laa me no gan men co. <sup>27</sup>Laa dze co, Espíritu Santaque psiaab guic me zie me yadoo. Nacne lëëtaque no me len yadoo, laa zho bdziinne mëdyeen co ga, ziesan zho win ladznia Dios zigne rnabey ley. <sup>28</sup>Dzigo me wbig bdeedz win, rdeed me xquizh lo Dios, rëb me:

<sup>29</sup>Xquizh xquielnzaac luu Dios, mine në luu lo zhingundziin win luu nu, laaw goc.

Nasi zacle nagon guiaad-xi luu naa, haxta gley naa gbi naa lo guidzliu ri.

<sup>30-31</sup> ¡Men ne nacle diidz cxeel luu guidaasilaa miech lo xtol zho, grop lo naa laa naa ran me niina!

<sup>32</sup>Grëse miech ne ndxie lo guidzliu, me nac biini ne gziini lo zho.

Me csannziuu zha Israel, ne nac zho zha ne ngab lo luu.

<sup>33</sup>Zeene gon Marí grop José scataa rzë grë diidz ne rnee Simeón rzeet Simeón mëdyeen co, bzee zdoo me. <sup>34</sup>Dzigo bnab Simeón lo Dios gacniē Dios me gza me mëdyeen co. Blozh ga, rëbchaä Simeón lo xnäa win:

—Tib guielbley nroob ne gac mëed ri lo zha Israel, por win ndal zho gree lo guielcow ne no zho, laa zho gbig lo Dios. Ni scagaa zrieëquia zha ne glëenie win, per lëëque zha csacsi zho ga. Mban gac zdoo luu, nroob guielnë ne tso luu gan luu zha sac miech win. <sup>35</sup>Ga glu ganle zha nac zdoo tib tib miech.

<sup>36-37</sup>Ye tib zhuz gol lë An zo ga hor co. Tibaque no me yadoo, dze guieel roolnie me Dios, rcuan me ni rzodiidznie me Dios. Tib zhuz gola, len dze co rac tapgal tap iz biaan me viud. Nguieg me ptsieelnia me, per loxaque gadz iz wbannie me tsieel me. Lëë pxoz me ga brieelë Fanuel, lëë zhey co ga nac zha xtii Aser. Tib men ne rteed xtiidz Dios lo miech nac me, <sup>38</sup>dzigo wbigaque me, psilo me rdeed me xquizh lo Dios; ni bzodiidz me lo grë zha ne ndxie ga, rëb me lëë mëdyeen co ga nac men ne quiambëz zho ga guiaadsilaa zho.

<sup>39</sup>Blozhse been José mine rnabey xley Dios grop me Marí, dzigo laa me wbi ga. Bdedraa ga, beynie me mëed co Nazaret, zaatne nac ladz me. <sup>40</sup>Ga broob win, zigse zieroob win scase scase rac macis win, scase riabiiniraa win. Tibaque nacie Dios win.

### Biaan Jesús len yadoo

<sup>41-42</sup>Zeene bloozh Jesús tsiipchop iz, dzigo güey José grop me Marí güeynie me win lni Pascw, lni nroob ne run zho Jerusalén. Gzobse iz rie me grop me, per iz cotaa laa me güeynie win, sac nac zhiwseed zha Israel, mëëdbgui ne rap lalga iz, zrieelele tsie zho lo lni co.

<sup>43</sup>Zeene laa lni co bded, laa me bio nëz grop me laa me wbi ga. Ib biend me biaan win Jerusalén, <sup>44</sup>tibaque güeynie guic me lad grëraa miech ne wbi lni, lad co zienal win. Laa me no nëz, zeene bdzetaa dzew, laa me psilo rguib win, bnabdiidz me lo grë zha lidz me, lo grë zha ne runbey me, <sup>45</sup>per ni tib zho choot rdeete win diidz. Nacne wbiereque me nëz Jerusalén stib, zieguib me win.

<sup>46</sup>Dze ne racle tson ngbidz blozh lniw, dzigoraa güeydziel me win len yadoo, laa win zob lo grë zha ne nac maistr ley, noquiaadiag win grë zhiwseed zho ni nzian grë ncuane rnabdiidz win lo zho. <sup>47</sup>Rzee zdoo zho ran zho scataa nixbiini win, niicle zeene rnee wina, zeene rtsiregaa win lo xtiidz zho. <sup>48</sup>Zeene gon me laa win zob lad grë men co, bzee zdoo me; dzigo rëbchaa xniaa win lo win:

—Xin, ¿pe nacne squi been luu? Ptseeb luu no gon, quia no grop no pxoz luu noguib no luu.

<sup>49</sup>Pquiab win rëb win:

—Nguibde to naa. ¿Pe rande to ib none gun naa xtsiin Pxoza naa?

<sup>50</sup>Ib biend me pe nacne sca rëb win. <sup>51</sup>Dzigo laa win zienal zhits me, laa me zeynie win Nazaret; nose grë min co zdoo xniaa win.

Tib mëed nguzobdiidz nac win, ron win xtiidz me. <sup>52</sup>Zigse zie dzew, laa win riabiiniraa, laa win noroobraa; rleynie Dios win, niiclegaa miecha rleynie zho win.

### Psilo Juan Bautist noseed me miech

(Mt. 3:1-12; Mr. 1:1-8; Jn. 1:19-28)

**3** <sup>1-2</sup>Bdzin dzew, laa Juan psilo pseed miech. Lëë len iz co rac tsiin iz zob men ne lë Tiber nac me rey, rnabey me grë guiedz ne ngab lo zha Roma.

Leṅ dze co zob Pilat rnabey me grë guiedz ne ndxie nëz Judé, laa Herod zob rnabey grë guiedz ne ndxie nëz Galilé. Leṅ dze coque zob bets Herod, meṅ ne lë Lip rnabey me grë guiedz ne ndxie nëz Ituré ni nëz Traconit; laa Lisian rnabey grë guiedz ne ndxie nëz Abilin. Zha ne nac zhipxoz nroob zha Israel leṅ dze co, nac Anás ni Caifás. Leṅ dze copaa nagon güeynee Dios lo Juan (xpëed Zacarí) dan ngan ne no Juan ga.

<sup>3</sup>Nacne hor co psilo Juan güeyted me grë guiedz ne ndxie ro guiubee Jordán, rnee me lo grë miech co, csaan zho xquieṅtseeb zho gbig zho lo Dios ni chobnis zho, zeena csilaa Dios zho lo grë xtoṅ zho. <sup>4</sup>Ga brieequia miṅe bnee Isá, meṅ ne biaad pteed xtiidz Dios, zeene znu pquiaa me:

Bii zon miech ganṅe zeene laa tib tsi meṅ zëeb tib dan ngan, rnee me:

“Goṅzhixcuaa nëz ne ted meṅ ne rnabey,

goṅsaan grë guieṅtseeb ne ruṅ to.

<sup>5</sup>Zaatne nac leṅ blë, goṅcodzëew,

grë gui glaa, grë gui las, goṅsiaablow.

Nëz ne niecw, nëz ne quiaya quiaguiet nac, goṅzhixcuaaw.

<sup>6</sup>Grëse miech, laa zho ganṅ meṅ ne pxeel Dios ga ziaadsilaa zho.”

<sup>7</sup>Zeene ran Juan laa miech rdziṅ lo me cchoobnis me zho, rnee me lo zho:

—¡Miech ngoopdol, masaque nac to zig nac meel! Nan to na lëë, loxaque chobnis to laa to laale lo grë guieṅnë dox ne ziaadyob guiaad. <sup>8</sup>Led scada gon, none ndzinli gban to zeena glu nlipaa psaan to xquieṅtseeb to. Ni gacniatsde to guiab to, loxaque por nace to zha xtii Abraham, laa Dios csilaale to; sac gneli naa lo to ganṅe, teṅne gacladz Dios, haxta grë quie zac gnabey me tsaalow miech ne gac zha xtii Abraham. <sup>9</sup>Nanṅe to ganṅe, grë yag nex ne rquiad nex lo, zeene ran zho sca naca, rchug zhow, rzëëg zhow; scadaa nagon sac grë zha ne gband zigne racladz Dios, ib tedlaad zho lo gui; sac rrieequia laa me nzhenṅe xquibyag me, cchug me grë yag ne sca nac.

<sup>10</sup>Dzigo rnabdiidz zho lo Juan, pe no gun zho parne ygaad zho grë guieṅnë co. <sup>11</sup>Dzigo rquiab me rnee me lo zho:

—Teṅne quianie to chop lar ne racw to, none gdeed to tiba lo zha ne guiend xab; teṅne quaniegaa to ncuaane gow to, none gdeed to palala yquiin zha ne quianieda.

<sup>12</sup>Wbigaque bla recaudador ne zie chobnis, rnabdiidz zho dieṅ pe gun zho.

<sup>13</sup>Pquiab Juan, rëb Juan lo zho:

—Cuandraa to samiech to, miṅe rieguiaṅse zho quizh zho, miṅ co goṅnab lo zho.

<sup>14</sup>Ye zla menguiib wbig, rnabdiidz zho rëb zho:

—¿Teṅzhe no waa, pe nac miṅe dziuun no?

Rquiab Juan rnee Juan lo zho:

—Ndzinli goṅgac, ib ctsebde to samiech to par dieṅ pe gla to lo zho; zha ne peet xtold, ib yquiaaquide to zho ncuaane beend zho. None sac zdoo to dimi ne quiayazh to.



<sup>15</sup>Nzian grë miech co quiambëznë zho gacnañ zho dien pe lëele Men ne bzooblo Dios ga cxeel me nac Juan. <sup>16</sup>Dzigo rëb Juan lo zho:

—Tib wrobnisse nu rnedz naa lo to, sangue men ne no guiaad ga, Espíritu Sant gdeed me lo zha ne gliladz me; ni scagaa zha ne gliladzd me, sonëz me zho zaatne nitlo zho. Ne nligaa men non nac me, tel naa peet nond naa, per ni par tib ngundziin ne glit lab me ni me, raguiaald naa gac naa. <sup>17</sup>Laa me guiaad zig tib zha ne rbeeguizh zhobxtil, sac zha co, rlozhse rbeeguizh zho zhob rgotsow zhow, laa paj rlaal zho lo gui, ga reca. Per gui ne gzëëg grë paj ne guiadbee me ga, gdzind dze guiuuw.

<sup>18</sup>Sca rnee me lo zho, par guien zho zha nac Xtiidz Dios. <sup>19</sup>Tib vuelt haxta lo rey Herod goctox me, sac lëëque Herodí, wnaa ne nac tsiel bets Herod nonie Herod; grë guieIntseeb ne quiaayun Herod, blisqui mew. <sup>20</sup>Per laa ne nion Herod diidz, lel been me stib guieIntseeb, bnabey me bgaa Juan bio Juan ladzguiib.

### Brobnis Jesús

(Mt. 3:13-17; Mr. 1:9-11)

<sup>21</sup>Len dze ne nochoobnis Juan miech ga, tib dzew laa Jesús bdzin lo Juan ga, ye me bnaab choobnis Juan me. Blozhse brobnis me, laa me quiazodiidznie Dios, tibaque zeene bzhial zhan gbaa, <sup>22</sup>laa men ne nac Espíritu Sant biet, rlu me zig rlu tib palom, laa me bdzin guic Jesús, hor co blu zëëb tib tsi men co nëz gbaa, rnee me:

—Xin, rleynie naa luu gon, nziuu luu lo naa.

### Xmenjol Jesús

(Mt. 1:1-17)

<sup>23</sup>Galptsii iz rap Jesús, laa me psilo xtsiin me pseed me miech. Zha ne runbey me, rzoob zho xpëed José nac me,

<sup>24</sup>José co goc xpëed Elí,  
Elí goc xpëed Matat,  
Matat goc xpëed Leví,  
Leví goc xpëed Melqui,  
Melqui goc xpëed Jan,  
Jan goc xpëed José,

<sup>25</sup>José goc xpëed Matatí,  
Matatí goc xpëed Amós,  
Amós goc xpëed Nahúm,  
Nahúm goc xpëed Esli,  
Esli goc xpëed Nagai,

<sup>26</sup>Nagai goc xpëed Maat,  
Maat goc xpëed Matatí,  
Matatí goc xpëed Semei,  
Semei goc xpëed José,  
José goc xpëed Judá,

- 27 Judá goc xpëed Joan,  
Joan goc xpëed Resa,  
Resa goc xpëed Zorobabel  
Zorobabel goc xpëed Salatiel,  
Salatiel goc xpëed Neri,
- 28 Neri goc xpëed Melqui,  
Melqui goc xpëed Adi,  
Adi goc xpëed Cosam,  
Cosam goc xpëed Lmodam,  
Lmodam goc xpëed Er,
- 29 Er goc xpëed Josué,  
Josué goc xpëed Liezer,  
Liezer goc xpëed Jorim,  
Jorim goc xpëed Matat,
- 30 Matat goc xpëed Leví,  
Leví goc xpëed Simeón,  
Simeón goc xpëed Judá,  
Judá goc xpëed José,  
José goc xpëed Jonán,  
Jonán goc xpëed Liaquim,
- 31 Liaquim goc xpëed Melé,  
Melé goc xpëed Mainán,  
Mainán goc xpëed Matata,  
Matata goc xpëed Natán,
- 32 Natán goc xpëed David,  
David goc xpëed Isaí,  
Isaí goc xpëed Obed,  
Obed goc xpëed Booz,  
Booz goc xpëed Salmon,  
Salmón goc xpëed Naasón,
- 33 Naasón goc xpëed Minadab,  
Minadab goc xpëed Aram,  
Aram goc xpëed Srom,  
Srom goc xpëed Far,  
Far goc xpëed Judá
- 34 Judá goc xpëed Jacob,  
Jacob goc xpëed Isaac,  
Isaac goc xpëed Abraham,  
Abraham goc xpëed Taré,  
Taré goc xpëed Nacor,
- 35 Nacor goc xpëed Serug,  
Serug goc xpëed Ragau,  
Ragau goc xpëed Peleg,

Peleg goc xpëed Heber,  
 Heber goc xpëed Sala,  
<sup>36</sup> Sala goc xpëed Cainán,  
 Cainán goc xpëed Rfaxad,  
 Rfaxad goc xpëed Sem,  
 Sem goc xpëed Noé,  
 Noé goc xpëed Lamec,  
<sup>37</sup> Lamec goc xpëed Matusalén,  
 Matusalén goc xpëed Enoc,  
 Enoc goc xpëed Jared  
 Jared goc xpëed Mahalaleel,  
 Mahalaleel goc xpëed Cainán,  
<sup>38</sup> Cainán goc xpëed Enós,  
 Enós goc xpëed Set,  
 Set goc xpëed Adán.  
 Adán goc zig tib xpëed Dios.

#### Gocladz mēndox niungüet ma Jesús

(Mt. 4:1-17; Mr. 1:12-15)

**4** Zeene blozh brobnis Jesús guiubee Jordán ga, nacie Espíritu Sant me, dzigo güeynie me Jesús tib dan ngan, zaatne choot miech guiend. <sup>2</sup> Ga bio Jesús, ni tib lē peet dowd me; gzase dze pquiana<sub>l</sub> mēndox niungüet ma me niun me minē racladz ma. Zeene goc choo dze no me ga, gon ma lēbdraa me rcaabedz me, <sup>3</sup> dzigo rēbchaa ma lo me:

—Telne nli Xpëed Dios nac luu, bnabey tsaalo grē quie rii ncuane gow luu.

<sup>4</sup> Dzigo pquiab me rēb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

<sup>5</sup> Blozh ga güeynie ma me glaa tib guic gui, ga znuse blu ma grēse guedz ne ndxie dib lo guidzliu lo me, <sup>6</sup> rēb ma:

—Bui ganle, grēse guiedz ne gon ran luu i, chen naaw, zrieelo gded naaw lo zha ne racladztaa naa. Grēsew, dib guie<sub>l</sub>ndaan ne no low, znedz naaw lo luu <sup>7</sup> telne squitsgzhib luu lo naa, gunnon luu naa.

<sup>8</sup> —¡Biche lo naa nu mēndox! —rēb me lo ma —. Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me riegual qquitsgzhib luu; ni minē rnabey me min co none gun luu.”

<sup>9</sup> Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo nroob ne zob lad guiedz co, rēb ma lo me:

—Telne nli Xpëed Dios nac luu, bringaa nu, <sup>10</sup> benque led znu rnee lo Xtiidz me: “Znabey Dios grē xanj<sub>l</sub> me yquiaanap luu, <sup>11</sup> zgueedz zho luu, zeena ni tib quie yca<sub>nd</sub> ni luu.”

<sup>12</sup> Dzigo rēb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me gun me ncuane nod gun me.”

<sup>13</sup> Gonse ma rdziel zha gungüet ma Jesús, dzigo biche ma lo me palal dze.

<sup>14</sup> Blozhse ga, dzigo laa Jesús wbi ga bdziñ me nêz Galilé, scaque nacie Espíritu Sant me. Znuse beenbey miech me por grêtaa ncuaañ ro ne run me, grêse guiedz ne ndxie nêz co, rzeet zho me. <sup>15</sup> Zaatne rdzintaa me, rie me xyadoo zho, rseed me zho Xtiidz Dios, rleynie zho me, rley zho ron zho grê miñe rnee me.

### Güey Jesús Nazaret

(Mt. 13:53-58; Mr. 6:1-6)

<sup>16</sup> Tib dzew, laa me bdziñ Nazaret, zaatne broob me. Goļ dze ne rdziiladz zha Israel lo dziin, güey me xyadoo zho zig runaque me grêraa zaatne ziyé me. Zeñe goļ horne rlab zho Xtiidz Dios, dzigo bded me, <sup>17</sup> bdeed zho miñe pquiaa Isá glab me. Pخال me low, lëetse zaatne znu rnee blab me:

<sup>18</sup> ZhiEspíritu Dios nacie naa,

ible Dios bzooblo naa, gnee naa Diidz Ndzon ne nac xtiidz me lo grêse zha ne rquiinnëw.

Laa me pxeel naa gne naa lo grê zha ne ngadoo lo ncuane nosacsi zho, zeena guien zho zha griece zho lo grê ncuaañ co.

Laa me pxeel naa gziini naa lo grê zha ne no lo guielcow, grê zha ne rzac guindraa zha griece zho lo zhizhgab zho, laa me pxeel naa, naa cuee zho lo zhgab co.

<sup>19</sup> Laa naa ziañie diidz lo miech, gacnañ zho pa lotaa noxco Dios gunlay me grêse zha ne gbig lo me.

<sup>20</sup> Blozhse blab me lo co, ptibëd mew bdeed mew lo zha ne quianapa, dzigo laa me bzob. Grêse zha ne no len yadoo ga, dze rwi zho lo me, <sup>21</sup> dzigo bnee me lo zho, rëb me:

—Grê diidz ne blozh blab naa lo to nu, len dze rii gon laaw noyac cumplir.

<sup>22</sup> Grêse zho rleynie zho me, rlozhd gzee zdoo zho ron zho grêtaa diidz ndzon ne rnee me. Rnabdiidzlsa zho rnee zho:

—¿Bay zha squitaa pseed men qui? ¡Led lëe xingan José!

<sup>23</sup> Dzigo rëb me lo zho:

—No tib diidz ne rnee: “Zha ne racnie stib miech, none guien zho glo menladz zho gacnie zho.” Rienpaa naa gon, min co racladz to gnë to lo naa; quiambëz to gan to grê milagr ne ziyon to ben naa guiedz Capernaum.

<sup>24</sup> Gneli naa lo to ganle: Zha ne riaad rteed xtiidz Dios, ible znu randzed menladz zho zho; gane rriyelod pe gun zho. <sup>25-26</sup> Goļsoladz ganle zeñe biaad Lí, bio tib tiemp ne biabd guie tson iz grol, tib gbin dox ne gon miech Israel nu. Ndal wnaa viud ne nac menladz me mban bded zho, guien pe nquiin zho, per brielod niun me xyudar zho; leļ xyudar tib wnaa Sarept pxeel Dios me güeygun me, guiedz ne ndxie gax Sidón. <sup>27</sup> Scaque zeñe biaad Liséw, ndal

zha Israel rlan guiedz dox ne nac lepr, per ni tib zho beenguiacd me; le<sub>l</sub> tib zha Siria lë Naamán, men<sub>n</sub> co beenguiac me.

<sup>28</sup>Zeene gon<sub>n</sub> zho sca rnee me, blëë zho. <sup>29</sup>Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga, <sup>30</sup>zeene znuse bded me lad zho, ziega me.

### **Biac tib mgui ne nosacsi mendox**

*(Mr. 1:21-28)*

<sup>31</sup>Ga wbi Jesús, bdzi<sub>n</sub> me guiedz Capernaum stib, guiedz ne ndxie nëz Galilé. Gzobse dze ne rdziiladz grë miech co lo dziin, rie me xyadoo zho rieseed me zho. <sup>32</sup>Rzee zdoo zho ron zho grë zhiwseed me, grëse min<sub>e</sub> rnee me, rlu zha rnabey nac me.

<sup>33</sup>Tib vuelt, lad grë zha ne noseed me ga no tib mgui ne nosacsi mendox; roptsie mendox co rnee ma lo me:

<sup>34</sup>—jPsaan no! ¿Pe gon<sub>n</sub> luu no Jesús Nazaren? ¿Ziaad luu lëë par gnitlo luu no? jRunbey naa luu, luu nac men<sub>n</sub> ndzon ne pxeel<sub>l</sub> Dios!

<sup>35</sup>Dzigo goctox me lo ma, rëb me:

—jPsioog ro luu! jNa zeena psaan men<sub>n</sub> qui!

Hor co, squi ndxie grë miech co bron<sub>n</sub> ma mgui co liu, mincose been<sub>n</sub> ma, laa ma brieë laa ma zie. <sup>36</sup>Rlozhd gzee zdoo grë miech co, rnabdiidzlsa zho rnee zho:

—¿Zha nac xtiidz men<sub>n</sub> qui, zha nacne haxta mendox rdzieb ma me, rzhoon<sub>n</sub> ma zeene laa me ractox lo ma?

<sup>37</sup>Grëse guiedz ne ndxie gax ga, zigse zie dze rzhoon<sub>n</sub> diidz scataa milagr ne run<sub>n</sub> me.

### **Biac xniadzoop Pedr**

*(Mt. 8:14-17; Mr. 1:29-39)*

<sup>38</sup>Brieë Jesús len<sub>n</sub> yadoo, zie me nëz lidz Simón. Bdzi<sub>n</sub> me lëëtaque laa xniadzoop Simón nix rlan xlëë, nzhoo rac me; dzigo wbig zha ne been<sub>n</sub> vis laa zhuz co rzacnë, bnab zho lo me gun<sub>n</sub>guiac me me. <sup>39</sup>Nacne bded me zaatne nix zhuz co, goctox me lo xlëë co. Hor cogazha laaw blëz, guche zhuz co ga, been<sub>l</sub>o me ncuaane dow zho.

<sup>40</sup>Laa ngbidz rzëëblew, zeene bdzi<sub>n</sub> grë miech co lo Jesús, bdzi<sub>n</sub>nie zho grë zhimguidz zho. Zhaase zhaase guiel<sub>l</sub>guidz ne rzac tib tib mguidz co, per grëse zho zigne rxobnia me guic zho laa zho riac. <sup>41</sup>Nzian zho ben<sub>n</sub>cxoon<sub>n</sub> me mendox ne nosacsi zho, zeene laa ma rrieë, nguiedz roptsie ma rnee ma lo me:

—jRdziuunbey no luu, Xpëed Dios nac luu!

Dzigo ractox me lo ma, rsaand me gnee ma cho nac me, sac wen wen nan<sub>n</sub> ma me nac Men<sub>n</sub> ne nacle diidz ga cxeel<sub>l</sub> Dios.

<sup>42</sup>Biini liu co, silgaw brieë Jesús lad guiedz co güey me tib zaatne choot miech guiend. Zeene bnit me lo grë miech co, brieë zho güeyguib zho me haxta

bdziel me lo zho; r nab zho lo me Capernaumse ga cuéz me, paat tsiedraa me.

<sup>43</sup>Dzigo rëbchaa me lo zho:

—Grieełoda, ib none ga naa grëraa guiedz, gaseed naa miech gacnañ zho zha racladz Dios gban zho; sac ible miñ co pxeel me naa ziañ naa.

<sup>44</sup>Nligaaw, grëse guiedz ne ndxie nëz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grë miech co.

### **Nroobdox meñ bgaa**

(Mt. 4:18-22; Mr. 1:16-20)

**5** Tib vult miech guizhiu ne pcaalsa lo Jesús ro Nisdoo Genesaret, haxta rtaagw zho me; grëse zho racladz yquiaadiag zho Xtiidz Dios. <sup>2</sup>Gax ga zo chop barcw, blalaa ngooz meñ biet lena, laa zho no lo nis ga noguiib zho guix ne rnaaz zho meñ. <sup>3</sup>Nacne güey me biep me tib len barcw co, bnabey me Simón psëe Simóna bzëeba lo nis palal; sac lëe xbarcw Simón ga. Dzigo leen co bzob me pseed me grë miech co.

<sup>4</sup>Zeene blozh bnee me lo zho, rëbchaa me lo Simón:

—Nana ganle zeeynie barcw rii guionie new zaatne quietlaa nis, zeena gron to guix ne rga meñ i gnaaz to palal ma.

<sup>5</sup>Pquiab Simón rëb Simón:

—Dib guieel-le bdzio no lo nis rii, per ni tib meñ bnaazd no; per lega ne luu rneew, na dien laa no grona stib.

<sup>6</sup>Bron zho guix co lo nis, zeene laa zho cueew, ya zig zrieza, biodzëse lena no meñ. <sup>7</sup>Hor co blunia zho lo grëraa zha ne nacgrë zho no stib len barcw co, parne tsie zho gun zho xyudar zho. Bdziñ zha co gogcza zho, gropse len barcw co pcodzëe zho grë meñ co; ya zig zdedquiew lo nis.

<sup>8</sup>Zeene gon Simón scataa meñ taf ne bgaa, pquiitsgzhib me lo Jesús, rëb me:

—Bzhiguiel mazd psaan naa, tib miech ngoopdol nac naa, rdzieeld so luu lo naa nu.

<sup>9</sup>Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon zho ga. <sup>10</sup>Scasaque rac Jacob ni Juan (xingan tib men lë Zebedé), zha ne nacgza Simón.

—Gdziebd luu —rëb Jesús lo Simón—. Zigne squi gon rioxco luu riaad luu gooz meñ niina, desde nadze laa luu tsoxco gun luu stib gooz; laa naa cxel luu tsietop luu grë miech ne sëeb xnëz Dios.

<sup>11</sup>Zigne bdziñnie zho barcw co ro nis, bzo zhow ga, laa zho zienañ zhits me.

### **Biac tib zha ne rlan guiedz lepr**

(Mt. 8:1-4; Mr. 1:40-45)

<sup>12</sup>Laa Jesús no tib guiedz co, tib dzew, bdziñ tib mgui ne rlan guiedz dox ne lë lepr lo me, pquiitsgzhib mgui haxta bdziñ lo mgui liu, rëb mgui lo me:

—Tebaa siguiel luu gunguiac luu naa.

<sup>13</sup>Dzigo pxobnia me guic mgui, rëb me:

—Zunguiac naa luu. ¡Niinagazh laa luu guiaanmbe!

Hor cogazha laa mgui biaanmbe lo guiedz co. <sup>14</sup>Dzigo pso Jesús diidz lo mgui, choot lo gzodiidzd mgui zha biac mgui; ni rëb me lo mgui:

—Bzë, güey lo pxoz, güeyсан gon ne rnabey xley Moisés gdeed luu; zeena gan zho ganle laa luu biacle.

<sup>15</sup>Niicle sca nëd me gacnan miecha, per znuse znuse rliaal diidz grëtaa milagr ne run me; miech guizhiu ne rdzin lo me, zha ne zie yquiaadiag zhiwseed me, zha ne zieegaa gunguiac me zho tel pe guielguidz ne rzac zho. <sup>16</sup>Zhiga, zhiga rbiche me lo miech, rie me zaatne choot guiend riezodiidznie me Pxoz me.

### **Biac tib zha ne gutoo xcuerp**

*(Mt. 9:1-8; Mr. 2:1-12)*

<sup>17</sup>Stib dzew, miech guizhiu ne ndxie lo Jesús noquiaadiag zho zhiwseed me. Nzian grë zha farisé, grë maistr ley, zha ne brieed dib nëz Galilé, dib nëz Judé, zha ne brieegaa Jerusalén, ye zho laa zho no lad co noquiaadiag zho grë mine rnee me.

<sup>18</sup>Laa grë miech co ndxie ga, zeene bdzin bla zha bgui, ney zho stib men bgui, zhoobse me lo yag, ib gacd së me sac dipse me gutoo. Gocladz zho nzëëbnie zho me len yu ne no Jesús ga, ndzinne zho me lo me. <sup>19</sup>Per ib gocd nded zho lad grë miech co. Nacne biepaque zho guic yu, pxal zho tiblë guic co, ga pteed zho men rzacne co dib yag ne zhoob me ga, bdzin me lo Jesús.

<sup>20</sup>Zeene gon Jesús ne nli dib zdoo zho rnalo zho me, me gunguiac men rzacne co, rëbcha me lo men co:

—Peet tsienied guic luu, niinagazh laa naa gun perdon grëse xtol luu.

<sup>21</sup>Zeene bin grë zha farisé co, grë maistr ley co sca rëb me, rneechaa zho gza zho: “¿Cho dzigo rzac mgui qui nac me? ¡Falt i gon noyun me lo Dios! ¡Tibaque men ne run perdon xtol miech, ni lëë men co nac Dios!”

<sup>22</sup>Bienga Jesús sca quianee zho, dzigo rëbcha me:

—¿Pe nacne rzac to laa naa quiayun falt? <sup>23-24</sup>Nli cholze zac guiab laa zho gun perdon xtol miech, per grieelod gunguiac zho zho. Golwi ganle laa naa gunguiac mgui rii, zeena gacnan to naa ne nac naa Mgui ne pxeel Dios, ible rap naa poder par gun naa miech perdon.

Dzigo bnee me lo men rzacne co, rëb me:

—¡Niinagazh guche i, bi yag ne zhoob luu i, zeen bzë!

<sup>25</sup>Zigne sca bnee me, laa mgui co bzoli, squi ndxie grë miech co laa me blis yag co, ine roolnie me Dios laa me zey. <sup>26</sup>Psilo zho grëse zho, roolnie zho Dios; lala rzee zdoo zho, lala rdzieb zho, rnee zho:

—¡Nadzesi, laa ne bdzian ncuane gard dzian ne!

### **Bredz Jesús Leví**

*(Mt. 9:9-13; Mr. 2:13-17)*

<sup>27</sup>Blozh ga, laa Jesús brieed ga. Ro nëz zieded me gon me tib men lë Leví, zobse men co lo mezh ne rietizh zho dimi ne razh lo zha Roma, sac me rtop

dimi co. Dzigo bredz Jesús me tsienal me zhits Jesús. <sup>28</sup>Biaanaque xmezh me ga, guso me ga, laa me zienal.

<sup>29</sup>Bded ga, güeynie me Jesús tib wagw lidz me. Grë zha ne run dziin co, ni grëragaa zha ne bdziñ ga, tipse brenie Jesús zho grë xpëëdsuel me.

<sup>30</sup>Blalaa zha farisé, ni zla maistr ley, rlëë zho gon zho sca zobnie Jesús grë zha co, bded ga rëbchaa zho lo xpëëdsuel me:

—iLëda i gon run to! ¿Pe nacne sca tipse rownie to grë zha ngoopdol co, grë zha beed ne nac recaudador ga?

<sup>31</sup>Dzigo rëbchaa Jesús lo zho:

—Nanle to ganle, zha ne run rmed, zaatne no zha rzacnë ga rquiin zho, ¿niacxe squiin zho zaatne no zha ne ndip ndaan? <sup>32</sup>Scaque naa nagon, zialguibd naa zha wen, sinque laa naa zialguib grë zha ngoopdol, zeena gbig zho lo Dios.

### ¿Pe nacne rcuand xpëëdsuel Jesús?

(Mt. 9:14-17; Mr. 2:18-22)

<sup>33</sup>Bdzinaque bla zha ne bnabdiidz, rëb zho lo Jesús:

—¿Pe nac waa ib rcuand xpëëdsuel luu, tibaque quiayow zho, tibaque quiaye zho? Zha xpëëdsuel Juan, zha xpëëdsuel farisé, rdzian no tibaque nocuan zho, tibaque nonab zho lo Dios.

<sup>34</sup>Pquiab Jesús rëb me lo zho:

—Zaatne nadien noyac tib guieltsieel, ¿niacxe znabey to ycuan grë zha ne ndxie lo lni, ni ran to laa mgui ne notsieelnia zo lo zho? <sup>35</sup>Per zdziñ dze zeene laa mgui co gbiche, ni zeene laa dze co gdziñ, dzigosi nagon riegual ycuan zho.

<sup>36</sup>Blozhse sca bnee me, rëbaque me lo zho:

—Zha ne rquiaabdie lar, tsod zha ne ctsiez xab cub cuee zho tib lë lar ne yquiaabdie zho tib xab gox zho. Sac tiba, znitlo zho xab cub zho ga, ni stiba rdzieeld yquia tib lë lar cub lad lar gox. <sup>37</sup>Scaque zha ne rgotsow vin, tsod zha ne cotsow vin cub tib len guid ne padzeelale noquiin, sac stiesz vin cuba; lozh ga zigttaa vina, zigttaa guid cow, laaw nitlo ga. <sup>38</sup>Gacxe waa, tel vin cuba none len tib guid cubaque tsotsowa.

<sup>39</sup>Nac cuent rii zig rzac miech vin, zha ne bienle rie vin ne padzeelale notsow, rdziladzd zho guie zho vin cub; sac biaanle guic zho rnee miech: “Vin ne padzeela notsow, min co nizhraa rdioow.”

### Dze ne rdziiladz zha Israel lo dziin

(Mt. 12:1-8; Mr. 2:23-38)

**6** Tib vuel, lëetse dze ne rdziiladz zho lo dziina, bded Jesús zaatne zëëb zhobxtil grë xpëëdsuel me; psilo zho pchoo zho mzion zhobxtil co, zigse runmbe zho zhob co, scase row zhow. <sup>2</sup>Gon blalaa zha farisé sca no zho, dzigo rëbchaa zho:

—iLëda i gon noyun to! Golguien ganle dze nda nac dze rii.

<sup>3</sup>Pquiab Jesús rëb me lo zho:



—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? <sup>4</sup>Rneew, bzëëb me len yadoo güeynab me grë quietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row quietxtil co.

<sup>5</sup>Ni rëb me lo zho:

—Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

### **Biac tib mgui ne mband tib nia**

*(Mt. 12:9-14; Mr. 3:1-6)*

<sup>6</sup>Goł stib dze ne rdziiladz zho lo dziin, güey Jesús len yadoo win ne zob lad guiedz co, psilo me noseed me miech. Lad grë miech ne no len yadoo ga, no tib mgui, mband nia derech me. <sup>7</sup>Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo min co yquiaaqui zho tsiezo zho me lo zhiwxtis zho.

<sup>8</sup>Bien Jesús sca no guic zho, dzigo bredz me mgui co, bnabey me bzo mgui groltaa lo grë zha ne ndxie ga; <sup>9</sup>blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuane yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

<sup>10</sup>Dze rwi me lo zho tib tib zho, dzigo rëbchaa me lo mgui co:

—¿Bzigaa nia luu!

Zigne bzigaa mgui co nia mgui, laaw biac.

<sup>11</sup>Zeene gon zho sca beenguiac me nia mgui, per nli rlëë zho, psilo zho quianediidz zho dien zha gun zho me.

### **Bzo Jesús zha ne tsienee xtiidz me**

*(Mt. 4:23-25; 10:1-4; Mr. 3:13-19)*

<sup>12</sup>Tib vuelt, güey Jesús tib guic gui, dipse guieel blëz me ga bzodiidznie me Dios. <sup>13</sup>Biini liu co, bredz me grëse zha ne nac xpëëdsuel me, dzigo lad co ble me tsiipchop zho, zha ne tsiepaa tsienee xtiidz me lo miech. <sup>14-16</sup>Znu lë gza tsiipchop zha co:

Simón (zha ne bleelë me Pedr),

Ndrés (bets Pedr),

Juan,

Jacob,

Lip,

Bartol,

Matew,

Mazh,

Jacob (xingan Alfé),

Simón (zha ne no lad grë zha ne racladz cuee wxtis Roma Israel),

Judas (bets Jacob),  
ni Judas Iscariot (zha ne güeyto me).

<sup>17</sup>Cho gui co biet me grë xpëëdsuel me, bdziñ zho tib ro lets. Loxaque bdziñ zho ga, laa stib dzoon xpëëdsuel me bdziñaque lo me ga; zhiits co naļ stib dzoon miech, no zho racladz yquiaadiag zhiwseed me, nogaa zho zie ga par gunguiac me zho. Miech guizhiuw, zha ne ziaad nëz Judé, zha ne ziaad nëz Tiro, zha ne ziaad nëz Sidón, zha ne brieegaa Jerusalén.

<sup>18</sup>Nzian grë zha co nosacsi mendox, grëse zho beenguiac me zho. <sup>19</sup>Rbig be grë miech co racladz zho xen zho lad xab me, sac ran zho, zha ne rzhen lad xab me, tel pe guielguiidztaa rzac zho, runguiac me zho por grëtaa poder ne rap me.

### Cho nac zha ne wen zie

(Mt. 5:1-12, 38-48; 7:1-5, 12)

<sup>20</sup>Dzigo dze bui Jesús lo grëse zha ne nac xpëëdsuel me, rëb me lo zho:  
—iWen zie zha ne rien none gbig zho lo Dios, sac ib zdziñ zho zaatne rnabey me!

<sup>21</sup>iWen zie zho! Sac niicle telne noyan zho gbin, per me gdeed ncuaañe yquiiñ zho; niicle tel no hor mban rac zho roon zho; per zdziñ dze ne gdeed me tib guielbley nroob lo zho.

<sup>22</sup>Zig nac to, zeene csilo miech glëënie zho to, guncxoon zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnëz Mgui ne pxeel Dios nu, iwen zie to ga! <sup>23</sup>iNley golco zdoo to dze co, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been pxozgol zho grë zha ne pxeel me padzeela biadnee xtiidz me.

<sup>24</sup>Sangue grë zha ne rzac grëse ncuaañe rquiiñ zho quianie zho, ib rquiind zho gbig zho lo Dios, iprobsaxe zho, sac lo guidzliu riise gac ncuaañ co guielbley lo zho!

<sup>25</sup>iProbsaxe zho, sac niicle ne grëw quianie zho niina, per zdziñ dze gan zho ganle zha nac gbin; rlozhd gzhidz zho, rlozhd gley zho niina, per zdziñ dze laa zho gan ganle zha nac guielnë!

<sup>26</sup>Padzeela, biaad bla zha ne pquidie rëb zho Dios pxeel zho, bio pxozgol to bleynie zho zho, iprobsaxe to telne yguib to sca gleynie miech to!

<sup>27</sup>Golquiaadiaga ganle: Zha ne rlëë lo to, golleynie zho, tel pe nac xliaadz zho golgacnie zho. <sup>28</sup>Zeene rdzibdee zho to, gonnab lo Dios gunlay me zho; zeene rsacsigaa zho to, gonnab lo Dios yquia zdoo me zho. <sup>29</sup>Tel gneedz zho tib puñet lo to, gzoobd nia to, golsaan zho maase yquiaa zho stiba.

Zha ne gla xabnal to, golsaan maase ye biaagw güey zho. <sup>30</sup>Zha ne gnabtaa pe cos lo to, goldeeda; tel scasegaa xen zhow, ib gnabde tow lo zho. <sup>31</sup>None zaacse gac to lo miech, zeena scagaa zha, zaacse gac zho lo to.

<sup>32</sup>Sac gon, tel loxaque zha ne ndzieeldiidz to, zha cose rleynie to, led ncuaañ nroobd ga run to! Haxta grë zha ntseeb run min co. <sup>33-34</sup>Tel loxaque zha ne

runsegaa favor lo to, lo zha cosegue run to favor; zeene runгаа to tib pexxad, lo zha ne rgobeyse to zguizh lo to, lo zha cose runxtad to, jni lalnu peet nond ncuaaane run to ga! Sac gon haxta grē zha ntseeb run min co.

<sup>35</sup> Golguien sca, none gleynie to zha ne rlē lo to, none gacnie to zho lo xliaadz zho. Zha ne guiaad tib pexxad lo to, goldeed ncuaaane rnab zho, ib guiabde to nend lega scase gun to favor co lo zho. Zha ne gun grē min rii, nroob guielnzaac ne gdeed Dios lo zho, ni ga glu zho ganle nli xpēed me nac zho; sac gon tel me wen me lo grēse miech, niicle zha ne run falt lo mew, niicle zha ne riend gdeed xquizh lo mew, rsaand me zho. <sup>36</sup> Ndzinli sca golgac, zigne sca wen PxoZ to lo grēse miech, scaque none wen gac to lo zho.

<sup>37</sup> Ib gunde to nē gac zdoo to, zeene ran to ncuaaane nonguield ne run stib miech, sac to tozhal gunquizh zhow; zeena scagaa Dios gunscaad me to. Golguien none gun to samiech to perdon, zeena scagaa Dios zun me to perdon; <sup>38</sup> sac grēse ncuaaane run miech, mincoque rcaania zho. Grēse ncuaaane gun to, scaania tow, ni haxta ndziibraa mine ycaania to. Sac ncuaaane gun to lo samiech to, mincoque gun Dios to.

<sup>39</sup> Blozh sca bnee me, dzigo rēbcha me:

—Golwi ganle, zig nac zha ne rold lo, jniacxe zrieelo glu zho nēz lo stib zha ne rold lo? Zha ne sca gun, tel griel ni tib zho zaatne nac tib ro blē, ib tedsod grop xcuaa zho tsietsobe ga.

<sup>40</sup> Grē zha ne nac mēēdsuel, tsod zha ne racraa lo zha ne noseed zho; haxta csiaaJraa zho zhiwseed zho, ni telne tsoxco zhow, zdzin zho medid co.

<sup>41</sup> jLēda ga gon tso to lozhd gzee zdoo to dien cho pe run, ni nenda mazdraa mine run to! <sup>42</sup> jPe ro to glisqui to mine run stib zho, ni tel mazdraa nac mine run to? jGolguien sca glude to ncuaaane nacle to! jGlo goltsoxco ndzinli gac to, dzigo lozh ga zac tsienee to zha gacndzinli stib zho!

### Nex rlu zha nac tib tib yag

(Mt. 7:17-20, 24-27; 12:34-35)

<sup>43</sup> Tib tib yag rdeedsew xnexa. Grielod yquia nex ncuaaan tib lo yag ne rdeed nex wen; grielodгаа yquia nex wen tib lo yag me rquia nex ncuaaan. <sup>44</sup> Tel zha nac nex ne rquia lo yag, gase rlu zha nac yag. Tsod yag guiets ne yquia guigw lo; ni tsodгаа lbē zarz ne gdeed uv. <sup>45</sup> Scadaa nagon nac miech, zha ne wena, ncuaaan wen run zho, diidz wen rnee zho, sac desde zdoo zho no guielwen co; laa zha ne ntseeb, niapse ncuaaane ntseeb run zho, niapse diidz dox rnee zho, sac desde zdoo zho no guielntseeb co. Gacxe waa, tel zha rzē xtiidz tib miech, gase rlu zha nac zdoo zho.

<sup>46</sup> Grielod lega gnee to, naa rnabey to, sac zha ne rneew ib none gun zho mine rnabey naa. Nzian zha ne rnee, naa rnabey zho, ni rund zho mine rne naa.

<sup>47</sup> Zha ne rquiaadiag mine rne naa, ni rioxco zho rban zhow zigne naca, <sup>48</sup> rrieequia nac zho ga zig tib zha ndzielguic ne quiet blee xcimient lidz, psilo zhow haxta zaatne bgaa lo quie. Niicle riab guie dox, peet racd lidz zho, nis naal ne raclo rded zaatne zoba ga, per rbixcheda. <sup>49</sup> Laa zha ne rquiaadiag xtidz

naa, ni rioxcod zho gban zhow, ziaad gac zho zig tib zha nxen ne güeyzoob lidz laglaase lo liu. Znuse bñitlo lidz zho, sac zeene biab guie dox, lo nis naal ne goclo bded zaatne zoba, znuse bixchew, ni stib lëw biaand.

### Biac tib zha ne rquia dziin tib lo menguiib

(Mt. 8:5-13)

**7** Zeene blozh bnee Jesús lo grë miech co, dzigo laa me wbi ga, bdziñ me Capernaum. <sup>2</sup>Lëëtaque len dze co rzacnë tib zha ne run dziin lo tib men ne rnabey lo xmenguiib zha Roma, no guiedz co; nzhoo rac zho zootle laa zho guetle. Rleyniedox men co zho, <sup>3</sup>zigne bin me laa Jesús bdziñ, lëëläd pxeel me bla zha ne nac zha non lo menguiiedz Israel, güey zho güeynee zho lo Jesús siguiel Jesús tsiegunguiac Jesús zhingundziin me. <sup>4</sup>Bdziñ zho bnab zho lo Jesús siguiel me tsie me.

—Bzhiguiel been xyudar me —rëb zho—. Tib zha wen nac me, <sup>5</sup>rleynie me menladz ne, haxta bzaa me tib xyadoo no lad guiedz nu.

<sup>6</sup>Dzigo zienal Jesús zhits zho. Zhile gdziñ zho lidz men rnabey co, zeene bdzieelo zho bla zha ne ndzieeldiidz me, zienie tib xtiidz me lo Jesús. Rzë xtiidz me, rëb me: “Bzhiguiel mazd guiaate luu. Naraa rien naa choot nacd naa, par csodziin naa lo luu guiaad luu haxta ro lidz naa. <sup>7</sup>Nligaa rien naa tib zha winse nac naa par gbig naa lo luu, gane niicle biald naa nialdziej naa luu. Nanpaa naa, zaatne ziaad luu i, con tib lan xtiidz luu zac gnabey luu guiac zhingundziin naa. <sup>8</sup>Sca rnee naa, sac tel naa no zha ne rnabey lo naa, zeene rnabey zho naa none gon naa mine rnee zho; scaque zhaguiib ne rnabey naa, zeene rne naa tib lo zho: ‘Güey nu’, rie zho; zeene rnegaa naa: ‘Dë nu’, riaad zho; zha ne nacgaa zhingundziin naaw, mine rnabeytaa naa zho, run zhow.”

<sup>9</sup>Zeene bin Jesús sca rzë xtiidz men co, bzee zdoo me, ptsire lo me, rëb me lo grë zha ne zienal zhits me:

—Golwi ganle pa lotaa rnalo men qui Dios. Lo grë zha Israel gon, ni tib zho gard gan naa squitaa dib zdoo gnalo Dios.

<sup>10</sup>Grë zha ne güey mandad ga, zeene bdziñ zho gon zho laa ngundziin co biacle.

### Rrieban xpëed tib wnaa viud

<sup>11</sup>Bded ga, güey Jesús tib guiedz lë Naín grë xpëëdsuel me, miech guizhiu ne zienal zhits zho.

<sup>12</sup>Zeene bdziñ zho gax ro guiedz co, lëëtaque bdzieelo zho tib dzoon miech ziequeets xpëed tib wnaa viud; lëëse mëed ga lo wnaa co. <sup>13</sup>Gon Jesús zha rac me, pquia zdoo Jesús me, wbig Jesús rëb Jesús lo me:

—¡Goondraa luu!

<sup>14</sup>Dzigo bzhen Jesús yag ne zhoob ngutoo co. Zeene gon gza zha ne nxobyan yag cow, hor co bzodze zho; dzigo bnee me lo mëed co rëb me:

—Xin, ¡guche i!

<sup>15</sup>Hor cogazha brieban niib co, bzobli niib, laa niib psilo bnee.

Rley xniaa niib, pcaania me niib.

<sup>16</sup>Zeene gon grë miech co sca brieaban mëed co, lala rdzieb zho, lala rdeed zho xquizh lo Dios, rnee zho:

—¡Tib men nroob ne gon ziadteed xtiidz Dios i, ziaad lo ne! ¡Laa ne bdzian niina ganle, laa Dios ziaadgan ne, ziadbee me ne lo xquieInë ne!

<sup>17</sup>Gdipse nëz Judé, ni grëraa guiedz ne ndxie dib gax ga, gocnan miech milagr nroob ne been Jesús ga.

### Zha ne pxeel Juan Bautist

(Mt. 11:2-19)

<sup>18</sup>Bin Juan Bautist grëtaa milagr ne run Jesús ga, sac rie xpëedscuel Juan riezodiidz zhow lo Juan. Dzigo pxeel Juan chop zho, <sup>19</sup>zienabdiidz lo Jesús, dien pe me nac Men ne nole diidz ga cxeel Dios, te dzigora gdzin men co ye.

<sup>20</sup>Bdzin zho lo Jesús, wbig zho lo me, rëb zho:

—Laa Juan pxeel no ziaadnabdiidz no lo luu, dien pe lëele Men ne nacle diidz ga cxeel Dios i nac luu, te naraa guiaad me ye.

<sup>21</sup>Lëëtaque ndal miech ndxie lo me ga, quiauyunguiac me grë men rzacnë. Nzian zho, tel pe guielguiidztaa rzac zho, no zho nosacsi mendox, no zho rold lo, grëse zho runguiac me zho. <sup>22</sup>Dzigo rëbcha me lo zha ne pxeel Juan ga:

—Grëse mine bin to rne naa, grëgaa ncuane gon to quiauyun naa, goltsie golzodiidza lo Juan. Ran to ganle, grë zha ne rold lo, zha ne në ni, zha ne rlan guiedz lepr, zha ne rcuaat, grëse zho laa zho riac, haxta grë mengut, rrieaban. Grësew golzodiidza lo me, golguiab lo me ganle blactaa zha ne rquiin gbig lo Dios, laa zho noquiaadiag xtiidz Dios; <sup>23</sup>ni golguiab lo me: dichos zha ne tiblrique rililadz cho nac naa.

<sup>24</sup>Zeene laa xpëedscuel Juan zey, dzigo psilo me bzeet me Juan lo grë miech guizhiu ne ndxie ga, rëb me lo zho:

—Zeene dien güey to dan ngan ne bio Juan ga, ¿zha güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, <sup>25</sup>te rëb to ye masaque grë lar niazh ne racw zha non nacw me? Per nanle to ganle, zha ne scataa racwxab, len grë yu ne rzob zha rnabey, ga rio zho. <sup>26</sup>Nligaa cho güeynie guic to nac me, ¿te rëb to ye tib men ne noteed xtiidz Diosa?

‘Gacnan to ganle, tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. <sup>27</sup>Me ga raquiet lo Xtiidz Dios, zaatne znu rnee: “Sxel naa tib zha ne tednerga lo luu, zha co gzhixcuua nëz ne ted luu.” <sup>28</sup>Ne nligaa lo grëse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

<sup>29</sup>Len dze ne nochoobnis Juan miech ga, ndal zha ne bin zhiwseed me, haxta grë zha ne rtop dimi ne razh lo zha Roma, bien zho nonguiela gun zho mine rnabey Dios, güey zho pchoobnis Juan zho. <sup>30</sup>Sangue grë maistr ley ni grë zha farisé, pe liaadz zho nion zho mine rnabey Dios, ib güeyd zho nchoobnis Juan zho.

<sup>31</sup> Blozhse sca bnee me, rëbchaa me:

—Nac grë miech rii, ib riend zho pepaa racladz zho. ¿Cho ganle run zigne run zho? <sup>32</sup> Lëë zho run mine run grë mëédlas ne rio wguit dib ro nëz. Niicle rool xcompañer win di nguieel, rieved win; niicle roolga zho di ngan, roond win. <sup>33</sup> Sac gon, ziaad Juan, ran zho rowd me grë ncuaañe nac xquielwagw zho, niicle vina ried mew; dzigo rnee zho mendox nacie me. <sup>34</sup> Blozh ga, ziaad Mgui ne pxeel Dios, ran zho row me, rie me, laa zho rneeque lega rowcho me, lega riecho me vin; ib riend me cho rtsieelsa me, haxta grë zha yozh ne rtop dimi ne razh lo zha Roma, haxta grë zha ngoopdol rzënie me. <sup>35</sup> Sca rnee zho, sangue zha ne rga gueilbiini ne rdeed Dios, riend zho cho nac zha ne ziaadgun xtsiin me.

### Güey Jesús lidz tib zha farisé

<sup>36</sup> Tib dze bredz tib zha farisé Jesús güey me tib wagw lidz zho. Bdzin me, bded me bzob me lo mezh.

<sup>37</sup> Lad guiedz co no tib wnaa ro nëz, bin me laa Jesús bdzin lidz zha farisé co, dzigo bi me tib bot nceit nex, tiblo nceit niazha, brie me zie me nëz lidz zha co. <sup>38</sup> Bdzin me ga, wbig me zaatne zob Jesús, psilo me roon me. Zigse roon me, lëëque nis ne riet lo me ga, bdiib me ni Jesús, ni pcuiidz mew con guits guic me. Dzigo ptsieelro mew, blozhse ga blee me nceit co bdëëb mew.

<sup>39</sup> Zeene gon zha farisé co sca been wnaa co, bza zdoo zho rëb zho: “Telne niaca mine nli men ne ziadteed xtiidz Dios nac men qui, nien me ganle tib wnaa ngoopdol i, ndeete me diidz squitaa nguëëbnia zho zhits ni me.”

<sup>40-41</sup> Dzigo bnee Jesús lo zha farisé co yquiaadiag zho chop lan xtiidz me, rëb me:

—Pquiaadiaga ganle Simón: Chop mgui name, quia zho guielqui lo men ne blediin dimi lo zho. Tib zho zëëb gaay mil pes plat, stib zho zëëb gaay gayoow. <sup>42</sup> Gonse men co ni tib zho rdziel zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnë nasca dien, lo grop zha co, ¿cho mazdraa sac zdoo mine been men co?

<sup>43</sup> Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo mine been me.

—Scaw gon —rëb Jesús—. <sup>44</sup> ¡Mincopaa nagon squi rac wnaa prob qui! Gon ganle zeene bzëëb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuiidz mew con guits guic me. <sup>45</sup> Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiatsieelro me ni naa. <sup>46</sup> Nac costumbr none nchoob luu nceit guic naa, per beend luuw; mazd mele gon biaad biadtëëb me nceit nex rii zhits ni naa. <sup>47</sup> Laa me noyun min rii, sacne nlipaa rzac zdoo me ben naa me perdon grëtaa dol dox ne nzëëb me. Zigne rneeque ne ga, tel zha ne zhis xtoja, zhi rzac zdoo zho zeene laa zho rac perdon.

<sup>48</sup>Dzigo bnee Jesús lo wnaa co, rëb Jesús peet tsienied guic me, laa Jesús beenle perdon grëse xtol me. <sup>49</sup>Zha ne zobgza Jesús lo mezh ga, zeene gon zho sca rëb Jesús psilo zho r nabdiidzlsa zho, rnee zho:

—¿Cho dzigo rzac mgui qui nac me? ¿Zha nacne guiab me laa me been perdon xtol wnaa qui?

<sup>50</sup>Hor co biire Jesús bnee me lo wnaa co, rëb me:

—Laa naa psilaa luu lo xtol luu, sac dib zdoo luu bnalo luu naa. Bzë naa, peet tsieniedraa guic luu.

### Güeyseed Jesús miech dipse Galilé

**8** Bded ga, brieë Jesús grë xpëëdsuel me güey me grëraa guiedz ne ndxie nëz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

<sup>2-3</sup>Ye blalaa men wnaa güeynal zhits zho, tel pe ncuane quianie grë men wnaa co, rdeed zhow run zho xyudar me; sac rzac zdoo zho beenguiac me zho. No zho beenguiac me lo guielguidz, nogaa zho benxoon me mendox ne nosacsi zho. Ga güeynal tib wnaa lë Marí Magdal (lëë wnaa co benxoon Jesús gadz mendox ne nosacsi me), ga güeynal stib men lë Zhuan (lëë tsiel Chuz ga, men ne quianap grë lo xtsiin rey Herod) ni stib men lë Susan.

### Nac Xtiidz Dios zig zhubxtil

(Mt. 13:1-23; Mr. 4:1-20)

<sup>4</sup>Tib dzew, miech guizhiu ne pcaalsa lo Jesús; nzian guiedz ne brieë zho bdziñ zho lo me. Laa me noseed zho, zeene bzodiidz me tib cuent rii lo zho, rëb me:

<sup>5</sup>—Tib mgui name, brieë zho güey zho gon zhubxtil. Zeene laa zho quialaal zhub co liu, now bliaal gax ro nëz, now bliaal lad quie, nogaaw bliaal len yag guiets. Mine bliaal ro nëz ga, zha ne bded bzëni zhow, blozh ga güeyaue grë mguin dow maw. <sup>6</sup>Mine bliaal zaatne nac lad quie, blana per znuse bidza sac guiend gop ga. <sup>7</sup>Mine bliaal len yag guiets co, zigne blana blanaue stib dzoon yag guiets, znuse bnitlo yag guietsa. <sup>8</sup>Sangue mine bliaal zaatne nac niapse lo liu, blana, brooba, ndzon goca, tib tib zhub ne biab liu ga now goc haxta tib gayoo zhub.

Blozhse bzodiidz me cuent co, nguiedz bnee me lo zho rëb me:

—¿Zha ne racladz guien mine rne naa, yquiaadiag zhow!

<sup>9</sup>Dzigo wbig grë zha ne nac xpëëdsuel me, bnabdiidz zho lo me dien zha nac cuent co. <sup>10</sup>Rëbchaa me lo zho:

—Tel to, Dioszhal rlu lo to ganle zha rnabey me, niicle ncuane mazdraa ngeetsa; sangue grëraa zha ne squi gard gbig lo me, niapse con cuent rzodiidz naaw lo zho, parne guien zhow; per niicle scaw, ib rzoobdiagd zhow, ib rioguicd zho zha naca.

<sup>11</sup>Znu gon nac cuent co: Zhubxtil co nac Xtiidz Dios. <sup>12</sup>Ro nëz ne sca bliaal zhub co, ga rlu ganle zha rzac zha ne rquiaadiag Xtiidz Dios, per znusaue rdziñ mendox rquuil ma zho gliladzd zhow, zeena laad zho lo dol. <sup>13</sup>Lad quie

ne bliaal spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli riladz zhow palal dze, per zeene ran zho zha run miech zho, zha rnee miech lo zho, rsaanga zhow. <sup>14</sup>Nogaa zho nac zig len yag guiets co. Rquiaadiag zho Xtiidz Dios, per laa ne tsoniew guic zho, lel rsilo zho grë zhgab ne dien zha gapchen cho, dien zha gdeedguxt xcuerp zho lo guidzliu rii, min co ronie guic zho; pa së zho gban zigne rnabey Dios. <sup>15</sup>Laa lo liu naal co, ga rlu ganle zha rzac zha ne nguudz zdoo. Zeene rquiaadiag zho Xtiidz Dios, dib zdoo zho rcaania zhow, dib zdoo zho riladz zhow. Grëse ncuaañe run zho, ndzinli rrieequiaw; sac tiblrique rac zho.

### Xcuent biini

(Mt. 12:46-50; Mr. 3:31-35; 4:21-25)

<sup>16</sup>Blozh ga, bnee me lo grë miech ne ndxie ga, rëb me lo zho:

—Tsod zha ne yquiaagui tib biini, lozh ga ctoos zho pe cos low, gzolangaa zhow tib zhan lon. Sac biini ne rquia, glaa rzoba par gziiniw len yu, zeena guiab biini lo grëse zha ne sëëb len yu. <sup>17</sup>Scaque nagon, grë ncuaañe rac ngeets, grë ncuaañe rnee miech zhliaan, none xoobnëna.

<sup>18</sup>Wen wen golquiaadiag mine rne naa, ni goltsoxcow. Sac zha ne tsoxcow, zdedraa Dios guielbiini lo zho; sangue zha ne tsoxcoda, haxta tel palalse guielbiini ne rzac zho quianie zho, stiche mew.

<sup>19</sup>Dze co, scaque noseed me miech, zeene bdzin xniaa me ni zha bets me zigan zho me. Per brieelod ndzin zho haxta lo me, sac miech guizhiu ne ndxie lo me ga. <sup>20</sup>Dzigo rëb tib zho lo me:

—Laa xniaa luu gon, ni zha bets luu bdzin ley ziaadguib zho luu.

<sup>21</sup>Pquiab me rëb me:

—¿Xnia naa ye, bets naa ye? Grëse zha ne gon rquiaadiag Xtiidz Dios ni rioxco zho mban zhow, lëë zha co nac xniaa naa, zha co nac bets naa, zha co nac bzian naa.

### Pcuëëz Jesús tib me dox

(Mt. 8:23-27; Mr. 4:35-41)

<sup>22</sup>Tib bdze dze, bzëëbnie Jesús xpëëdsuel me tib len barcw, rëb me lo zho, tedquia zho stib nëz ro nis co.

<sup>23</sup>Laa zho zie lo nis co zeene laa me gootguies. Tibaque zeene psilo brie tib me dox, masaque riasoli lo nis co, zootle laa barcw ne no zho ga yguitsle len nis. <sup>24</sup>Zeene gon zho scataa ntseeb rac lo nis co, lëëlëd güey zho güeycuaan zho me.

—¡Maestro! —rëb zho—. ¡Blee mcaallo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co. <sup>25</sup>Dzigo rëbchaa me lo zho:

—¿Pe nacne rdzieb to? ¿Niacxe riladzde to Dios dib zdoo to?



Ne nligaa rdzieb zho, ni lala rzee zdoo zho, rnabdiidzlsa zho rnee zho:  
—¿Bay cho nac me? ¿Zha nacne haxta me, haxta nis ron xtiidz me?

### Men Gadar ne nosacsi mendox

(Mt. 8:28-34; Mr. 5:1-20)

<sup>26</sup>Bdziñ zho stib nêz ro nis co, ga nac xtan zha Gadar. Zo zho ga, nêz dan squi riaan xtan zha Galilé. <sup>27</sup>Laa Jesús biedz leñ barcw, zeene laa tib mgui ne no nêz co bdziñ lo me. Mban rlu mgui co nosacsi mendox me, niicle xab me nacwdraa me; ib rbêzd me lidz me, niapse grê leñ xpaan ngutoo rio me. <sup>28</sup>Zeene gon me Jesús, masaque roptsie me bdziñ me pquiitsgzhìb me lo Jesús, zêeb tsi me rnee me:

—¡Psaan naa Jesús! Nanpaa naa gon Xpêed Dios nroob ne zob gbaa nac luu. ¡Bzhiguiel csacsid luu naa!

<sup>29</sup>Per mendox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie mendox co me rquianzê me grê dan ngan, zaatne choot miech guiend.

<sup>30</sup>Dzigo bnabdiidz Jesús lo ma dien cho lê ma. Pquiab ma rêb ma:  
—Legion lê no.

Sca rêb ma sac nzian nac ma no ma zdoo mgui co. <sup>31</sup>Ni bnaab ma lo Jesús gzonêzd me ma lo ncowdoo ne nora ma ne nacgrê ma. <sup>32</sup>Gaxaque ga ndxie tib dzoon nguts notop lag, bnaab ma gdeed me diidzbey lose grê nguts co gdziñ ma. Dzigo bdeed me diidz.

<sup>33</sup>Hor co laa grê mendox co psaan mgui co, güeysêeb ma zdoo grê nguts co. Psilo grê nguts co rquiaa ma corr, güeypix ma tib ro yee dox ne quia ro nis co, bliaa ma haxta lo nis; grêse ma gut.

<sup>34</sup>Grê zha ne quianap nguts co, bzhoon zho, rias zho güeyzodiidz zhow lad guiedz, ni grêraa yu ne zob gax ga. <sup>35</sup>Nacne brie grê miech co ziewi zho. Zeene bdziñ zho, per nli bdzieb zho gon zha laa men co zob gax lo Jesús, laa me nacwxable, rlu niinile nac guic me. <sup>36</sup>Psilo grê zha ne gon zha biac me rzodiidz zhow lo grê zha ne bdziñ ga. <sup>37</sup>Mazdraa bdzieb grê miech co bin zhow, dzigo mazd bnaab zho lo Jesús siguiel me gbi me xtan zho.

<sup>38</sup>Zeene laa Jesús zie sêeb me leñ barcw par gbi me ga, dzigo wbig mgui co rnab me lo Jesús siguiel Jesús tsienal me zhits Jesús; per bzhiguield Jesús nienal me, rêb Jesús lo me:

<sup>39</sup>—¡Biaan! Güey, güeyzodiidz lo grê menlidz luu ganle zha nactaa milagr ne been Dios beenguiac me luu.

Dzigo wbire men co. Güey me lad guiedz, grêse lo miech güeyzodiidz me zha nactaa guieinzaac ne been Jesús ga, beenguiac Jesús me.

### Brieëban tib xpëdwanaa tib men̄ lë Jair

(Mt. 9:18-26; Mr. 5:21-43)

<sup>40</sup>Zeene laa Jesús biire bdziñ stib nëz ro nis co, miech guizhiu ne quiambëz me ga, rley zho gon̄ zho laa me bdziñ. <sup>41</sup>Loxaque bdziñ me, laa tib men̄ ne rnabey yadoo lë Jair wbigle pquitsgzhib lo me. Rnab Jair siguiel̄ me tsienal̄ me lidz Jair tsiegunguiac me tib xpëdwanaa win Jair.

<sup>42</sup>Nzhoo rac mëed co, tib mëed tsiipchop iza, ni lëese mëed ga lo me.

Dzigo laa Jesús zie nëz lidz men̄ co. Miech guizhiu ne zienal̄ zhits me, haxta rtaagw zho me. <sup>43</sup>Lad grë miech co zienal̄ tib wnaa rzacnë, gogle tsiipchop iz rlan me tib guiel̄guidz, rzac me zigne rzac grë men̄ wnaa gzob mëë; tibaque rlan mew ib rbëzda. Grële ncuane rap me bloozh me lo grë men̄ ne run̄ rmed, per ni tib zho run̄guiacd me. <sup>44</sup>Laa me no lad co, tibaque wbig gax me nëz zhits Jesús, bzhen̄ me ni lar ne mbix Jesús; hor cogazha laa me biac. <sup>45</sup>Bien̄ Jesús sca bzhen̄ wnaa co lad xab me, dzigo rëbchaa me:

—¿Cho ga bzhen̄ lad xab naa?

Grëse zho rnee led zhada. Dzigo rëbchaa Pedr lo me:

—Maestro, wi gan̄le zha ndaagwtaa ziaad luu lad grë miech rii, haxta rcheep zho luu, ¿zha nan̄ luu choot xen̄d lad xab luu?

<sup>46</sup>—Per no cho bzhen̄ lad xab naa —rnee me—, sac bien̄paa naa beenguiac naa zho.

<sup>47</sup>Zeene gon̄ wnaa co bien̄ Jesús sca bzhen̄ me lad xab me, rdzieb me laa me wbig pquitsgzhib me lo Jesús. Squi ndxie grë miech co, bzodiidz me zha nacne sca been̄ me, ni zha zigne bzhen̄ me lad xab Jesús laa me biac. <sup>48</sup>Dzigo rëbchaa Jesús lo me:

—Xin, laa luu biac sacne dib zdoo luu bnalo luu naa. Bzë na, peet tsieniedraa guic luu.

<sup>49</sup>Laa Jesús bii quianeeque lo wnaa co, zeene laa tib zha ne nac mandad ziaad nëz lidz Jair bdziñ, rëb zho lo Jair:

—Csodziindraa luu lo men̄ qui, laa xpëed luu gutle.

<sup>50</sup>Zeene gon̄ Jesús sca rëb zha co, rëbchaa me lo Jair:

—Peet tsienied guic luu. Dib zdoo luu bnalo Dios, zeena peet gacd xpëed luu.

<sup>51</sup>Bdziñ zho lidz Jair, psaandraa Jesús nal̄ grë miech co zhits me ndziñ zho zaatne nix mëed co. Loxaque Pedr, Jacob, ni Juan, pxoz win ni xniaa win bzëëbnie me len̄ yu ne nix win. <sup>52</sup>Grë miech ne ndxie ga, roon zho no zho xquiel̄në win; dzigo rëbchaa Jesús lo zho:

—Goonde to; sac gon̄ nixguiesse mëedwin rii, gute win.

<sup>53</sup>Psilo zho lel̄ rhidznie zho me, sac nan̄paa zho gutle win. <sup>54</sup>Dzigo wbig me, bzhen̄ me nia win, nguiedz bnee me lo win, rëb me:

—¡Guche i na, ndzooop yeen̄!

<sup>55</sup>Zigne sca bnee me, laa mëed co brieëban, laa win guche ga; dzigo bnabey me bguiaan̄ zho win.

<sup>56</sup>Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo gzo diidz me zha brieaban win.

### **Pxeeł Jesús xpëdscuel me güeyseed zho miech**

(Mt. 10:5-15; 14:1-12; Mr. 6:7-29)

**9** <sup>1-2</sup>Tib dze bredz Jesús gza tsiipchop xpëdscuel me, pxeeł me zho tsienee zho lo miech gacnan zho zha racladz Dios gban zho; bdeed me poder lo zho guncxoon zho grë mendox ne nosacsi miech, ni gunguiac zho grë men rzacnë.

<sup>3</sup>—Goltsie —rëb me lo zho—. Per ib güeyde to ncuane yquii to nëz. Zig nac dimi, zig nac ncuane gow to, pe bziuud, pe baxtongaa, güeyde tow; xab tow, mine nacwse to mincose goltsienie. <sup>4</sup>Guiedz ne gdziñ to, zha ne gneedz zaatne cuëz to, lidz zha co golcuëz, haxta gdziñ dze ne gbi to guiedz co. <sup>5</sup>Per telne gdziñ to tib guiedz, nëd miech yquiaadiag zho mine zienee to, dzigo gollit grë yudie co ni to, golrieegazh ga, zeena guien zho ganle dol ga been zho lo Dios, nëd zho ycaania zho xtiidz me.

<sup>6</sup>Dzigo laa zho brieë, laa zho zie. Grëse guiedz ne ndxie dib gax ga, güey zho güeynee zho Xtiidz Dios lo miech, ni beenguiac zho grë men rzacnë.

<sup>7</sup>Bin rey Herod rzeet zho Jesús, sac tel pa lotaaw zëëb diidz grëtaa milagr ne run me. Grë miech co, no zho rzac Juan Bautist ga brieëban, lëë me ga nac Jesús; <sup>8</sup>nogaa zho rnee bod Líw, men ne biadteed xtiidz Dios padzeela, me ziaad stib; zzhisgaa zho rnee no cho stib men biadteed xtiidz Dios padzeelaw, sinque brieëban me gane ziaad me stib.

<sup>9</sup>Zeene ron Herod rnee grë miech co lëë Juan ga, rio me zhgab, rnee me: —¿Bay cho nac men co? Per gacda Juan; naazhal name bnabey pchug zho yan Juan.

Racladz Herod tebaa zha gan me Jesús.

### **Bguiaan Jesús gaay mil miech**

(Mt. 14:13-21; Mr. 6:30-44; Jn. 6:1-14)

<sup>10</sup>Goc bla dzew, laa grë zha ne pxeeł Jesús ga wbire bdziñ lo me. Blozhse bzodiidz zho lo me grëse tel zha güey zho, dzigo güeynie me zho tib lugar riaan gax guiedz Betsaid.

<sup>11</sup>Zeene bin grë miech co laa me brieë, dzigo brieenal zho me, bdziñ zho lo me ga. Zeene gon me zho, rley me pcaania me zho, bnee me lo zho zha racladz Dios gban zho, ni beenguiac me grë zha ne rzacnë. <sup>12</sup>Laa dze rdzelew, wbig gza tsiipchop xpëdscuel me rëb zho lo me, mazd gnee me lo grë miech co gbi zho ga; zeena guiob tsie zho grë guiedz las, grë yu ne riaan gax ga, yguib zho dien pa cuëz zho, yguib zho dien pe gow zho; sac choot miech nod ga.

<sup>13</sup>Dzigo rëbchaa me lo zho:

—To goldeed ncuane gow zho.

Pquiab zho rëb zho:

—Gaayaque guietxtil ni chop meḷ ziaadnie no nu, ipe rnase ncuaaṅ co lo grētaa miech qui! Niicle niaca miṅe gziuu ncuaaṅe gow zho, pe zhidaa dimi yquiin, ¿pa guioxi now?

<sup>14-15</sup>Nligaa miech tafa, zig gaay mil rgaa loxaque zha bguise. Dzigo bnabey me zho güey zho, güeynee zho lo grē miech co sob zho, cue zho groḷ gayooga, groḷ gayooga zho tib lugar. <sup>16</sup>Laa grē miech co bzob, dzigo bzheṅ Jesús gza gaay guietxtil co ni grop meḷ co, blis lo me nēz gbaa, bdeed me xquizh lo Dios. Blozhse ga, beengroḷ me gza guietxtil co, meḷ co ne, dzigo zigse rdeed mew lo xpēēdsuel me, scase scase rguiiz zhow lo grē miech co. <sup>17</sup>Grēse zho dow haxta zaatne bieltaa zdoo zho; ni zeene blozh dow zho, biodzē tsiipchop chicuid bio grē miṅe biaan.

### **Bnee Pedr cho nac Jesús**

*(Mt. 16:13-19; Mr. 8:27-30)*

<sup>18</sup>Tib dze biche Jesús lo miech palal, güey me tib zaatne güeyzodiidnie me Dios; loxaque xpēēdsuelse me güeynaḷ zhits me. Ga bnabdiidz me lo zho rēb me:

—¿Cho dien ron to rnee miech nac naa?

<sup>19</sup>Pquiab zho rēb zho:

—No zho rnee Juan Bautista, nogaa zho rnee Lív (men ne biadteed Xtiidz Dios padzeela); nogaa groḷ zho rnee no cho stib men ne biadteed Xtiidz Dios padzeelaw, sinque brieaban me gane ziaad me stib.

<sup>20</sup>—¿To waa? —rēb me lo zho—. ¿Cho rzac to nac naa?

Hor co pquiab Pedr, rēb Pedr lo me:

—iLuu nac Men ne zēēble diidz ga cxeel Dios!

<sup>21</sup>Dzigo pso me diidz lo zho choot lo gneed zhow.

### **Bzeet Jesús zha guṅ miech me**

*(Mt. 16:21-28; Mr. 8:31-9:1)*

<sup>22</sup>Tib vuelt bzeet Jesús lo grē xpēēdsuel me zha csacsi miech me. Rēb me, roob grē ncuaaṅ cteed zho me; grē zha non lo menguietz, grē pxoz rnabey, grē zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieaban.

<sup>23</sup>Ni rēb me lo grē miech ne ndxie lo me ga:

—Zha ne racladz sēēb xnēz naa, none cueeladz zho zho, none lēb zho gzataa dze guiaadnaḷ zho miṅe rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho, <sup>24</sup>sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnēz naa, ib zgaa zho tib guielmban ne gdziṅd dze lozh.

<sup>25</sup>Zha ne zienie guic loxaque gapchen, ¿pa dien yquiina lo zho, tel por lēw rsacsi zho zho, tel lēw yquiaaqui guey zho gabil? <sup>26</sup>Naa ne nac naa Mgui ne pxeel Dios, zha ne ctoladz quiab zho laa zho no xnēz naa, ctoladzniegaa zho

xtidz naa; scaque naa stoladznie naa zho gaḷ dze ne laa naa guiaḷ stib. Dze ne guialnie naa grē xanjḷ Pxoḷ naa, guiallu naa guieḷndzon ne rap me.

<sup>27</sup>Blozhse sca bnee me, rēbchaa me lo grē miech co:

—Ni gni naa lo to ganḷe, nzian grē zha ne ndxie nu niina, ib tedsod bii zan zho zeḅe laa Dios glu zha rnabey me.

### **Bdzēēlo Jesús**

(Mt. 17:1-8; Mr. 9:2-8)

<sup>28</sup>Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidznie me Dios.

<sup>29</sup>Laa me nozodiidznie Dios, zeḅe laa me bdzēēlo. Masaque biinidoo ne rriee lo me, xab mew, nquitsbie rnaw, haxta rquiabniw. <sup>30-31</sup>Tibaque brieequia Lí grop Moisés bdziḅ lo me ga, psilo zho nozodiidznie zho me grē guieḷnē ne cteed miech me Jerusalén, zeḅe laa me gbi lo guidzliu. Masaque biinidoo ne riab, ncuaaḅe gzee zdoo new.

<sup>32</sup>Laa zha ne zianaḷ zhits me, rcow zho mcaaḷ zob zho ga; per zeḅe biab biini nroob co, hor co bzhial lo zho gon zho zha rlu me gza me Lí ni Moisés.

<sup>33</sup>Laa grop meḅ co ziebiche lo Jesús, zeḅe rēb Pedr lo me:

—Maestro, ¡wena gon tebaa gbiaaz ne nu! Na maase gzaa no tson yu yag xiid win, tiba cuēz luu, tiba cuēz Moisés, stiba cuēz Lí.

Per niicle Pedr riendaque dien pe nacne sca rnee Pedr.

<sup>34</sup>Laa Pedr bii quianeeque, zeḅe bre tib xcow zaatne zo zho ga; per nli bdzieb zho gon zho laa zho biaan len xcow co. <sup>35</sup>Dzigo bin zho zēēb tib tsi meḅ co lo xcow co, rnee me:

—Lēē Xpēēd naa i gon, rleynie naa me. Golgon mine rnee me.

<sup>36</sup>Zeḅe blozh bin zho tsi meḅ co, gon zho loxaque Jesússe zo ga.

Grēse mine gon zho ga, ib choot lo bneed zhow len dze co.

### **Biac tib mēēd ne nosacsi mēdox**

(Mt. 17:14-21; Mr. 9:14-29)

<sup>37</sup>Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me. <sup>38</sup>Lad grē miech co brieē tib mgui, wbig me lo Jesús rēb me:

—Maestro, bzhiguiel bui ganḷe zha rac xpēēd naa. Tibaque mēēdbgui rii nac mēēd lo naa, <sup>39</sup>ni na laa mēdox nosacsi win. Zeḅe rdziḅ ma rcoptsiedan ma win, rron ma win liu, ga nix win runcxidz ma win, ni masaque rdzib mtsiin ro win; nen rsaan ma win. <sup>40</sup>Blansonie naa win nu, bnaḅ naa lo xpēēdsuel luu gunxoon zho mēdox co, per brieelod zho.

<sup>41</sup>Dzigo rēbchaa Jesús:

—¡Pe nac squitaa miech ntseeb nac to, ib nēde to gnalo to Dios! ¿Pa lal dze ne so naa gne naa lo to? ¡Ncuaaḅe cxcwdraa naa lo to squitaa nac to!

’Dēnie xpēēd luu nu —rēb me lo meḅ co.

<sup>42</sup>Zeene laa mëed co ziegax lo Jesús, hor co bron̄ mēdox co win liu, nix win ga masaque rzhidz win. Dzigo goctox Jesús lo ma, beñcxoon̄ me ma. Hor cogazh biac mëed co, laa me bdeed win lo pxox win. <sup>43</sup>Grē miech ne ndxie ga, per nli rzee zdoo zho gon̄ zho scataa nroob poder ne rap Dios.

Grēse miech ne ran̄ grētaa milagr ne run̄ Jesús, rzee zdoo zho.

### **Bzeet Jesús stib laa miech csacsi me**

*(Mt. 17:22-23; Mr. 9:30-32)*

<sup>44</sup>Biire Jesús bzeet me lo xpēēdsuel me zha gon̄ miech me, rēb me:

—Wen wen golquiaadiag mine gni naa lo to nu gan̄le. Naa gon̄ ne nac naa Mgui ne pxeel̄ Dios, ible zielo zho naa ladznia miech.

<sup>45</sup>Per ib riēnd̄ zho zha nacne sca rnee me, sac gard gdeed Dios diidzbey hor co guien̄ zho zha naca; niicle par gnabdiidzгаа zho, rdzieb zho gnabdiidz zhow lo me.

### **¿Cho nonraa?**

*(Mt. 18:1-5; Mr. 9:33-40)*

<sup>46</sup>Hor co psilo zho noneelsa zho dien̄ cho tib zho gac zha non.

<sup>47</sup>Bien̄ Jesús sca no zho, dzigo bnee me lo zho, bredz me tib mëēdbgui win, <sup>48</sup>rēb me:

—Grē zha ne no xnēz naa, zha ne gun̄cas tib mëēdwin zig mëēd rii, gleynie zho win, rrieequia naa ga rleynie zho. Ni zha ne gleynie naa, rrieequia men̄ ne pxeelle naa ga rleynie zho. Teñe racladz to gacnan̄ to dien̄ cho nac zha non, gacnan̄ to gan̄le, zha ne tsoxco gac zig tib ngund̄ziin lo samiech, zha co nac zha non.

<sup>49</sup>Blozh ga, rēbchaа Juan lo me:

—Maestro, bdzion̄ no tib zha co gon̄ bzeet zho lē luu zeene beñcxoon̄ zho mēdox, nacne nli blisqui now lo zho, sac led yed zho nacgrē ne.

<sup>50</sup>Dzigo pquiab me, rēb me:

—¡Gun̄scade to! Sac gon̄ zha ne racnie ne, grieelod lēēque zha glēēnie ne.

### **Ndox Jesús lo Juan grop Jacob**

*(Mt. 8:19-22)*

<sup>51</sup>Len̄ dze ne ziaadyob gbi Jesús lo guidzliu rii, len̄ dze co bio me nēz laa me zie nēz Jerusalén. Tiblique bio guic me, ib pquiad zdoo me, laa me zie.

<sup>52</sup>Zeene bdzin̄ me xtan Samar, pxeel̄ me bla zho bdedner zie zho tib guiedz win ne ndxie nēz co, par dien̄ pa lo gdeed miech co cuēz me. <sup>53</sup>Bdzin̄ zho guiedz co, choot bzhiguiēld̄ ndeed zaatne mbēz me; sac bien̄ zho nēz Jerusalén tsie me. Nac zha Samar, rlēēnie zho zha Israel.

<sup>54</sup>Zeene bin Jacoba grop Jacob Juan, blēē guic zho, rēbchaа zho lo me:

—Maestro, ¡mazd tibaque gotsaa gnab ne gliaal̄ gui lad grē miech rii, zeena nitlogazh zho!

<sup>55</sup>Biecwaque me, goctox me lo zho rēb me:

—Riende to lëë zhapaa nac meñ ne nacie to. <sup>56</sup> Golguien ganle, naa ne nac naa Mgui ne pxeel Dios, ziald naa par gnitlo naa miech, sinque laa naa zial csilaa naa zho lo dol.

Ga brieë zho güey zho stib guiedz.

<sup>57</sup>Nëz zie zho, zeene wbig tib mgui co rëb me lo Jesús, laa me racladz tsienal me zhits Jesús, tel pa lotaa nac zaatne tsie Jesús. <sup>58</sup>Dzigo pquiab Jesús rëb Jesús lo me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

<sup>59</sup>Laa zha ne bredz me tsienal zhits me, pquiab zho rëb zho:

—Sënal naa zhits luu, per bzhiguiel bneedz diidzbey cuëz naa, gangazh naa tsoliu pxoz naa.

<sup>60</sup>Rëbchaa me lo zho:

—Nzian grë zha gut no, psaan tsow tsie samengut zho tsiequeets zho. Sangue luu zhits naa dënal, zeena tsie luu tsienee luu lo miech, gacnan zho zha racladz Dios gban zho.

<sup>61</sup>Pquiab stib zho rëb lo me:

—Maase sënal naa zhits luu, per bneedz diidz ganiegazh naa diidz lo grë menlidz naa.

<sup>62</sup>Dzigo rëbchaa me:

—Zha ne xen nia rad ni csilo zho gwi zho nëz zhits zho, niacxe zrieelo ygan zho ngon. Scaque zha ne sëëb xnëz Dios, grielod sëëb zho telne mazdraa rleynie zho grë ncuuan lo guidzliu rii.

### Güey tsongaltsii zha ne güeynee Xtiidz Dios

(Mt. 11:20-24)

**10** Tib dze, ble Jesús stsongaltsii zha ne rquiaadiagle zhiwseed me, bnabey me tedner zho lo me tsie zho grë guiedz ne no ted me, pxeel me zho chopga chopga zho.

<sup>2</sup>—Golnab lo Dios —rëb me—, cxeelraa me zha ne gun xtsiin me. Sac ne nligaa ndaldoo miech ne quiambëz yquiaadiag Xtiidz me, zha ne gneelew lo zho rgaad. <sup>3</sup>Goltsie sca, per nsin nsin golso. Golguien ganle rrieequia nac to zig cho mëcwxil yeen, ni laa naa rxel to zaatne no grë coyot dox. <sup>4</sup>Peet güeyde to, güeyde to dimi, güeyde to ncuane gow to, lab tow, mine quiaie ni to mincose goltsienie.

<sup>5</sup>Miech ne yquiaabdiuzh to nëz, sode to dieen zharaa yquiaabdiuzh to zho. <sup>6</sup>Zeene yguib to zaatne cuëz to, yu ne gdzintaa to, golnab gunlay Dios grë zha ne no yu co. <sup>7</sup>Telne squiaadiag zho mine rnee to, zunlay me zho; telne nëdga zho yquiaadiag zhow, dzigo toque gunlay me. <sup>8</sup>Zha ne gneedz zaatne cuëz to, lidzse zha co golcuëz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne run dziin, ib none ycaa zho mine non xtsiin zho.

<sup>8</sup>Guiedz ne yquiaadiag miech miñe zienee to, zaacse golgac lo zho, tel pe guielwagw ne gneedz zho, golquiina; <sup>9</sup>golgunguiac grë men rzacne ne no ga. Golguiab lo zho, laa dze ne nolu Dios zha seëb miech xnëz me, laa dze co bdzinle. <sup>10</sup>Sangue guiedz ne siguield miech yquiaadiag zho miñe zienee to, golree grë ro xnëz zho, <sup>11</sup>ganlo zho glit to grë yudie co ni to, zeena guien zho ganle nëz ne nitlo zho ga zie zho. Golguiab lo zho, zha bguiba, sac binpaa zho zha grieelo seëb zho xnëz Dios ni nëd zho gon zho diidz. <sup>12</sup>Gacnan zho ganle, gal dze ne gun Dios xquielwxtis me, lëëtaa gac guielnë ne tsieguial zha Sodom, mazdraa nac guielnë ne tsieguial zho.

<sup>13</sup>Scadaa nac zha Corazín ni zha Betsaid. ¡Probsaxe zho, sac gon gonpaa zho grë milagr ne run Dios, per ib psaand zho xquielntseeb zho! Tel niaca miñe ngaa grë men Tiro, grë men Sidón, nian grë milagr ne gon zho, ib ndedsod mban niac grë zha co nio zho guielnë, zëëb nsaan zho xquielntseeb zho mbig zho lo Dios. <sup>14</sup>Gacnan zho ganle, gal dze ne gun Dios guielwxtis, lëëtaa caxtigw ne yгаа zha Tiro ni zha Sidón, mazdraa miñe yгаа zho. <sup>15</sup>Scaque zha Capernaum, masaque rzac zho niina zha nziuuraa lo Dios, per gacnan zho ganle haxta guiet len gabil ga guey zho.

<sup>16</sup>Blozhse sca bnee me, rëbchaa me lo zho:

—Grëse zha ne yquiaadiag miñe gnee to, rrieequia naa ga rcaania zho. Zha ne nëdgaa ycaania to, rrieequia naa ga nëd zho ycaania zho; ni zha ne nëd ycaania naa, rrieequia men ne pxeel naa ga nëd zho ycaania zho.

### Wbire tsongaltsii zha ne pxeel Jesús ga

(Mt. 11:25-27; 13:16-17)

<sup>17</sup>Zeene laa gza tsongaltsii zha co wbire, rley zho bdzin zho lo Jesús. Rëb zho haxta grë mendox bdzieb ma zho, zeene bzeet zho lë me.

<sup>18</sup>Dzigo pquiab me rëb me lo zho:

—Haxta ma ne rnabey lo ma, gonpaa naa gon bringaa ma, biab ma zig riabse tib belye. <sup>19</sup>Laa naa bneedz poder qui lo to, parne gdeete to diidz gun ma miñe racladz ma; grë meel dox, grë meegu ntseeb, niicle gzoobni to ma, peet gacde to. <sup>20</sup>Nli laa to runcxoon mendox niina, per gleyde to por min co, sinque mazd golley porne laa lë to zhooble lo Dios, laa to ngable lo me.

<sup>21</sup>Hor co biaad tib guielbley nroob zdoo Jesús, bnee me lo Dios, rëb me:

—Papá, luu nac men ne rnabey gbaa, luu nac men ne rnabey guidzliu, rnedz naa xquizh lo luu, sac grë miñe noyun luu nu niina, bdeete luu diidz niacnan grë zha raca, sinque laaw blu luu lo grë zha ne nac zig grë mëëdlaas. Sca quiaayun luu, sac ib scale racladz luu gaca.

<sup>22</sup>Blozh ga rëb me lo grë miech ne ndxie lo me ga:

—Grëse ncuaañe ran to quiaayun naa, Dios men ne nac Pxoz naa, me bneedz poder rii lo naa; sac ib laa me bzo naa, naa guna. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz gunbey me, zunbey zho me.

<sup>23</sup>Dzigo rëbchaa me lo xpëedscuel me:



—Dichos to bgaa to noyañ to grë miñ rii. <sup>24</sup>Sac goñ blactaa zha ne biadteed xtiidz Dios padzeela, haxta grë zha ne bnabey leñ dze co, bzoobladz zho nian zho grë ncuaañe noyañ to, bzoobladz zho nquiaadiag zho grë ncuaañe noquiaadiag to.

### Xcuent tib zha Samar

<sup>25</sup>Tib dze wbig tib zha ne nac maistr ley lo Jesús, bnabdiidz zho lo me, rëb zho:

—Maestro, bnë lo naa dien, ¿pe nac miñe gun naa parne grieelo ygaa naa guielmban ndzon ne gdziñd dze lozh?

<sup>26</sup>Pquiab Jesús rëb me:

—¿Zha dien zhubnee lo ley? ¿Pe rnabeya?

<sup>27</sup>Rëbchaa maistr ley co:

—Znu rneew: “Dib zdoos luu, dib nase luu, dib guielbiini ne no guic luu, dipse xfuerz luu, bleynie Dios; ni bleynie samiech luu, zigne rleynie luu luu.”

<sup>28</sup>—iMin qui nagon bioxco gun luu —rëb Jesús—, zeena ygaa luu guielmban ndzon ne gdziñd dze lozh ga!

<sup>29</sup>Per par glud ne noxcod me gun me miñe rnabey ley, dzigo pquiaalo me rëb me lo Jesús:

—¿Chopaa dzigo nac samiech naa, zha ne no gleynie naa?

<sup>30</sup>Dzigo bzodiidz Jesús tib cuent lo me, rëb Jesús:

—Tib men wladz name brie me Jerusalén zie me guiedz Jericó. Nëz zie me briequia ngbaan, bdiñ ngbaan me, mer niut ngbaan me; grëse ncuaañe ney me, haxta xab me blan ngbaan. <sup>31</sup>Laa me nix ga, zeene laa tib pxoz bded. Zigne goñ pxoz me, biecwga pxoz bded pxoz tib lad. <sup>32</sup>Wdzeepaaw, zeene laa tib zha ne runaque dziin leñ yadoo ziaad ga; scaque zigne goñ zho me, tib tib bded zho. <sup>33</sup>Sca nix me ga, zeene laa tib zha Samar bziñ. Zeene goñ zho me, wbig gax zho lo me; pquia zdoos zho me goñ zho zha rna me. <sup>34</sup>Gagazh been zho me rmed, blee zho vin bdiib zho lo grë rid ne ney me, bdëeb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdziñnie zho me tib yu ne rbëz miech ne zo nëz; ga blëznie zho me, pquianap zho me.

<sup>35</sup>Biini liu, zeene laa zho brie ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me men co, rëb zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

<sup>36</sup>Blozhse bzodiidz me cuent co, rëbchaa me lo maistr ley co:

—Lo gza tson zha ne nadien bded zaatne nix men co, ¿cho tib zho bien samiech zho ga nac me?

<sup>37</sup>Pquiab maistr ley co rëb me:

—Zha ne bion bded gaw, sac zha co pquia zdoos me.

Dzigo rëbchaa Jesús lo me:

—Sca nagon none gun luu.

### Blëz Jesús lidz Mart ni Marí

<sup>38</sup>Laa Jesús no nëz gza xpëëdsuel me. Bdziñ me tib guiedz win, ga no tib wnaa lë Mart, dzigo men co bdeed zaatne blëz zho.

<sup>39-40</sup>Bdziñ zho lidz Mart, lëëlëd bzëëb Mart ro tie. Zhixco ro tie no Mart, laa tib bel Mart lë Marí zob noquiaadiag grë zhiwseed Jesús. Goñ Mart rgaadraa nia Mart, dzigo wbig Mart rëb Mart lo Jesús:

—Bzhiguiel bnee lo bel naa guiaad me gun me xyudar naa. Bui ganle tipse naa psan me ro tie.

<sup>41</sup>Pquiab Jesús rëb Jesús lo me:

—Aque luuw nli Mart, squitaa noxco luu dien zha gac xtsiin ro tie luu. <sup>42</sup>No tib ncuaañe mazdraa none tsoxco luu, ni lëë min co nu goñ noyun Marí; gane grieelod ycaa naa mine quiayun me.

### Zha none gzodiidznie ne Dios

(Mt. 6:9-15; 7:7-11)

**11** Tib vuelt, loxaque blozh bzodiidznie Jesús Dios, wbig tib xpëëdsuel me rëb lo me:

—Maestro, bzhiguiel blu lo no dien zha gzodiidznie no Dios, zigne been Juan Bautist pseed me xpëëdsuel me zha gzodiidznie zho Dios.

<sup>2</sup>Dzigo rëbchaa Jesús:

—Zeene gzodiidznie to Dios, golguiab:

Dios, luu nac Pxoç no, zob luu gbaa;

luuse nac men ne mazdraa ndzon.

Luu nac men ne gnabey no,

mine gnabeytaa luu, zigne raca gbaa,

scaque none gaca lo guidzliu nu.

<sup>3</sup>Been guieñzaac bneedz ncuaañe dioow no nadze.

<sup>4</sup>Bzhiguiel been no perdon grëse dol ne ziodziuuñ no lo luu,

zigne rdziuuñ no samiech no perdon grë falt ne run zho lo no.

Gdeete luu diidz yquiil mendox no,

been guieñzaac bla no lo ma.

<sup>5</sup>'Sca nagon gnee to —rëb Jesús—. Ncuaañe gnab to lo me zneedz mew. Samiechse to name, gzoob ne wxina, lega nacle glanso tib zha ne ndzieeldiidz to ni guiend pe gdeed to gow zho. Dzigo tsie to lidz stib zha ne ndzieeldiidz to guiab to lo zho: “Bzhiguiel beenxtad tsonaque xcuun luu lo naa. <sup>6</sup>Lega nacle blanso tib zha ne runbey naa, na guiend pe gded naa yquiin zho.” <sup>7</sup>Segur znë zho: “Gunneete luu naa nu, dziitsle nioog ro lidz naa, nataa nixguies grë xpëëd naa; grieelod gache naa gnedz naa ncuaañe racladz luu.” <sup>8</sup>Per telne sonaad to ga, ganse zho tibaque quianee to, gnid naa zho tsieched zho gneedz zho ncuaañe racladz to. Per gneedz zhow porne ndzieeldiidz to zho, sinque laa zho gneedza porne gon zho tibaque quianab tow.

<sup>9</sup>Scaque nagon none gun to, zeene pe gnab to lo Dios. Ncuaañe rquiin to, golnaba lo me, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzlë me, scagaa me scaania me to. <sup>10</sup>Sac grëse zha ne rbig lo me rnab zho ncuaañe rquiin zho, rdeed mew. Zha ne rguib ncuaañe racladz zho, racnie me zho rdziel zhow. Zha ne rbedzlë me, rcaania me zho.

<sup>11</sup>Golguien ganle, zig nac to, zeene rnab xpëed to tib mel gow win, ¿niacxe ziazh to co to tib meel nia win? <sup>12</sup>Zeene rnabгаа win tib dzit, ¿niacxe zgo to tib meegu nia win? <sup>13</sup>Led rioxco to lëe niapse ncuaañe wen rdeed to lo xpëed to, niicle ne miech ntseeb nac to. Telne sca rioxco to xpëed to, pelej Pxo to dzigo, men ne zob gbaa, tsoxcod me to. Ib tedsod grëse zha ne gnab lo me gdeed me ncuaañe rquiin zho, zdeed mew; haxta zha ne gnab cxeel me Espiritu Sant gacnie zho, zun me mine gnab zho.

### Rëb zho mendox nacie Jesús

(Mt. 12:22-30, 43-45; Mr. 3:20-27)

<sup>14</sup>Tib vuelte bencxoon Jesús mendox ne nosacsi tib mgui co. Ib gacd gnee mgui, sac psan ngop ma mgui. Dzigo zigne bencxoon Jesús ma, laa mgui psilo bnee. Grë miech ne ndxie ga, bzee zdoo zho gon zhow. <sup>15</sup>Nogaa zho rnee, Beelzebú ma ne rnabey lo mendox, ma co nacie me gane rrieelo runcxoon me mendox. <sup>16</sup>Briequia spalal zho, rnab zho lo me gun me pe stib milagr, parne gliladz zho nli Dios pxeel me.

<sup>17</sup>Bien Jesús zha rza guic zha ne noneenë me ga, dzigo rëbchaa me lo zho: —¿Ncuaañe gacd gon rnee to! Tel tib guiedz nadien, csilo miech, lëëque zha tilnie menladz zho, ¿niacxe nitlod guiedz co? Tib diigaa miecha, tel lëëque zha tilnie menlidz zho, led znuse lëe nitlo dii co. <sup>18</sup>Scaque mendox nagon, telne lëëque lëe ma guncxoon samendox ma, ¿pe nale na bnitlo ma! Laa naa rne min rii lo to, porne rnee to ma ne rnabey lo mendox nacie naa, gane rrieelo runcxoon naa ma. <sup>19</sup>Nana telne sca rzac to, ¿zha ne nacgrë to dzigo, cho nacie zho ne ye zho runcxoon ma? Gase naganle rlu dol dox i quiayun to squi rnee to. <sup>20</sup>Sangue tel naa, Dios nacie naa runcxoon naa mendox, ni ga rlu ganle laa Dios pxeelle men ne gnabey lo to.

<sup>21</sup>¿Masaque nac mendox zig tib zha ne no xfuerz! Tib zha ne no xfuerz, tel tibaque ney zho xquiib zho, ¿cho dien lega sëeb lidz zho gla ncuaañe quianie zho? <sup>22</sup>Per zeene rriequia stib zha ne mazdraa no xfuerz, zha cole rtiche zha co, runcxoon zho zho, riaannie zho grë ncuaañe gopchen zho. <sup>23</sup>Golganca sca ganle, zha ne rlëe lo naa, ga rlu nacdied zho naa; ni zha ne racnied naa lo xtsin naa, paat yquiind zho.

<sup>24</sup>Mendox ne rsacsi miech, zeene laa ma rsaan zho, rie ma riequianzë ma dan zaatne choot miech guiend, rguib ma dien pa cuëz ma; ranse ma rdziel zaatne cuëz ma, rnee ma: “Mazd gbire naa guia naa lidz naa stib.” <sup>25</sup>Dzigo rbire ma, zeene rdzin ma lo zha ne psacsi ma ga, masaque rzac ma zho zig rzac miech tib yu ne griin blioob, tib yu ne ine nzhixcuaa len. <sup>26</sup>Dzigo rie ma

riexi ma zgadz samendox ma, ma ne mazdraa ntseeb, rdziñ ma gza ma rzëëb ma zdoo zha co, rsilo ma rsacsi ma zho. ¡Hor cole mazdraa mban run ma zho!

<sup>27</sup>Sca quianee Jesús, zeene nguiedz bnee tib wnaa ne no lad grë miech ne ndxie lo me ga, rëb wnaa co:

—¡Dichos wnaa ne gop luu, wnaa ne bgadz luu!

<sup>28</sup>Pquiab Jesús rëb me:

—¡Mazdraa dichos zha ne gon yquiaadiag Xtiidz Dios, ni tsoxco zho gban zhow zigne naca!

### **Zha ne riladzd cho nac Jesús**

*(Mt. 5:15; 6:22-23; 12:38-42; Mr. 8-12)*

<sup>29</sup>Miech guizhiu ne quiazinraa lo me ga, dzigo bnee me rëb me:

—Nadzpaa ntseeb zdoo to nac to miech ne mban len dze rii. Tibaque quia to racladz to gan to pe stib milagr, parne gliladz to Dios pxeel naa, ¿zha rnaraa milagr ne racladz to gan to? Gacnan to ganle, stibaque milagr gon gan to, tib mine csoladz to zha goc Jonás. <sup>30</sup>Haxta dzigora nagon guien to nli Dios pxeel naa. Sac tel Jonás, zeene gocnan zha Nínive zha bzhaac me, dzigo bliladz zho nli Dios pxeel me. <sup>31</sup>Ni gacnan to ganle, zeene gal dze ne laa Dios gun xquielwxtis me, zieso wnaa ne goc rein nëz Sabá, steedquie me to. Sac gon pa lo ga brie me, biaad me biadquiaadiag me grë xtiidz Salomón; ni to, lo to nu zo men ne mazdraa non lo Salomón, ni nëd to gon to xtiidz me. <sup>32</sup>Scaque grë zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib runcasde to me.

<sup>33</sup>Tsod zha ne yquiaagui tib biini, lozh ga ctoos zho pe cos low, gzolangaa zhow zaatne ngueets. Sac biini ne rquia, glaa rzoba par gziiniw len yu, zeena guiab biini lo grëse zha ne sëëb len yu. <sup>34</sup>Rriequia nac bziaalo miech zig nac tib biini. Telne niapse lo grë ncuane ndzinli rwi zho, dzigo gdipse xcuerp zho no lo guielbiini. Laa telne loxaque lo grë ncuane nonguieldgaa rwi zho, dzigo gdipse xcuerp zho no lo guielcow ga. <sup>35</sup>Golguien sca pa lo rwi to, napaa laa ne tso to lo biini, lel lo guielcow no to. <sup>36</sup>Sac gon, tel dipse xcuerp to no lo guielbiini, ni tib lëw nod lo ncow, zlupaa to; sac masaque nac to ga zig tib zha ne zo gax tib lo biini nroob.

### **Güey Jesús lidz tib zha farisé**

*(Mt. 23:1-36; Mr. 12:38-40; Lc. 20:45-47)*

<sup>37</sup>Zeene blozhse bnee Jesús lo grë miech co, dzigo bredz tib zha farisé me güeynie zho me tib wagw lidz zho.

Bdziñ me lidz zho, bded me bzob me lo mezh, <sup>38</sup>psilo me dow me, per bdiibd me nia me zigne nacpaa xcostumbr grë zha Israel. Zeene gon zha farisé cow, rlozhd gzee zdoo zho; <sup>39</sup>dzigo rëbcha me:

—Grë to ne nac to zha farisé, laglaase rlu to miech wen nac to, per zdoo to ntseeb to, sac niapse guielntseeb, niapse guielgbaan run to; masaque nac

to gon̄ zig tas, zig plat ne nēz zhitsse mbe rna, laa nēz leña rna draa di beed. <sup>40</sup> ¡Nadz paa ncow nac guic to! ¿Pe riende to racladz Dios ne laglaase glu miech wen nac to, sinque racladz me desde zdo to gac to miech wen? Sac dib nacse to psan̄ me to. <sup>41</sup> Laa ne squi no to noban to, mazd goldeed ncuanea nacchen paa to lo grē zha ne guien̄d pe yquii, zeena gac to miech ne nlipaa wen.

<sup>42</sup> ¡Probsaxe to! Rzac to demas nguzobdiidz to lo Dios, rio to haxta grē guizh bitxtil, grē guizh rud, ni grēragaa guizh ne ran to, rdeed to xdiezm to yadoo; per rioxcode to gban to zigne rnabey Dios, ib rioxcode to gleynie to samiech to. Ible none tsoxco to min̄ rii, ni bii scaquegaa tsoxco to gdeed to xdiezm to.

<sup>43</sup> ¡Probsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdziel zho to dib ro nēz. <sup>44</sup> ¡Probsaxe to, lēetaa rdziel to grē to maistr ley! Masaque nac to zig nac grē baa ne rludraa pa nac. Tel̄ baa cow, zeene rded zho zaatne niaaw, ib rien̄d zho lad grē ncuanea noyodz ga, noded zho.

<sup>45</sup> Hor co pquiab tib maistr ley, rēb zho lo me:

—Maestro, ¿ye no dzigo lēē rzoob luu squi nac?

<sup>46</sup> Pquiab Jesús rēb me:

—Ye to gon̄. ¡Probsaxe to! Rio to rzadraa ley ne rnabey to gon̄ miech, ni per ni to rioxcode to siquier csilo to gon̄ tow. <sup>47</sup> ¡Probsaxe to! Paat rquiinda gon̄ squi rio to, rlozhd dieen paraa rzhixcuua to ro xpa grē zha ne biadteed xtiidz Dios padzeela. <sup>48</sup> ¡Igual ntseeb to grē pxozgol to! Sac gon̄, zha beet grē zha co, laa to no rzhixcuua to ro baa. <sup>49</sup> Nanle Dios squitaa ntseeb zdo to, mine run̄ to ga bnee me, zeene rēb me: “Sxel̄ naa grē zha ne tsieteed xtidz naa lo zho, sxel̄ naa zha ne tsieneew lo zho, per nanle naa gandzed zho zho, haxta zut zho grōl zho.” <sup>50</sup> Gacnan̄ to sca ganle, grē to miech ne mban len̄ dze rii, grē to gun̄quizh Dios xchen grē zha ne pxeel̄ me biadteed xtiidz me wlal ne ndxie guidzliu, <sup>51</sup> desde Abel haxta Zacarí men̄ ne beet pxozgol to len̄ yadoo zaatne nac gax lo pcoog. ¡Ne nligaa grēse dol̄ co gon̄, to quizha! <sup>52</sup> ¡Probsaxe to maistr ley squi nac to, ib rneede to diidzli lo miech! Nac diidz to cseed miech guien̄ zho zha nac Xtiidz Dios, per nēde to gliladz tow, ni niicle nēēdgaa to gliladz zha ne racladz ycaaniaw.

<sup>53-54</sup> Blozhse ga, laa me brie ga. Grē zha farisé, grē maistr ley, per nli rlēē zho bin zho sca rēb me. Psilo zho nzian grē ncuanea rnabdiidz zho lo me, rguib zho dien̄ zha gunglēē zho me, par dien̄ pe cxin̄d me pe tib diidz, zeena min̄ co yquiaaqui zho tsiezoob zho xdemand me.

### Grē ncuanea rac nguets zhliian

(Mt. 10:19-20, 28-33; 12:32)

**12** Miech guizhiu ne pcaalsa lo Jesús, haxta rcheeplsa zho. Dzigo bnee me lo xpēēdscuel me, rēb me:

—Gol̄guien̄ gon̄, gunde to mine run̄ zha farisé, tel̄ zha rquiaalose zho miech wen nac zho. <sup>2</sup> Sac grēse ncuanea sca nguets rac, grēse ncuanea rlud miech, zdziñ dze ne xoobneña.

<sup>3</sup>Zig nac grë ncuuaane zhliiaanse rnee to lo ncow niina, zdziñ dze ne gon miecha zobna ngebiz; grë ncuuaane rnee to len yuse, zdziñ dze ne dib lad guiedz gacnañ miecha.

<sup>4</sup>Golgona ganle bets: Ib gdziebde to zha ne gacladz gut to. Nli zrieelo gut zho xcuerp to, per lozh ga, peet grieelodraa zho gun zho. <sup>5</sup>Golguien, Dios nac men ne mazdraa nroob, mine rnabey me min co none gon to. Sac tel me, zrieelo me gnitlo me miech dib xcuerp zho, ni lozh ga zrieelo me gzonëz me zho nëz len gabil.

<sup>6</sup>Nligaa gdziebde to miech, csaand Dios lega pe gac to. Golwi ganle, zig nac grë mguin, niicle ne rzac miech peet nond ma, haxta chop ma rto zho por tib gaay centav; per tel Dios, ib rsaanladzd me ma. <sup>7</sup>Pelel to dzigo csaan me, haxta guits guic tow, grësew ngaba lo me. Gdziebde to sca, golguien ganle nonraa to lo tib dzoon mguin.

<sup>8</sup>Ni gni naa lo to ganle, zha ne glu lo miech nacie zho naa, scaque naa ne nac naa Mgui ne pxeel Dios, zeen gal dze co zlu naa lo grë xanjl Dios, nacie naa zho. <sup>9</sup>Sangue zha ne ctoladznie naa lo miech, scaque naa ziep naa lo grë anjl co runbeyd naa zho. <sup>10</sup>No zha ne rneenë naa, per zun Dios zho perdon dol co; sangue zha ntseeb ne gneenë Espíritu Sant, ib gundraa me zho perdon.

<sup>11</sup>Zeene tsiezo miech rii to lo grë zha ne rnabey xyadoo zho, tsiezogaa zho to lo grë zha ne nac wxtis, tsoode to zhgab dien pe gnee to; <sup>12</sup>sac zeene sca tsiegala, Espíritu Sant csiab guic to pe nac mine gnee to lo zho.

### Zha ne loxaque rapchen

<sup>13</sup>Hor co wbig tib zha ne no lad grë miech co, rëb zho lo Jesús:

—Maestro, bzhiguiel bnee lo bets naa glë zho ncuuaane psan pxox no, gneedz zho mine raguial naa yca naa.

<sup>14</sup>—Aque luuw nli —rëb Jesús—, ¿cho në lo luu laa naa noyun guielwxtis co? Ziald naa gon par quiiz naa ncuuaane rap miech.

<sup>15</sup>Dzigo bnee me lo grë miech co, rëb me:

—iGolguien gon, gzoobladzde to demas gapchen to! Sac niicle ndziibraa gapchen miech, grieelod por grë ncuuaan co ndzon gac lo xquielmban zho.

<sup>16</sup>Znu gon bzhaac tib men ne nroob gopchen. Nat liu quianie me, zeene rlaap me grë ncuuaane ran me, nroob ncuuaane rlis me low. <sup>17</sup>Bdziñ tib dze rgaadraa pa tsotsow grë ncuuaan co, dzigo bzob me dien zha gun me. <sup>18</sup>Tibaque zeene rëb me: “Mine naca laa naa gun nroob grë yu qui, zeena zigtaa grë guielnzaac quiw, grëragaa ncuuaane rap naa, ga tsotsowa grësew. <sup>19</sup>iPe zhidaa iz ne lëb grë ncuuaan co! Peet tsieniedraa guic naa, ine guxt sob naa, gow naa, guie naa ncuuaane gacladztaa naa.” <sup>20</sup>Min co rza guic me, tibaque zeene rëb Dios lo me: “Nadzpaa nxen luu. Guieel riigazh gon laa luu guet. iZhaale zha ne guiaannie grëtaa ncuuaane beenlo luu i!”

<sup>21</sup>Zeene blozh bzodiidz Jesús cuent co, rëbchaa me:

—Sca nagon rzac grë zha ne loxaque dien zha gapchen zho zienie guic zho. Ncuuaan cose rionie guic zho, ib rioxcod zho gun zho ncuuaane non nëz lo Dios.

### Rsaand Dios zha ne no xnëz me

(Mt. 6:19-21, 25-34)

<sup>22</sup>Blozh ga, rëbchaa me lo xpëëdsuel me:

—Gacxe waa, gni naa lo to ganle: Tsode to zhgab dien zha gban to lo guidzliu rii, pa griee pe gow to par gban to, pa gdzielgaa ncuane gdze xcuerp to. <sup>23</sup>Mazd golconie guic to dien zha gac xquielmban to, dien pa tsiebannie to xcuerp to.

<sup>24</sup>Golwi lo grë nga ganle, led yed ma ran, led yed ma rlaap, led yed ma rgotsow pe guielgon, per row ma; sac Dios rdeed ncuane row ma. ¡Te! to gon, mazdraa non to lo grë mguin co! <sup>25</sup>Ni lalnu paat rquiinda tant tso to zhgab. Te!ne guiab to tso to zhgab dien zha gacnool xtse to spalal yeense, ¿niacxe zrieelo to gunnool tow? <sup>26</sup>Nanle to ganle led ncuane grieelod ga. ¿Pe nac dzigo tant tso to zhgab ncuane mazdraa nroob?

<sup>27</sup>Zig nac lar, ¿pe nacne tant tso to zhgab dien pe gacwxab to? Pe rwide to lo grë guiee dzil ne ganle zëëb dan, zha rrooba, niow rluw, ni led yeda rio zhgab dien zha gacwxaba; ni gni naa lo to ganle, per ni rey Salomón con grë xab niazh me, blud me scataa niow. <sup>28</sup>Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw tsecle, ni scataa niow rgacwxab Diosa; ¿pe le! to dzigo ygacwxabd me, niicle ne squi gard guien to dib zdoo to gnalo to me?

<sup>29</sup>Tsodraa to zhgab sca, guiab to: “¿Pa griee pe dioow ne, pa griee pe dio ne?” <sup>30</sup>Grë miech ne runbeyd Dios, tibaque zhgab co rio zho. Sangue to, golsoladz ganle PxoZ to men ne zob gbaa, nanle me pe nac grë xliaadz to. <sup>31</sup>Me nac men ne gneedz ncuane yquiin to, per ib none glo tsoxco to gban to zigne rnabey me.

<sup>32</sup>Nli zhis to, pale tib dzoon win mëcwxiiil yeen, per gdziebde to. Sac niicle zhis to, per rley PxoZ to men ne zob gbaa, laa me rneedz grëse ncuane rap me lo to. <sup>33</sup>Gacxe waa, laa ne tsonie guic to dien zha gacnroob ncuane rap to, mine quianie to goltow, dzigo goldeed dimi co yquiin zha ne rappaa liaadz; zeena sca nroobraa guielnzaac ne yгаа to gbaa. Guielnzaac cosi, led yeda nitlo, led yeda grë, led yeda tsoxtseeb lo ngbaan, tsoxtseebгаа lo mxil.

<sup>34</sup>Sca golgun, sac gon guielnzaac ne gunlo to, zaatne gunlo tow, ga gdzin to.

### ¡Nsin golso!

(Mt. 5:25-26; 10:34-36; 16:1-4; 24:45-51; Mr. 8:11-13)

<sup>35</sup>Nsin sca golso —rëb me lo zho—. <sup>36</sup>Golgac zig tib ngundziin ne rquiambëz gbire men ne rnabey zho zeene pa rie me tib lo guieltsieel. Nsin rzo zho, zigne rdzin me, rxal zho ro yu rzëëb me.

<sup>37</sup>Dichos zha ne nsin zo zeene laa men ne rnabey zho glanso. Ib tedsod, steed me zho nëz len yu, soob me zho lo mezh, csilo me mezh al gdziib ncuane gow zho. <sup>38</sup>Nligaa dichos zha ne sca nsin so, horne glansotaa me; niicle tel wxina, ziadyiinigaa liuw. <sup>39</sup>Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw, ¿niacxe zaaguies zho?

Led sobna zho lëë, nsin nsin so zho parne csaand zho sëëb ngbaan lidz zho. <sup>40</sup>Scaque to nagon, none sca nsin so to, sac gon lega naclew zeene gan to laa Mgui ne pxeel Dios ziaadle.

<sup>41</sup>Zeene blozh sca bnee me, rëbchaa Pedr lo me:

—Maestro, mine blozh bnee luu i, ¿pe par nose naca, te ye par grëraa miecha ye?

<sup>42</sup>Pquiab me rëb me:

—Laaw rne naa, par grëse zha ne zienie guic zaacse gun zho mine rnee men ne rnabey zho. Nligaa nsin none so zho, sac laa zho guiaannie zha ne nacgrë zho, zig riaannie tib ngundziin sangundziin zho parne gdeed zho ncuaaane gow zho.

<sup>43</sup>Dichos zho, telne ine niowse noyun zho dziin co zeene laa men ne rnabey zho glanso. <sup>44</sup>Zeene gan mew, ib tedsod so me zho, zha gnabey grëse ncuaaane quianie me. <sup>45</sup>Per tel tsienie wguic guic zho guiab zho gbireniobd me, csilo zho lel csacsi zho grë zha ne biaannie zho, tso zho loxaque gowcho zho, loxaque gzudz zho, <sup>46</sup>tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonëz me zho guey zho zaatne no grëraa zha ne rond diidz. Nroob caxtigw ne cteed me zho.

<sup>47</sup>Sac gon zha ne sca nanle pe nac mine racladz men ne rnabey zho, ni tsoxcod zho gun zhow; ible nroob nac caxtigw ne ted zho. <sup>48</sup>Mazd lëëtaa caxtigw ted zha ne peet nand, niicle gund zho mine rnabey me. Grëse zha ne nanle pe nac mine no gun zho, ib none gun zhow; nac cuent rii zig tib zha ne rcaania pe cos, tel palal mine pcaania zho, none haxta nroobraaw ctsire zho.

<sup>49</sup>Niina ne laa naa zial, rrieequia zialzobgui naa lo guidzliu. ¡Ni zoot naa gon, tebaa ranle naa laaw quiayazbel! ¡Tebaa psiaalle naa lo dziin ne zialgun naa! <sup>50</sup>Per na naraa none teed naa tib guielnë nroob, ni mbanse gon rac zdo naa quiambëz naa gdziin dze co.

<sup>51</sup>¿Masaque nan to na lëë, laa naa zial loxaque par cuiñ wense miech? Lëda gon, ye zial naa zialgunctil naa zho. <sup>52</sup>Sac desde len dze rii, yu ne no gaay miech, laa zho ctsolsa. Tel sëëb chop zho xnëz naa, laa ston zha ne guiaan ga, ctsidil zho; tel sëëbgaa tson zho, scaque grop zha ne guiaan ga, gandzed zho zho. <sup>53</sup>Mëed ne gan laa pxoz zho, laa xniaagaa zho bzëëb xnëz naa, gandzed zho pxoz zho, gandzed zho xnial zho; scaquegaa zha ne quianie mëëda, zeene gan zho laa xingan zho, laa xindzoopgaa zho bzëëb xnëz naa, gandzed zho zho. Zha ne nac nguzhizha, zlëënie xnial tseel zho zho; tel xnialgaa tseel zhow, zlëënie zho me.

<sup>54</sup>Blozhse sca bnee me, rëbchaa me lo grë miech ne ndxie ga:

—¡Pe nlipaa rnee to riende to pe nac grë ncuaaane noyac len dze rii! Zha zeene ran to rquia xcow nëz ne rzëëb ngbidz, znuse rien to laa guie guiab. <sup>55</sup>Zeene rangaa to ziaad me nëz ne rzë ngbidz len mëë nal, nanle to laa nëëg gac. <sup>56</sup>¡Guielwquiaalo i lo to gon! Zha zëëb dzigo runbey to grë señ ne rlu zhan gbaa, rlugaa lo guidzliu, laa grë mine quiayan to len dze rii riende to.



<sup>57</sup>¡None guien to tozhal cobey dien pe nac mine nonguiel gun to! <sup>58</sup>Gzoob ne bdilnie to tib samiech to, laa to nole nêz zie to lo wxtis grop to. None guien to, laga no to nêz mazd golguiaaṅ mpaz, lëdle tsiezo zho to lo wxtis; sac tel laa to gdziṅ lo wxtis, ib znabey wxtis zha ne co to ladzguiib. <sup>59</sup>Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

### Grêse miech, ngoopdoḷ nac zho

**13** Len dze co, bdziṅ bla zho lo Jesús bzodiidz zho lo me zha bnabey Pilat gut bla zha Galilé, lëetse zeene no zho len yadoo noyut zho ma ne nogogon zho lo Dios. <sup>2</sup>Dzigo rëbchaa Jesús lo zho:

—Segur na lëe, rëb to mazdraa ngoopdoḷ grê zha co lo grëraa zha ne no nêz Galilé, gane sca bdzieelo zho. <sup>3</sup>¡Lëda gon! Zigtaa ngoopdoḷ zha co, scaque to ngoopdoḷ nac to; telne csaande to xquielntseeb to gbig to lo Dios, ye to znitlo to. <sup>4</sup>Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdoḷ zho lo grëraa zha Jerusalén, gane sca gut zho. <sup>5</sup>Per gacnan to ganle, ¡lëda! ¡Zig rne naa ga, ye to miech ngoopdoḷ nac to, ni telne csaande to xquielntseeb to gbig to lo Dios, ye to zdziṅ dze ne nitlo to!

<sup>6</sup>Dzigo bzodiidz me tib cuent lo zho, rëb me:

—Tib men name, zob tib zhan yag guigw lo xcuua me zaatne quianie me lbë uv. Cad rdziṅ mëe ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex, <sup>7</sup>dzigo bnabey me zha ne quianap liu co cchuggazh zhow, rëb me: “¡Pchuggazh yag yozh qui, zhlëse zoba i! Nale rac tson iz ziyal naa rguib naa nex low, ni peet nex rneedzda.” <sup>8</sup>Dzigo pquiab zha ne quia dziin lo me ga, rëb zho: “Psaan dien guiaana stibtaa iz rii, na laa naa glë zhana, na laa naa gdziṅ beeba. <sup>9</sup>Telne yquiadaque nex low iz ne ziaad, maase cchug new dzigo.”

### Biac tib zhuz ne nosacsi mendox

(Mt. 13:31-33; Mr. 4:30-32)

<sup>10</sup>Tib dze ne rdziiladz zha Israel lo dziina, bdziṅ Jesús len yadoo, psilo me noseed me miech.

<sup>11</sup>Lad grê zha ne noseed me ga, lad co no tib men wnaa nlengw nac zhits, gocle tsiimtson iz sca nosacsi mendox me, ib gacd gacnli me. <sup>12</sup>Zeene gon Jesús me, dzigo bredz me me, pxobnia me guic me, rëb me lo me:

—¡Niinagazh gon, laa luu guiac!

<sup>13</sup>¡Hor cogazh laa zhits me ga gocnli, rley me, psilo me rdeed me xquizh lo Dios! <sup>14</sup>Laa zha ne rnabey yadoo, zeene gon zho sca beenguiac Jesús me dze co, blëe zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho len dze ne rac dziin, ¡led tsod zho guiaad zho guiac zho dze nda rii!

<sup>15</sup>Dzigo pquiab Jesús rëb me:

—¡Nazdpaa ntseeb to! Rquiaalo to ib peet dziin runde to dze rii. ¡Pezhe ga waa run to zeene rsilaa to xcon to, rsilaa to xpurr to dze rii rieguie to ma

nis? <sup>16</sup>Zha nac dzigo rzac to, nonguielda nu beñ naa beenguiaac naa wnaa rii, dze rii. Golwi ganle zha xtii Abraham nac me, leñ tsiimtson iz goc sca nosacsi mendox me.

<sup>17</sup>Zha ne rlëë ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëtaa milagr ne run me.

<sup>18</sup>Blozh ga, bnee me rëb me:

—¿Zha ganle racnroob lo xtsiin Dios lo guidzliu rii? <sup>19</sup>Racnrooba gon zig roob tib midz moxtaz ne ran zho dan rii. Tel midz moxtaza niicle tib midz winsew, zaatne racniw, rrooba, raca tib yag nroob; haxta rie grë mguin riezhixcuaa ma zhiptsieez ma low.

<sup>20</sup>'Ziaadaque gon gaca, zig ncobi. <sup>21</sup>Sac tel ncobiw, niipaquew rcots men wnaa tson lmud rin, ni dib nace ncob co rzibe.

### Zha ne ycaania Dios

(Mt. 7:13-14, 21-23)

<sup>22</sup>Laa Jesús no nëz zie me nëz Jerusalén. Guiedz ne rdedtaa me rseed me miech; zigtaa guiedz nrooba, zigtaa guiedz wina. <sup>23</sup>Tib vuelte bñabdiidz tib zho lo me, dien pe zhis nac miech ne ycaania Dios. Dzigo pquiab me rëb me:

<sup>24</sup>—Nligaa zhis zho, sac masaque naca zig tib puert niase. Goltsoxco sca niinasraa golsëëb xnëz me ycaania me to, sac zdzin dze ne nzian zho gacladz sëëb, per grieelodraaw. <sup>25</sup>Deque laa men ne rnabey csioog ro yu, telne biaan to nëz ley, niicle cuedzraa to me gnab to siguiel me cxal me ro yu sëëb to, per cxaldræa mew. “Runbeyd naa to”, gnë me, “nand naa dien cho zha to.” <sup>26</sup>Niicle guiab to runbey me to, biaadpaa me ladz to pseed me miech, haxta downie to me. <sup>27</sup>“Laa naa nile”, gnë me, “runbeyd naa to. ¡Gunnëetraa to naa, ib rdziguiend naa grë miech yozh, miech ngoopdol ne nac to!”

<sup>28</sup>Mban gac to zeene gan to laa Abraham, laa Isaac, laa Jacob ni grëraa zha ne biadteed xtiidz Dios, laa me pcaania zho, laa to biaanse nëz ley. Nligaa mbandox gac to, zoon to, haxta zow lay to lo guielnë co. <sup>29</sup>Ni mazdraaw gon, zeene gan to pa lo guidzliu brieë grë miech ne bdzin ga, ine zobnie me zho lo xmez h me noyownie me zho. <sup>30</sup>Grë zha ne rzac to niina peet nond, lëëtse zha co ygaa guielnzaac co; laa grë zha ne rzac non zho niina, peet ygad zho.

### Bzeet Jesús zha nac zha Jerusalén

(Mt. 23:37-39)

<sup>31</sup>Dze coquew, bdzin bla zha farisé rëb zho lo Jesús grieeniob me ga, sac laa Herod racladz gut me. <sup>32</sup>Dzigo rëbchaa me lo zho:

—Goltzie golguiab lo mëz win co cxecw me spalal, nadzese ni gzhe gunguiaac naa miech nu, zigtaa zha ne rzacnëw, zigtagaa zha ne nosacsi mendoxa; gal widz guindle naa nu. <sup>33</sup>¡Nligaa nadzesew ni gzhe, widz laa naa gdzinle Jerusalén zaatne za naa! Sac ible Jerusalén, ga rut zho grëse zha ne riadteed xtiidz Dios lo miech.

<sup>34</sup>¡Aque tow men̄ Jerusalén! ¿Pe nacne squitaa nac to, rut to zha ne ziadteed xtiidz Dios lo to, rgoquie to grē zha ne rxeeł me lo to? Blactaa gocladz naa niacnie naa to, nquiianaap naa to zig run̄ nguid rgueedz ma xpēed ma, per bzhiguiel̄de to. <sup>35</sup>Gacnañ to gan̄le, nadzetaa gon̄ laa lidz to guiaan̄ ngan, sac gandraa to naa, haxta gal̄ dze ne guiab to: “¡Zha ndzontaa men̄ qui pxeel Dios lo ne!”

### Biac tib men̄ ne rriee gui

**14** <sup>1-2</sup>Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdziinaque tib men̄ bgui, rzacnē me, gdipse me no gui. Grēraa zha farisé ne ndxie ga, quialeets zho Jesús quiambēz zho dien̄ pe zunguiac me mgui co. <sup>3</sup>Dzigo rēbchaa Jesús lo zho, ni lo grē maistr ley ne ndxie ga:

—Golnē dien̄, ¿pe nonguiela gunguiac naa miech dze rii, te nonguiel̄da ye?

<sup>4</sup>Ni tib zho pquiabd. Hor co pxobnia me guic mgui co, beenguiac me mgui. Blozhse bzonēz me mgui, <sup>5</sup>rēbchaa me lo zho:

—¿Pe nli na peet dziin run̄de to dze rii? Tel̄ zha tsietsobe tib xpēed to, tib xmagaa to tib len̄ guiuu dze rii, ¿niacxe tsiebeegazhde to xpēed to, tsiebeegazhdga to xma to ga?

<sup>6</sup>Loxaque lo zho rac, ib bdziel̄d zho pe nquiab zho.

<sup>7</sup>Grēraa miech ne nodzin̄ ga, no zho rguib zho dien̄ zha yгаа zho zaatne nzhixcuaaraa sob zho. Gon̄ Jesús zha rac zho, dzigo bnee me lo zho, rēb me:

<sup>8</sup>—Golguien̄ gon̄, zeene znu cuedz miech to, zig nac tsie to tib wagw zaatne noyac tib guiel̄tsieel, ib gunde to tsiesob to zaatne nzhixcuaaraa. Sac gon̄, nenda glanso tib zha ne nonraa lo to, <sup>9</sup>lozh ga, laa zha ne bredz to lo lni guiaadliso to ga, gnē zho: “Guso i dien̄ sob men̄ rii.” Led tib guiel̄to ga par to, race to laa to tsieso ga, tsiesob to zaatne rialle ro beel̄. <sup>10</sup>Mazd gan̄le, zeene sca pa lo tsie to tib lo lni, ndooladz gol̄gac, tib lad gol̄sob. Zha ne bredzle to lo lni, zeene gan̄ zho laa to zob ga, ziaad zho ziaad-xi zho to tsiesobnie zho to zaatne nzhixcuaa. Zha ne zoble lo mezh ga, zeene gan̄ zhow, ziañnziiu to lo zho. <sup>11</sup>Gol̄soladz gan̄le: grē zha ne lēēque zha run̄non zho, lel̄ riaan̄win zho; laa zha ne riaan̄win, run̄non miech zho.

<sup>12</sup>Blozh ga, rēbchaa me lo men̄ ne nac lidz ga:

—Scaque luu gon̄, zeene cuedz luu miech guiaad zho tib wagw lidz luu, tsod luu loxaque zha ne ndzieeldiiz luu, loxaque zha bets luu, zha lidzse luu, lo grēгаа zha ne no gax lidz luu zha ne rapchense, zha cose cuedz luu; sac gon̄ ib tedsod zbedaque zho luu lo zhilni zho, stsire zho mine been̄ luu ga. <sup>13</sup>Mazd bredz grēse miech, zig nac zha ne guiend̄ pe yquiin, zig nac zha ne guiend̄ tib nia, zha ne guiend̄ tib ni, zha ne roldгаа lo; <sup>14</sup>zeena gal̄ dze ne grieeban grē zha ne bioxco wban zigne racladz Dios, ine gley luu yгаа luu guiel̄nzaac ne tsieguial̄ luu gneedz me lo luu.

<sup>15</sup>Lad zha ne zobgrē me lo mezh ga, pquiab tib zho rēb:

—jDichos grë zha ne sca yгаа tsiesob lo mezh, tsietownie zho Dios zaatne rnabey me!

<sup>16</sup>Pquiab Jesús rëb me:

—Tib meñ name, nzian zha ne bredz me tsie tib wagw lidz me. <sup>17</sup>Zeene gol dze ne laa guielwagw co gac, pxeel me tib zhingundziin me ziexi grë zha co. <sup>18</sup>Per pasë zho nie, zhaase zhaase ncuaañe pquiaqui zho. Tib zho rëb: “Griee lod së naa, sac laa naa pca tib lë liu, ni lëetse nadze no gaso naa low; bzhiguiel gudz lo me gun me naa dispensar.” <sup>19</sup>Stib zho rëb: “Niina wriin pca naa gaay nëz ngon, laa naa no ganie ma dien zha run ma dziin, gudz lo me yquiambëzd me naa.” <sup>20</sup>Laa stib zho rëb: “Griee lod së naa, sac niina wriin ptsieelnia naa, bzhiguiel gudz lo me gacd guial naa.”

<sup>21</sup>Bdziñ ngundziin co bzodiidz zho lo me zha rzë xtiidz grë zha co. Zeene bin mew, wbinladz guic me, bnabey me zho güey zho dib lad guiedz güeyxi zho grë zha ne guiend pe yquiin, grë zha ne guiend nia, zha ne guiend ni, zha ne rold lo, grëse zho bdzinnie zho ga. <sup>22</sup>Blozh ga, rëbchaa zho lo me: “Laa naa wbirole xmandad luu gon, per scase noraa zaatne cue miech.” <sup>23</sup>Dzigo pxeel me zho stib, rëb me: “Güey dib ro guiedz, zha ne gdzieeltaa luu, dënie zho nëz rii, bloo guic zho guiaad zho; ib none tsodzëse miech lidz naa. <sup>24</sup>Sac grë zha ne bredz naa glo ga, ni lalnu racladzdraa naa yгаа zho guielwagw rii.”

### Zha ne racladz sëëb xnëz Jesús

(Mt. 10:37-38)

<sup>25</sup>Laa Jesús no nëz zie me nëz Jerusalén, miech guizhiu ne nal zhits me. Tibaque ptsire lo me bui me lo grë miech co, rëb me lo zho:

<sup>26</sup>—Lo grë to ne ziaadnal to zhits naa, gacnan to ganle zha ne racladz ygab xnëz naa, ib none gleynie zho mine rnabey naa. Sac zha ne mazdraa rleynie pxoz, mazdraa rleynie xnial, mazdragaa rleynie zho tsiel zho, xpëed zho, bets zho, bziangaa zho, xquielmban zhow, rquia zdoo zhow, peet xtsiind grë zha co par sëëb zho xnëz naa. <sup>27</sup>Sac ni tib zha ne sca yquia zdoo cueeladz zho zho guiaadnal zho zhits naa, griee lod ygab zho lo naa. <sup>28</sup>Antes ne yquiabladz to sëëb to xnëz naa, none wen wen sob to dien pe zlëb to ted to mine rieguial to.

<sup>29</sup>Zig nacse tib zha ne gzaa tib yu glaa ne gac chop tson xcuaa, led rzobgazh zho rbee zho cuent dien pe zgaa xtimi zho tsaalow. <sup>29</sup>Sac gon nenda loxaque cueeze zhow, ni lozh ga griee lod gzaalo zhow. Miech ne gana laa zho gzhidnie zho, <sup>30</sup>guiab zho: “Golwi lo zha qui ganle, loxaque bleeze zho lidz zho, na blëbd zho nzaalo zhow.” <sup>31</sup>Scaque rey ne no tilnie stib rey, led none sobgazh zho gan zho dien pe zlëëb tsii mil xmenguuib zho tsietilnie gal mil xmenguuib stib rey co. <sup>32</sup>Tejne rgobey me lëbd me, laga bii zit ziaad stib rey co, rxeel me bla zha ne tsie tsiennee dien zha gataa cuëz lo xtil zho.

<sup>33</sup>Scaque to nagon none glo gwi to pe nac grë ncuaañe no csaan to, parne griee lo ygab to xnëz naa. <sup>34</sup>Sac gon zed ne nzhid, çpa dien yquiina? <sup>35</sup>Per ni par gaca beeb peet xtsiinda; mine ractaaw, laaw rziaab. Zha ne no liaadz guien zho pe rnee naa, yquiaadiag zhow.

### Zha rzac Dios zha ne zozit lo me

(Mt. 18:10-14)

**15** Zeene rseed Jesús miech, nzian grè zha ne rtop dimi ne razh lo zha Roma, ni grè zha ne rzoob miech nac zha yozh, ye zho rbig zho rquiaadiag zho zhiwseed me. <sup>2</sup>Nacne grè zha farisé ni grè maistr ley, rneenè zho me, rnee zho lèda ga run me sca rtsieelsa me grè zha co, rownie me zho. <sup>3</sup>Dzigo bnee me lo zho, rëb me:

<sup>4</sup>—Togase nadien, gzoob ne quianie to tib gayoo mëcwxiiil, ni lega naclew rziaab tib ma, ¿zha dien run to? Led rsan to ma ne ndxie lo to ga lëë, laa to rie rieguib to ma ne bziaab ga, haxta rdziel to ma. <sup>5</sup>Zeene rdziel ma lo to, lo guieibley co haxta rxobyan to ma rdzinnie to ma ro yu. <sup>6</sup>Lëëléd rzodiidz tow lo zha ne ndzieeldiidz to, lo zha ne no gax lidz to, sac rley to laa xpëcwxiiil to brieequia. <sup>7</sup>Gni naa lo to ganle, scadaa nagon rzac Dios, tib guieibley nrooba lo me, zeene ran me laa tib zha ngoopdol rsaan xquieintseeb, laa zho rbig lo me. Ne nligaa tib guieibley rac zha co lo me, lëdle zha ne rzac miech wenle nac zho lo me.

<sup>8</sup>Zig rzacгаа tib men wnaa, gzoob ne nzhen me tsii gayoo pes, ni lega naclew rsëëb me tib gayoow, ¿zha dien run me? Led hor cogazh lëë rquiaa me biini, rsilo me dzega dzega rloob me len lidz me haxta rdziel me dimi co. <sup>9</sup>Zeene rdziel mew, rley me rzodiidz mew lo grè zha ne ndzieeldiidz me, lo grè zha ne no gax lidz me. <sup>10</sup>Zig rne naa ga, scadaa nagon rzac grè xanjl Dios, tib guieibley nrooba lo zho zeene ran zho laa tib zha ngoopdol rsaan xquieintseeb, laa zho rbig lo Dios.

<sup>11</sup>Dzigo psilo Jesús bzodiidz me tib cuent lo zho, rëb me:

—Tib men name quianie me chop mëëdbgui. <sup>12</sup>Tib dze, rëb zha ne nac zha niab lo me: “Papá, tel pe nac ncuaane no gneedz luu lo no, bzhiguiel niinaga beengrola, zeena gneedz luu mine raguiäl naa.” Dzigo beengrol me ncuaane rap me, bdeed mew lo zho.

<sup>13</sup>Zhisaque goca, pto zha niab co grëse ncuaane bial zho, briece zho laa zho zie. Bdziñ zho stib dan, ga been zho grè guieilyozh ne gocladztaa zho, grëse xtimi zho pxin zho ga. <sup>14</sup>Tibaque zeene laa xtimi zho blozh, mbanse rac zho guieñdraa pe gow zho, ni lëëtaque len dze co laa tib gbin psiloque nëz co. <sup>15</sup>Dzigo race zho güeyguib zho dziin lad guiedz co, ga brieequia tib men co bree zho, pxeel me zho yquiaanap zho nguts. <sup>16</sup>Lo gbin ne noded zho ga, rzac zho tebaa cho gdeed maase grè duuzhye dan ne row grè nguts co gow zho, per ni min co choot rdeete lo zho.

<sup>17</sup>Sca no zho ga, tibaque zeene biao zho biini psoladz zho nzian zha ne quia dziin lo pxoz zho, grè ncuaane raclo row grè zha co, haxta riaana, ni laa zho sca noded ga; rëbchaa zho: <sup>18</sup>“Mazd mine naca laa naa guia gdziin naa lo pxoz naa stib, guiep naa lo me gun me naa perdon grëtaa falt ne ben naa lo me, falt ne bengaa naa lo Dios. <sup>19</sup>Maase sacdraa me naa zig xpëed me, siguiel me ycaania me naa gac naa zig tib zha ne quiaze dziin lo me.” <sup>20</sup>Hor co bio zho

něz laa zho zey něz lidz pxoz zho. Zitraa ziaad zho laa me gonle zho, pquia zdoo me zho gon me zha rac zho; rias me güeydzieelo me zho bnaaz me nia zho, bdeedz me zho.

<sup>21</sup>“Papá”, rëb zho lo me, “rien naa nroob falt ne beñ naa lo Dios, bengaa naa lo luu. Rieguialdraa sac luu naa zig tib xpëed luu.”

<sup>22</sup>Ni blëzd me nlozh nee zho, lëëlëd bredz me zha ne quia xtsiin me, rëb me: “iNa goltënie tib nöz lar wen nu gacw xpëed naa! iGoltënie tib nil wen tso nia me, tib nöz guielguid cub yquia ni me!” <sup>23</sup>Bnabey me zho güeyxi zho tib ngon ne mazdraa ndaan, beet zho, rëb me: “iIb none gac tib lni, none dioow ne, none dio ne! <sup>24</sup>iSac gon gun naa cuent, brieeban xpëed rii naa! iBnitle me ga, na laa me bdziel!” iLaa lni psilo!

<sup>25</sup>Lni co noyac, zeene laa stib xpëed me zha ne nac zha gol ga wbire lo dziin dan. Bdziñ zho gax ro yu, rlu rquia di, haxta wiee rlu noyac; <sup>26</sup>dzigo bredz zho tib zha ne quia dziin lo pxoz zho ga, bnabdiidz zho dien pe lni ne noyac. <sup>27</sup>Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.”

<sup>28</sup>Blëe zha gol co bin zhow, lo guielblëe co bzëëbd zho ro yu. Nacne brieec pxoz zho, bnee me lo zho sëëb zho ro yu. <sup>29</sup>Dzigo rëbchaa zho lo me: “iLëdraaw i gon papá noyuu! Bui ganle blactaa iz ne quia yuu naa dziin lo luu, waltaa gard quits naa tib xtiidz luu. Ni zha rna tib dze, siquier tib chiv yeen ygad luu lo naa, gownie naa grë zha ne ndzieeldiiz naa. <sup>30</sup>Cho dzigo nac zha qui, blozhse güeyloozh zho xtimi luu lo grëtaa guielyozh ne been zho, na no luu beet luu ngon ne mazdraa ndaan, noyuu luu zhilni zho.” <sup>31</sup>Dzigo rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuane quianie naa, luu guiaanniew. <sup>32</sup>Per niina ne laa bets luu blanso, ib nonguiela znu dziuun ne tib lni gleynie ne me; sac gon bnit me, ni na laa me bdziel. iDziuun ne cuent brieeban me nu!”

### Ligier miech par lo guielntseeb

**16** Tib vuelt bzodiidz Jesús tib cuent lo xpëedscuel me, rëb me:

—Tib men name nroob rapchen me, quianie me tib zha ne zo lo grëtaa ncuane rap me; tib dzew, lega nacle bded diag me zhliaan noxin zha co xtimi me. <sup>2</sup>Dzigo bredz me zho, rëb me lo zho: “Lëda i gon squi run luu, lega noxin luu xtimi naa. Niinaga racladz naa guiaadnie luu cuent nu dien zha quia yuu luu dziin; sac grielodraa so luu lo grë ncuane rap naa.”

<sup>3</sup>Wbire zho ga, rëb zho: “Zha na ganle gun naa, telne guiab ne ga naa dziin dan, lëbdraa naa gun naa dziin co; tel guiaabгаа ne na ga naa gatop naa gon, rtoladz naa gnab naa gon lo miech.” <sup>4</sup>Tibaque zeene biab guic zho rëb zho: “iLaa naa bienle zha gun naa, zeena tso zha ne gun xyudar naa zeene laa naa grie lo xtsiin men rii!”

<sup>5</sup>Dzigo psilo zho bredz zho zha ne quia guielqui lo men ne quia zho xtsiin ga. Bdziñ tib zha co bnabdiidz zho lo zho dien palal nzeëb zho lo me. <sup>6</sup>Rëb

zha co: “Tib gayoo tamb nceit nac miñe nzëeb naa lo me.” Dzigo rëbchaa zho: “Nliw, lalga quia lo tib val ne psan̄ luu nu. Ledaa val co nu, zac ctsieez luuw; bzhixcuaa stiba, pquiaa lo co, grol̄ gayooque tamba zëeb luu.” <sup>7</sup>Bdzinaque stib zha co, bnabdiidz zho lo zho dien̄ palal nac xquielqui zho lo men̄ co. Zha co rëb zëeb zho tib gayoo sac zhobxtil. Dzigo rëbchaa zho: “Nliw, lalga raquiet lo val ne psan̄ luu; per na zac ctsieez luu miñ̄ rii, bzhixcuaa stiba, pquiaa lo co tapgalaque saca zëeb luu.”

<sup>8</sup>Zeene bien̄ men̄ co zha noyun̄ zho, bzee zdoo me gon̄ me scataa ndzielguic zho. Ncuaañe ntoladza, per grëse miech ne zienal̄ ncuaañ lo guidzliu rii, ndzielguic zho par gon̄ zho grë guieñtseeb. Par miñ̄ co ndziibraa ndzielguic zho lo zha ne no xnëz Dios. <sup>9</sup>Sangue to gzoobladzde to gon̄ to miñ̄ co, ncuaañe rap to lo guidzliu rii, golquiina per par gon̄ to xyudar samiech to. Zeene laa ncuaañ co grë, nenda zacnie zho to, per miñe mazdraa non Diossi ible zacnie me to, zneedz me tib lugar ndzon cuëz to, led yedraa ga pe nitlo.

<sup>10</sup>Zha ne ndzinli run̄dziin tel̄ palal yeense ncuaañe riaannie zho, scaque ndzinli gundziin zhow zeene guiaannie zho nrooba. Laa zha ne ndzinlid, miñe gon̄ zho zeene guiaannie zho ncuaañ zhis, miñcoque gon̄ zho zeene guiaannie zho ncuaañe nroob. <sup>11</sup>Nana zha ne sca gacd ne ndzinlise gundziin zho ncuaañe no lo guidzliu rii, ¿zha dzigo grielo gundziin zho ncuaañ ndzon ne gdeed Dios lo zho zaatne no me? <sup>12</sup>Stiba, tel̄ sca ndzinlide to lo chen̄ ben̄, ¿pe naczhe ncuaañe gon̄ to tib ncuaañe chen̄paa to? <sup>13</sup>Gol̄gona gan̄le, grielod gon̄ gleynie to dimi ni gleynieque Dios. Ib none tel̄ne Dios rleynie to, me none gleynie to, togo dimigaaw, dimi golleynie.

<sup>14</sup>Grë zha ne nac farisé zeene gon̄ zho sca rnee me, lel̄ rzhidznie zho me, sac tel̄ zhaw rleyniedox zho dimi. <sup>15</sup>Dzigo rëbchaa me lo zho:

—Masaque rzac to nalëe nli miech wen nac to nëz lo Dios, sangue me gon̄, wen wen nan̄ me zha nac zdoo to. Nli miech ne ran̄ to, zha wen rzoob zho to; sangue Dios ni lalnu rzacd zdoo me miñe run̄ to.

<sup>16</sup>Len̄ dze ne gard guiaad Juan Bautist, niapse xley Moisés ni grë miñe bnee zha ne biadteed xtiidz Dios, miñ̄ co nac miñe güeynal̄ to. Per zeene psilo Juan pseed me miech, desde hor co laa miech quiaacnan̄ stib mod ne grielo ygaa zho zaatne rnabey Dios; gane na nzian zha ne noxco ygaa lugar co. <sup>17</sup>Per guiabde to togo nondraa ley, sac grëse miñe zhobnee lo ley, jib laaw none gac! ¿Zig nac guidzliu, zig nac gbaa zrieelo nitlow, sangue ley nitloda, tibaque naca! <sup>18</sup>Gacxe waa, grë zha bgui ne rsëbtsieel niina ni rtsieelnia zho stib wnaa, zha ne rtsieelniagaa tib wnaa ne psëëbtsieel, dol̄ ga quiayun̄ zho; zigtaa dol̄a padzeela, scaque niina dol̄a.

### Xcuent tib zha prob lë Lazh

<sup>19</sup>Tib ricw name —rëb Jesús—, niapse grë lar niazh racw me, gzobse dze run̄ me lni lidz me. <sup>20</sup>Zaatne noque me ga, guiedz co no tib zha prob lë Lazh, lala prob me ni rlanaque me guiedz, gdipse lad me noyacnë guiedz co. Riese me riesob me ro lidz zha ricw co, <sup>21</sup>rquiambëz me dien̄ pe grielod gow me

maase ncuaaṅe rrieengaale lo xmezḥ meṅ co; ga zob me haxta rdziṅ grē mēcw rzēēludz ma lo guiedz ne rlan me ga.

<sup>22</sup>’Bdziṅ dzew laa Lazḥ gut, dzigo biet xanjḷ Dios beynie zho me lo Abraham, zaatne rdziṅ grē zha wen. Goc palal dzew, laa meṅ ricw co gutaque, blozhse pquianap zho me, laa zho güeyqueets me; <sup>23</sup>zeēṅe bīaa me biini laa me nole gabiḷ. Lēbdraa me no me lo guieḷnē co, lega naclew blis lo me, zit squi goṅ me Abraham, laa Lazḥ zobnie Abraham ga.

<sup>24</sup>’Hor co bnaḥ me lo Abraham siguiel Abraham cxeel me Lazḥ, maase guic mzhugniase Lazḥ yquiaa Lazḥ nis tsiegadz Lazḥ lo ludz me; sac lēbdraa me lo gui dox ne no me ga. <sup>25</sup>Dzigo rēbchaa Abraham lo me: “Xin, psoladz ganḷe zeēṅe wban luu lo guidzliu, ncuaaṅe gocladztaa luu pquianie luuw; laa Lazḥ mbanse bded me. Nagaa na, me nac meṅ ne nogaa noyaṅ guieḷbley, laa luu bgaa squi no luu lo guieḷnē qui. <sup>26</sup>Stiba, zha ne no nēz rii gacd guīaad zho i, niicle zha ne nogaa iw, gacd guīaad zho nēz rii; sac no tib yee dox ne rtse.” <sup>27</sup>“Bzhiguiel sca”, rēb meṅ ricw co, “pxeel Lazḥ tsie me lidz pxoz naa, <sup>28</sup>tsienie me diidz lo zgaay bets naa zha ne bīaaṅ, guiab me lo zho ib guṅd zho miṅe beṅ naa, zeēṅa guīaate zho nu yгаа zho lo guieḷnē dox rii.” <sup>29</sup>Pquiabchaa Abraham, rēb Abraham: “Tel miṅcow, tsow glab zho lo grē ley ne psan Moisés, lo grē miṅe bnee grē zha ne güeyteed xtiidz Dios, benque lo co zḥobnee zha no gban zho.” <sup>30</sup>“Nliw”, rēb me, “per tel squi tib meṅ ne gutle tsie tsienee lo zho, rien naa znuse csaan zho xquieḷntseeb zho gbig zho lo Dios.” <sup>31</sup>Dzigo rēbchaa Abraham: “Telne rond zho miṅe rnabey grē ley ne psan Moisés, grē miṅe bnee zha ne güeyteed xtiidz Dios, scaque gond zho diidz niicle tsie tib zha ne brieēbanle tsienee lo zho.”

### Zha ne guṅctal xtoḷ stib zho

(Mt. 18:6-7, 21-22; Mr. 9:42)

**17** Tib vuelt rēb Jesús lo xpēēdsuel me:

—Nac lo guidzliu rii, ib guṅfalte ncuaaṅe rgogui miech guṅctal zho xtoḷ zho, ḷper probsaxe zha ne rquiil samiech ruṅctal zho xtoḷ zho! <sup>2</sup>Mazd zhi guieḷnēw lo zho ygadoo tib quie molin zhobxtil yaṅ zho tsieron zho zho nisdoḷ, lēdle guieḷnē dox ne gan zho; sac gon doḷ nroob ga guṅ zho yquiil zho zha ndooladz ne no xnēz naa. <sup>3</sup>ḷGolguieṅ sca ndzinli golgac! Tib bets tow, zeēṅe pe tib falt guṅ zho lo to, goḷnee lo zho guṅdraa zḥow; telne gnab zho perdon, golguṅ zho perdon. <sup>4</sup>Niicle telne nzian vuelt sca guṅ zho falt lo luu tib dze, beēṅ zho perdon zeēṅe laa zho rbig rnab zho perdon lo luu.

<sup>5</sup>Stib dzew, rēb zha ne rzēnie me lo me:

—Bneedz guieḷbiini lo no dib zdooraa no gnalo no Dios.

<sup>6</sup>Pquiab me rēb me:

—Tel niaca miṅe gzoob ne rnalole to Dios siquier lal tib midz moxtaz, niicle ncuaaṅe mazdraa ngaṅ gnab to lo me, zuṅ mew.

<sup>7</sup>ḷPe ran to ganḷe, zha nac zha ne run xtsiṅ beṅ? Zeēṅe rbire zho dan, yase güey zho gon, güeyгаа zho güeyquianap zho ma, pe liaadz meṅ ne quia zho



xtsiin ga, guiab me lo zho: “Na bded, bzob, zeena gowxtsee luu.” <sup>8</sup> Mine run me, gloque rnabey me zho gunlo zho ncuane gowxtsee me, gdziib zhow lo me; rlozraa row me, dzigora rowxtsee zho. <sup>9</sup> Niicle scataa ron zho mine rnabey me, ni rlozh ga, per ni xquizh rdeete me lo zho. <sup>10</sup> Scaque to nagon, zeene lozh gun to grè dziin ne pso Dios to gun to, peet yquiambèzde to, golguien tib ngundziinse nac to, mine rieguial to ga, min co been to.

### Biac tsii zha ne rlan guiedz lepr

<sup>11</sup> Laa Jesús no nêz zie me nêz Jerusalén. Laa me zieded tib guiedz win ne riaan zaatne ndzieel xtan Samar xtan zha Galilé, <sup>12</sup> zeene briequia tsii zha ne rlan guiedz lepr. Zit zo zho, <sup>13</sup> nguiedz rbedz zho me, rnab zho lo me yquia zdo me zho. <sup>14</sup> Zeene gon me zho, rëbchaa me lo zho:

—¡Goltsie, goltsielulo lo pxoz, zeena gan zho ganle laa to biacle!

Dzigo laa zho zie. Nêz no zho laa zho biaanmbe lo guiedz co. <sup>15-16</sup> Lo gza zho, hor co rias tib zho wbiere, nguiedz rnee zho:

—¡Zha ndzontaa Dios! ¡Golwi ganle laa me beenguiacle naa!

Zigne bdzin zho lo Jesús, pquiitsgzhib zho lo me, haxta bdzin lo zho lo liu, rdeed zho xquizh lo me. Tib zha Samara, zha zit nac zho. <sup>17</sup> Dzigo rëbchaa Jesús:

—¿Yoraazhe grè zha co waa? Conque tsii zho name beenguiac naa. <sup>18</sup> ¿Tibaque zha zit rii dzigo lëë rzac zdo mine been Dios lo zho?

<sup>19</sup> Dzigo bliso me zha co ga, rëb me lo zho:

—Porne dib zdo luu gon bnaloo Dios, gane biac luu. Bzë, peet tsieniedraa guic luu.

### Zeene gbiire guiaad Mgui ne pxeel Dios

(Mt. 24:23-28, 36-41)

<sup>20</sup> Tib dze bnabdiidz zha farisé lo Jesús, rëb zho:

—¿Poc dzigo csilo gnabey Dios lo ne?

Dzigo pquiab me rëb me lo zho:

—Gacnan to ganle, nacd min co ncuane ganlopaa miech. <sup>21</sup> Griielod guiab zho laaw psilo nec, laaw psilolegaa nêz rii; sac gon tel niina laa me quianabeyle nu.

<sup>22</sup> Bded ga, rëbchaa me lo xpëedscuel me:

—Zdzin dze, gacladz to tebaa zha znu so naa lo to maase tibaque dze, per gacdraaw. <sup>23</sup> Len dze co, zio zha ne gnè lo to: “Goltè ganle laa Mgui ne pxeel Dios bdzin nu”; gnëgaa zho pa stib lugar none tsie to par gan to naa; tsienalde to, gliladzde to xtiidz zho. <sup>24</sup> Sac zeene gbiire guial naa, grëse miech gana. Zig nac tel guiab tib belye nroob ne glu zhan gbaa desde nêz ne rlan ngbidz haxta nêz ne rzëëb ngbidz, ¿niacxe gand grëse miecha? <sup>25</sup> Per ansraa ne gac min co, ible nroob guieinë ne cteed miech rii naa, ni lalnu gandzed zho naa. <sup>26-27</sup> Len dze ne guial naa ga, grè miech ne ndxie lo guidzliu gal hor co, zhaa grè ncuane tsonie guic zho.

'Rsoladz to ganle zha rac miech len dze ne biaad Noé, lej lo grë zhillni zho no zho, zha ne notsieelnia, zha ne nobediin xpëed, tibaque zeene biao zho biini laa guie dox co psilole. Laa Noé nole len barcw, laa zho biaan grëse zho bnitlo lo nis co. Scadaa nagon no miech len dze ne guial naa. <sup>28</sup>Zig racгаа miech Sodom len dze ne brie Lot ga. Scaque, loxaque ncuuan lo guidzliu rii noxco zho, zha ne no lo zhillni, zha ne no zhiwto, zha ne nozigaa, zha ne quia gon, zha ne quiazhixcuaagaa lidz. <sup>29</sup>Lega naclew, zeene laa Lot brie, hor co laa tib gui dox biet gbaa, notsa zufr bliaala lad guiedz co, grëse miech co bnitlo lo gui dox co. <sup>30</sup>Scapaa nagon rac miech ne ndxie lo guidzliu len dze ne laa naa guial.

<sup>31</sup>'Zha ne lëetaque hor co no glaa guic yu, ib guiabd zho sëeb zho len yu tsiebee zho ncuane no len lidz zho, zha ne quiagaa lo dziin dana, ib guiabd zho gbi zho guey zho ro yu. <sup>32</sup>¡Golsoladz ganle zha bzhaac wnaa ne goc tsieel Lot! <sup>33</sup>Grëse miech, zha ne sca rquianë zdoos grë ncuane rap zho, ible znitlo zho xquielmban zho; sangue zha ne rquiad zdoos grë ncuuan co, haxta xquielmban zho rbeeladz zhow, nitlod zho. <sup>34</sup>Gal hor co, zaatne tipse nixgues chop zho, tib zho sēnal zhits naa, laa stib zho guiaan. <sup>35-36</sup>Zaatne tipse quia yot chop wnaa, zaatne tipsegaa quia chop mguil lo dziin dana, tib zho sēnal zhits naa, laa stib zho guiaan.

<sup>37</sup>Dzigo rëbchaa xpëedscuel me lo me:

—¿Pa lo dzigo gdzin grë zha co?

Pquiab me rëb me:

—Hor co bii zlu ganle paw. Zig nac grë pech, zaatne nix magut ga rdzin ma.

### Zha ne rnab lo Dios

**18** <sup>1-2</sup>Stib dzew, bzodiidz Jesús tib cuent lo xpëedscuel me, par guien zho ib guiaan zdoos zho zeene racniobd mine quianab zho lo Dios, rëb me:

—Tib guiedz name, no tib men co nac me wxtis, ni palal rquiad zdoos me samiech me, per ni Dios rdziebd me. <sup>3</sup>Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlëe lo zhuz. <sup>4-5</sup>Glo ib rquiaadiagd me mine rnab zhuz co, per zeene goc palal dze gon me tibaque quia men co quianab me gac guielwxtis, dzigotaa rëb me: "Ncuane lëbdraa guic naa lo men rii, tibaque squi quia me. Nli rdziebd naa Dios, niicle nodgaa naa liaadz pe rzac miech, per parne guiadgunneetraa me naa, mine naca mazd laa naa gun guielwxtis ne rnab me."

<sup>6</sup>Blozhse bzodiidz Jesús cuent co, rëbchaa me lo zho:

—Telne sca bdzin dze ne pquaadiag zha ntseeb co mine bnab wnaa viud co, <sup>7</sup>¿pe le Dios dzigo yquiaadiagd xtiidz zha ne ngab lo me, tel tibaque gnab zho mine racladz zho? <sup>8</sup>¡Nligaa, ib tedsod zun me mine rnab zho! Per segur zhis zho quiambëz gac xquielwxtis me, zeene laa naa guial stib.

<sup>9</sup>Laa grë zha ne riats, zha ne rzac masaque zha wen nac zho nëz lo Dios, haxta rbix zdoos zho ran zho grëraa miech, bnee Jesús lo zho, rëb me:

<sup>10</sup>—Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma. <sup>11</sup>Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grë miech ngoopdol, zig nacse zha ne zo i. Wlaltaa rund naa guielgbaan, rund naa guielntseeb, niicle rquiangoobd naa stib wnaa. <sup>12</sup>Haxta chop vuelt rcuan naa tib len zmal, grëse ncuaane run naa gan, run naaw tsii lal, rnedz naa tib lal mine rieguial luu.” <sup>13</sup>Laa zha ne rtop dimi ne razh Roma ga, gaxaque ga zo zho, per nquitsrunse zho liu. Mban rac zho, quiase nia zho zdoo zho, rnee zho lo Dios: “¡Dios, rnab naa lo luu pquia zdoo naa znutaa miech ngoopdol nac naa!”

<sup>14</sup>Gneli naa lo to ganle —rëb Jesús—, mazdraa gon wen biaan recaudador co lo Dios, lëdle zha farisé co. Sac zha ne lëëque zha runnon zho, racnond zho lo Dios, laa zha ne riaanwin, runnon me zho.

### **Beenlay Jesús mëedlas**

*(Mt. 19:13-15; Mr. 10:13-16)*

<sup>15</sup>Tib dze, nzian men ne bdziñ lo Jesús, bdziñnie zho xpëedlas zho lo me, parne cxobnia me guic win gunlay me win. Grë zha ne nac xpëedscuel me, lel psilo zho ndox zho lo grë zha ne bdziñnie grë mëedlas co. <sup>16</sup>Zeene gon me sca quiayun zho, dzigo bredz me zho, rëb me lo zho:

—¡Ctsirede to grë mëedlas yeen qui! ¡Golsaan guiaad win lo naa! Sac gon grë mëedlas yeen qui, ni zha ne nac zig nac win, zha co nac zha ne sëëb ygab lo Dios. <sup>17</sup>Nligaa zha ne gacndooladzd, zha ne gliladzd dib zdoo, zigne run grë mëedlas, grieelod gdziñ zho zaatne rnabey Dios.

### **Ncuaane run dimi**

*(Mt. 19:16-30; Mr. 10:17-31)*

<sup>18</sup>Tib vuelt, wbig tib men ne nac zha non lo menguedz Israel, rëb me lo Jesús: —Nan naa luu nac tib men ne noseed miech, ni tib men wen nac luu, çbnë lo naa dien, pe nac mine gun naa parne grielo yгаа naa guielmban ndzon ne gdziñd dze lozh?

<sup>19</sup>Pquiab Jesús rëb me:

—Rnee luu lëë tib miech wen nac naa. ¡Nligaaw, Diosse gon nac men wen! <sup>20</sup>Telne nli racladz luu yгаа luu guielmban co, none tsoxco luu gban luu zigne nac Xley Dios. Nanle luu ganle zha naca, rneew:

Tsonied luu zha ne led tsieeld luu,

gute luu samiech luu,

cuand luu samiech luu,

yquiadiidzguizhd luu samiech luu.

Gon pxoz luu, gon xniaa luu, cued luu xquielto me.

<sup>21</sup>Dzigo rëbchaa men co:

—Maestro, grëse mine bzeet luu i, ni tiba gard quits naa wlal ne nac naa zha nguieg.

<sup>22</sup>Hor co rëb Jesús lo me:

—Stibaque minë rquiin gun̄ luu. Güey, güeyto grëse ncuaañe quianie luu, dzigo bdiiz dimi co lo grë zha mban ne guiend̄ pe yquiin; sca nroobraa guiel̄nzaac ne yгаа luu gbaa. Lozh ga, dë, dënal̄ zhits naa.

<sup>23</sup>Zeene bin men̄ co sca rëb Jesús, mbanse rac me laa me zey; sac nroob ncuaañe quianie me. <sup>24</sup>Dzigo rëbchaa Jesús lo xpëed̄scuel me:

—iZha ngantaa lëë, rzac zha ne squi rapchen̄ sëëb zho xnëz Dios gnabey me zho! <sup>25</sup>Mazd ngand̄se rded tib camell̄ guieer guzh.

<sup>26</sup>Grë zha ne ndxie ga, zeene bin zho sca rëb me, rneechaa zho:

—Tel̄ne scataa ngan̄ sëëb miech xnëz Dios, ¿chousezhe dzigo waa nac zha ne zrieelo sëëb xnëz me?

<sup>27</sup>Dzigo rëbchaa Jesús:

—Nligaa par miech, zootle tsod zha ne grieelo sëëb xnëz me; sangue me nan̄ me no zho. Sac tel̄ me, tsod ncuaañe grieelod gun̄ me.

<sup>28</sup>Hor co pquiab Pedr, rëb Pedr lo me:

—Tel̄ no, grë ncuaañe rdziaapse no psan̄ now, laa no ziaadnal̄ zhits luu.

<sup>29</sup>Pquiab me rëb me:

—Golgacnana gan̄le, grëse zha ne psan̄ lidz, psan̄ zho tsiel̄ zho, psan̄ zho xpëed̄ zho, psan̄ zho pxoz zho, psan̄ zho xniaa zho, psan̄ zho bets zho, bziangaa zho, porne bzëëb zho xnëz Dios, <sup>30</sup>na lo guiel̄mban riique, mazdraa nroob minë gan̄ zho, ni lozh ga ib tedsod zгаа zho guiel̄mban ndzon ne gdzind̄raa dze lozh.

### **Bzeet Jesús stib zha csacsi miech me**

*(Mt. 20:17-19; Mr. 10:32-34)*

<sup>31</sup>Ne sca no Jesús nëz zie me nëz Jerusalén, tibaque bredz me gza tsiipchop zha ne rzëniepaa me ga, bzeet me lo zho zha gun̄ miech me, rëb me:

—Grëse minë bzeetle zha ne biadteed xtiidz Dios padzeela teed naa, niina ne laa ne gdziñ̄ Jerusalén, laaw gac cumplir. <sup>32</sup>Ga gnaaz zho naa, tsielo zho naa ladznia grë zha ne nacdraa zha Israel, xidznie zho naa, squiaago zho naa, stsuc zho lo naa, <sup>33</sup>zguin̄ zho naa, ni haxta zut zho naa. Per zeene gac tson ngbidza, zriibaan naa.

<sup>34</sup>Per ib biend̄ zho dien̄ zha nacne sca rnee me.

### **Biac tib zha ne rold lo**

*(Mt. 20:29-34; Mr. 10:46-52)*

<sup>35</sup>Laa Jesús bzëëb ro guiedz Jericó, miech guizhiu ne nal̄ zhits me. Ro nëz co zob tib men̄ ne rold lo, rnab me gon. <sup>36</sup>Zeene bien̄ me rlu nzian miech noded ga, dzigo bnabdiidz me dien̄ pe nacne scataa ziaad grë miech co ga. <sup>37</sup>Dzigo rëb zho lo me, Jesús, men̄ Nazaret ziaad ga, zhits me ziaadnal̄ grë miech co.

<sup>38</sup>Hor co psilo me guiedz rbedz me, rnee me:

—iJesús, men̄ xtii rey David, pquia zdoo naa!

<sup>39</sup>Grè zha ne ner, psilo zho ndox zho lo me parne guioog ro me, per leḷ hor cole nguiedzraa rbedz me Jesús, rnab me yquia zdoo Jesús me. <sup>40</sup>Nacne zeene bdziṅ Jesús gax zaatne zob me, blèz Jesús, bnabey Jesús güeyxi zho me. Bdziṅ me lo Jesús, rëbchaa Jesús lo me:

<sup>41</sup>—;Pe nadien gonṅ luu naa?

Pquiab me rëb me:

—;Racladz naa guiac lo naa!

<sup>42</sup>Dzigo rëbchaa Jesús:

—;Niinagazh gonṅ laa luu ganṅ stib! Laa luu biac, sacne dib zdoo luu bnaloo luu naa.

<sup>43</sup>Hor cogazh laa menṅ co psilo bui, ine rley me roolnie me Dios, laa me zienalṅ zhits Jesús. Haxta grè miech ne zienalṅ ga, zeene gonṅ zhow, ye zho roolnie zho Dios.

### Güey Jesús lidz tib menṅ lë Zaquew

**19** <sup>1-2</sup>Guiedz Jericó, ga no tib menṅ ne rnabey lo grè zha ne rtop dimi ne razh lo rey Roma, lë me Zaquew. Zeene laa Jesús zieded lad guiedz co, <sup>3</sup>briee me, ziewi me, sac racladz me gunbey me Jesús. Bdziṅ me, pasëse me ganṅ me Jesús, sac lala miech guizhiu ne nalṅ zhits Jesús, ni lala ndopse me. <sup>4</sup>Mine beenṅ me, rias me bdedner me güeytsep me tib lo yag guigw zob ro nëz co, par gdeeda diidz ganṅ me Jesús, zeene laa Jesús ted ga. <sup>5</sup>Zeene laa Jesús bded ga, blis lo Jesús gonṅ Jesús laa me zob ga, dzigo bredz Jesús me, rëb Jesús lo me:

—Zaquew, na zeena biet i. Sac racladz naa, lidz luu cuëz naa nadze.

<sup>6</sup>Rley Zaquew gonṅ Zaquew sca rëb Jesús, lëälëd biet me lo yag co, laa me zienie Jesús nëz lidz me.

<sup>7</sup>Zeene gonṅ grè miech cow, rlëë zho, rnee zho:

—;Pe lëëtaa lidz zha ngoopdolṅ qui ziebëz me!

<sup>8</sup>Laa Zaquew, ine rley zobnie Jesús. Tibaque bzoli Zaquew, rëb Zaquew:

—Gacnanṅ luu gonṅ, lo grè ncuaaṅ rap naa, laa naa gded groḷa ygaaz lo grè zha ne guiendṅ pe yquiin, ni telṅ nogaa zha ne ndziibraa mine beenṅquizh naa zho, naa maase ctsiree naa tap lal mine blan naa zho ga.

<sup>9</sup>Hor co pquiab Jesús, rëb me lo zha ne ndxie ga:

—I nagonṅ rlu laa menṅ qui wbigle lo Dios, parne ycaania Dios me. Nli zha xtii Abraham nac me, per bzonziaab me <sup>10</sup>ni naa ne nac naa Mgui ne pxeelṅ Dios, ible laa naa zialṅ zialsilaa naa grè zha ne zonziaab.

### Zha ne biaannie dimi

<sup>11</sup>Grè miech ne zienalṅ zhits Jesús ga, rzac zho zigne laa me gdziṅ Jerusalén, laa me sob gac me zhirey zho; nacne bzodiidz me tib cuent rii, rëb me lo zho:

<sup>12</sup>—Tib xpëed zha non name, no me tib guiedz win, nacle diidza laa me no tsie zaatne zob menṅ nroob ne rnabey, parne gzo zho me gac me rey guiedz ne no me ga. <sup>13</sup>Zeene laa dze co bdziṅ, dzigo bredz me tsii zha ne quia xtsiin

me, nroob dimi ne psan me lo zho tib tib zho, parne gundziin zhow, mientras gbire me.

<sup>14</sup>Nzianlaa zha ladz me, rlëe zho ran zho me, dzigo pxeel zho bla zha ne güey lo men ne rnabey ne zie me ga, güey nab zho gdeete men co dziin co lo me. <sup>15</sup>Per niicle sca güey grë zha co, peet brieelod niun zho. Blozhse bzo rey co me, laa me bdziin ladz me. Zeene bdziin me, bredz me gza zha ne biaannie xtimi me ga, par dien palal ziyaca. <sup>16</sup>Bdziin tib zho, rëb zho: “Laa xtimi luu nu gon, tsii lal mine psan luu ga naca niina.” <sup>17</sup>Rley me rëb me lo zho: “iZha squi nagon racladz naa! iWen brieequia xtsiin luu! Niicle zhis ncuane psan naa lo luu, per bien luu niowse bendziin luuw. Na nagon, laa naa gzo luu, gnabey luu tsii guiedz.” <sup>18</sup>Bdziin stib zho, rëb zho: “Laa xtimi luu nu gon, gaay lal mine psan luu lo naa ga naca niina.” <sup>19</sup>Scaque rley me. Bzo me zho gnabey zho gaay guiedz.

<sup>20-21</sup>Zeene bdziintaa tib zho, rëb zho: “Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana; gane mazd pquia naaw tib lë lo lar, blootsow naaw, ledaaw nu.” <sup>22</sup>Blëe guic me, rëb me lo zho: “iBiche nu, paat rquiind naa miech yozh ne squi nac! Conque nanle luu zha nac naa, <sup>23</sup>i pex nac dzigo waa bioxcod luu maase mbediin luu dimi qui, ndziniaaw palal ncaania naaw niina?” <sup>24</sup>Dzigo rëbchaa me lo grë zha ne ndxie ga: “Niinagazh golcob dimi qui nia zha qui, goldeeda lo zha ne ziaadnie tsii lala i.” <sup>25</sup>Pquiab zho rëb zho: “Per pe nacne zha coque ycaaniaw, ni nrooblew beenlo zho.” <sup>26</sup>“Ib sca no gaca”, rëb me, “sac zha ne rien zha gundziin zho ncuane rcaania zho, nroobraa ncuane ycaania zho. Laa zha ne squi nac, haxta mine pcaaniale zho, zdiobba lo zho. <sup>27</sup>Sangue zha ne sca ptsidil niac naa rey, goltsiexi zho, niinaga racladz naa ganlo naa gut to zho.”

### Bdziin Jesús Jerusalén

(Mt. 21:1-17; Mr. 11:1-11, 15-19; Jn. 2:13-22; 12:12-19)

<sup>28</sup>Blozhse bzodiidz Jesús cuent co lo zho, laa zho bio nëz stib, nerse me lo zho. <sup>29</sup>Zeene bdziin zho gax Gui Oliv, zaatne ndxie guiedz Betfagé ni guiedz Betain, pxeel me chop xpëedscuel me, <sup>30</sup>rëb me lo zho:

—Goltsie guiedz win ne ndxie danse lo ne i. Ga gdziin to zaatne quiadoo tib burr yeen ne choot gard sob lad, dzigo golxadz ma, goltënie ma nu. <sup>31</sup>Tel cho gnabdiidz lo to pe nacne noxadz to ma, golguiab lo zho: men ne rnabey ne, men co rquiin ma.

<sup>32</sup>Laa zho zie. Bdziin zho, zaatne quiadoo burr co, <sup>33</sup>nligaa, lëetaque noxadz zho ma, zeene laa bizhuan ma bdziin.

—iPe gun to xpurr naa? —rëb me lo zho—. iPe nacne noxadz to ma?

<sup>34</sup>Dzigo rëbchaa zho:

—Men ne rnabey ne, men co rquiin ma.

<sup>35</sup>Bdziinnie zho ma lo Jesús, pxob zho lar ne rbix zho lad ma, bzob me ma. <sup>36</sup>Zigse zie me, no grë miech guizhiu co rta zho xab zho ro nëz rded burr ne

zob me ga. <sup>37</sup>Grëse miech co, rleynie zho me. Laa zho xiuxto dze cho gui Oliv, zeene psilo zho nguiedz zëëb tsi zho, rley zho roolnie zho Dios, por grëtaa milagr ne ziyañ zho ruñ Jesús; <sup>38</sup>rnee zho:

—¡Nasi laa Dios pxeel zhirey ne! ¡Zha ndzontaa Dios! ¡Haxta gbaa noyac guielbley dze rii!

<sup>39</sup>Blalaa zha farisé ne zianał ga, zeene gon zho zha roolnie grë miech co me, wbig zho lo me, rnab zho gnee me lo zho guioog ro zho. <sup>40</sup>Dzigo rëbchaa me:

—¡Zac guioog ro zho, per hor co dzigo laa grë quie rii csilo goolniew naa!

<sup>41</sup>Zeene bdziñ me zaatne nieenpaa Jerusalén, psilo biab guielñe me, biin me gon me guiedz co, <sup>42</sup>rëb me:

—¡Prob to men Jerusalén! ¡Tebaa ye to niñ niunbey to men ne needz guielbley rii lo to! Per na ib biende tow, masaque rzac to zig zha ne nioog lo. <sup>43</sup>Na nagon laa dze co bdedle. Grë zha ne rlëë lo to, ible ziaad zho ziadsoog corral zho to, ni tib nëz tedlaade to lo zho, <sup>44</sup>haxta guiab to ladznia zho, grë xpëëd to. Znitlo zho ladz to, nëzrii nëzrec glaal zho grë quie ne niaa grë lidz to i; sac squi been to ib pcaaniade to Dios, zeene biaadpaa me nsilaa me to lo xtol to.

<sup>45</sup>Bdziñ me Jerusalén, güey me yadoo, psilo me blee me grëse zha ne noyñ lgui ga, rëb me lo zho:

<sup>46</sup>—Znu zhobnee lo Xtiidz Dios: “Zaatne nac lidz naa, ga none guiaad miech gzodiidznie zho naa.” Laa to gon, quiayun to lugar rii zig tib zhibliee ngbaan.

<sup>47</sup>Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo menguiedz, quiaguib zho dien zha gdeeda diidz gut zho me. <sup>48</sup>Per rdziel zho dien zha gun zho, sac tibaque ndxie miech lo me, grëse zho rquiaadiag zho zhiwseed me.

### Bnabdiidz zho cho nac Jesús

(Mt. 21:23-27; Mr. 11:27-33)

**20** Len dze ne sca noseed me miech len yadoo, nonee me lo zho zha nac Xtiidz Dios, tib vuelte bdziñ bla zha ne nac pxoz ne rnabey, grë zho bla maistr ley ni zla men ne nac men non lo menguiedz, <sup>2</sup>rnabdiidz zho lo me dien cho nac me, cho rnabey me, zha nacne sca quiayun me. <sup>3</sup>Dzigo rëbchaa me lo zho:

—Ye naa laa naa gun tib wnbdiidz lo to. <sup>4</sup>Golñe dien cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

<sup>5</sup>Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to minë bnee Juan?” <sup>6</sup>Teł na dzieetsgaa ne, miechse pxeel Juan, grieequiadaque ne; zgoquie menguiedz ne, sac grëse zho rililadz Dios pxeel Juan.

<sup>7</sup>Dzigo mazd lëë gdib minë been zho, rëb zho nand zho dien cho pxeel Juan.

<sup>8</sup>Nacne rëbchaa Jesús lo zho:

—Niicle naagaa nagon, grieelod gni naa lo to cho rnabey naa quiayun naa grë min rii.

### Xcuent zha ne pquianap liu

(Mt. 21:33-46; 22:15-22; Mr. 12:1-17)

<sup>9</sup>Blozhse ga, biire psilo me noseed me grë miech co. Bzodiidz me tib cuent rii lo zho, rëb me:

—Tib men name, nroob lbë uv beenbni me lo liun me. Blozh ga blediin me liu co lo bla zha ne ran liu, dzigo laa me brieec ga, zey me stib dan.

<sup>10</sup>Zeene gol mëë ne laa nex co gol, pxeel me tib zha ne quia xtsiin me zie lo zha ne quianap liun me ga, parne gdeed zha co nex ne rieguial me ycaa me. Per lel bnaaz zho zha ne pxeel me ga, bdiin zho zho, blozh ga scase bzonëz zho zho. <sup>11</sup>Wbiire pxeel me stib zho, scaque peet bdeete zho lo zho, lel ndox zho lo zho, bdiin zho zho. <sup>12</sup>Pxeelaque me stib zho, goc zho tson, scasaque been zho, haxta psiwee zho zho. <sup>13</sup>Quianie me tib mëëd, rleynie me mëëd co. Zeene gon me sca been zha co, rëbcha me: “Mine naca laa naa cxel xpëed naa, zeene gan zho xpëed naaw, peet gund zho me, nend zon zho xtiidz me.”

<sup>14</sup>Pex guien zho cho nac xpëed me, zeene gon zho men co, rëb zho: “iLëë zha qui nagon guiaannie liu rii! iGolgotsaa dziuut ne zho, zeena guiaana lo ne!” <sup>15</sup>Bnaaz zho xpëed me, güeynie zho me zaatne nac tib lad lo liu co, ga güeygut zho me.

’Zha sca dien rzac to gun bizhuan liu co gza zha ntseeb co? <sup>16</sup>Ib tedsod lëë, zeene gbire me, znitlogazh me zho. Lozhse ga, cuediinga me liun me lo zla zha ne gundziina.

Zeene bin zho sca rëb me, rneechaa zho:

—iIb lic Dios qui, dziuunscad no!

<sup>17</sup>Dze bui me lo zho, dzigo rëbcha me:

—Per led znu lëë, zhubnee lo Xtiidz Dios: “Quie ne psëëb zha ne nozaa yu, ni nanđ zho lëëpaa quie co nac mine rnazdziits yu.”

<sup>18</sup>Ni quie co gon, zha ne tsietsobe low, zac zho zig tib ncuaañe rac tson tap lë; laa tel lëëgaaw tsoe lad zho, zac zho zig tib ncuaañe die die rac.

<sup>19</sup>Grë zha ne nac pxoz ne rnabey, ni grë maistr ley, hor co bien zho mine nac zho ga, bzeet me lo cuent co. iGocladz zho gagazh naaz zho me! Per bdzieb zho, niactseeb grë miech ne ndxie ga. <sup>20</sup>Dzigo mine been zho, pxeel zho bla zha ne zie ziegungüet me par cxin me tib diidz, dzigo min co yquiaaqui zho tsiezo zho me lo zhiwxtis zha Roma. Rquiaalo zha co, no zho liaadz dien zha goobdiag zho xtiidz Dios, <sup>21</sup>bdzin zho lo me, bnabdiidz zho rëb zho:

—Maestro, ndion no niapse diidzli ziena luu, ni scagaa zeene rseed luu miech, rguibd luu guiaannziuu luu lo zho, sinque niapse mine nac diidzli, mine rlu zha sëëb zho xnëz Dios, min co rnee luu lo zho. <sup>22</sup>Gane niina, racladz no gnë luu dien pe nonguiela ga rdeed no dimi ne razh lo rey Roma, te nonguielda ye.

<sup>23</sup>Bienga me racladz zho gungüet zho me, dzigo rëbcha me lo zho:

<sup>24</sup>—iGolneedz tib xpes to nu ganle!

Dzigo bdeed zho tib pes lo me. Blozh ga, rëbcha me lo zho:

—iCho nu? iCho lë nu quia lo pes rii?



Pquiab zho rëb zho:

—Lëë rey Roma i, lëë lë me i quia lo qui.

<sup>25</sup>Dzigo rëb me lo zho:

—Mìne rieguial sca ycaa rey Roma, goldeeda lo rey Roma; scaquegaa mìne rieguial ycaa Dios, lo Dios goldeeda.

<sup>26</sup>Bzee zdoo zho gon zho sca ptsire me lo xtiidz zho. Mazd dzese bre zho, sac bdziel zho zha niungüet zho me; gocladz zho squi ndxie miech nxiñ me pe tib diidz, per brielod niungüet zho me.

### ¿Pe nli zrieeban miech?

(Mt. 22:23-33; Mr. 12:18-27)

<sup>27</sup>Blozh ga, güeyaque zla zha saducé lo Jesús. Nac zha saducé riladzd zho dzin dze grieeban miech; bdzin zho, rëb zho lo me:

<sup>28</sup>—Maestro, znu psan Moisés diidz: telne glo mgui guet lo wnaa ne nac tsiel mgui, ni gopd wnaa mëéd, dzigo none betsaque zho tsielnia wnaa co stib, zeena gap wnaa mëéd ne guiaan xlugar xpëéd zha ne gut ga.

<sup>29</sup>Bio tib dii zha co znu bzhaac, gadz bets nac zho. Ptsielnia zha ne nac zha gol, zeene laa zho gut, biaan xpëéd zho. <sup>30</sup>Dzigo ptsielnia wnaa co stib bets ngutoo co. Blozh ga, gutaque zha co, pa së zho nsañ mëéd. <sup>31</sup>Ptsielniaque me stib zho, goc zho tson, niicle zha co psandaque mëéd. Sca sca haxta bza gza gadzse zho ptsielnia me, <sup>32</sup>tibaque zeene yequé me laa me gut. <sup>33</sup>Mine racladz no gacndion no, ¿chopaa dzigo gac tsiel wnaa co, zeene laa zho grieeban, ne sca gza gadzse zho ptsielnia me?

<sup>34</sup>Pquiab Jesús rëb me:

—Tiba, gacnan to ganle, lo guielmban riise rtsielnia miech. <sup>35</sup>Zeene grieeban zho, zig nac zha ne yгаа guielnzaac gdzin zho zaatne no Dios, led yedraa ga tsielnia zho. <sup>36</sup>Sac laa zho mbanle ga, gdzindraa dze guet zho. Masaque laa zho gac zig nac grë xanjl me, mëéd gac zho lo me. <sup>37</sup>Laa stiba, gacnan to ganle ible zrieeban grë mengut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rrieeban mengut. Rëb Dios lo me: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Zeene sca rëb me, ga rlu ganle mban zha co. <sup>38</sup>Sac tel me, nacd me xDios mengut, sinque xDios zha mban nac me. ¿Par me, grëse zha ne ngab lo me, zha mban nac zho!

<sup>39</sup>Blalaa maistr ley zo ga, gon zho sca rëb me lo zha co, dzigo rëbchaa zho lo me:

—Maestro, nli squi naca zigne rnee luu i.

<sup>40</sup>Dzigotaa ni stib zho beendraa pe nabdiidz zho lo me.

### ¿Cho xpëéd nac Crist?

(Mt. 22:41-46; 23:1-36; Mr. 12:35-40; Lc. 11:37-54)

<sup>41</sup>Hor co bnabdiidz Jesús lo zho, rëb me:

—¿Zha nac dien ne rnee zho tib xpëédaque rey David gac Men ne nacle diidz cxeel Dios ga? <sup>42</sup>Led Davitaque name znu bnee tib lo salm ne pquiaa me:

<sup>43</sup>Bnee Dios lo men ne rnabey naa, rëb Dios lo me:

“Cue naa nëz derech, nu bzob,

nieeda lozh gnaz naa grëse zha ne rlëe lo luu, csañ naa zho ladznia luu.”

<sup>44</sup>‘Gase ganle rlu, led scada; telne nli zha xtii David gac men co, ¿zha nac dzigo ne lëëxie David rnee ne me rnabey David?

<sup>45</sup>Squi ndxie grë miech co noquiaadiag zho, zeene bnee me lo xpëédscuel me, rëb me:

<sup>46</sup>—Golguien gon, ib tsienalde to mine run maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdziel zho zho ro nëz. Zig nac len yadoow, zha nac zha ne rzob lo xcan zaatne rzob grë zha non; zeene riegaa zho tib lo lni lidz miech, lëepaaze zha nac zha ne rzob groł mezh zeene laa wagw rac. <sup>47</sup>Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca run zho, iper ib tedsod nroob caxtigw ne yгаа zho!

### Gon ne bdeed tib wnaa viud

(Mt. 24:1-2; Mr. 12:41-44; 13:1-2)

**21** Laa Jesús no len yadoo ga noseed me miech. Ga no me, gon me zha rdzin grë zha ricw, nroob dimi rsañ zho len alcancí ne zob ga. <sup>2</sup>Tibaque zeene bdzin tib wnaa viud, tib men proba, ye me laa me psañ chop gaay win len alcancí co. <sup>3</sup>Zeene gon Jesúsa, rëbchaa me:

—Gneli naa lo to ganle, mazdraa gon non gon ne bdeed wnaa viud qui, lëdle grë gon ne psañ grë zha qui. <sup>4</sup>Sac tel zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me, mine rnalopaa me gziuu pe yquiin me, per laa me bloogona.

<sup>5</sup>Laa Jesús zieriee ga, zeene psilo bla zha ne nac xpëédscuel me, rlozhd gwi zho zha niaa yadoo co, rzee zdoo zho ran zho grë quie ne niaaw, grë ncuane ngalguiee lena. Zeene gon mew, rëbchaa me lo zho:

<sup>6</sup>—Niicle squitaa gon ran to niaaw niina, per zdzin dze ne nitlow, dib nacsew. Ni stib quie qui guiaandraa zigne squi zhobxcuaaw i.

### ¡Nsin golso!

(Mt. 24:3-28; Mr. 13:3-23)

<sup>7</sup>Bded ga, bnabdiidz zho lo me, rëb zho:

—Maestro, ¿poc dzigo gac mine bzeet luu ga? ¿Zha glu zeene laaw ziaadyob gac?

<sup>8</sup>Dzigo rëbchaa me lo zho:

—Nsin golso, zeena choot yquidiede to. Sac nzian zha ne griequia, guiab zho laa dze co bdzinle, guiab zho zha nac Men ne zëëble diidz ga cxeel Dios.

¡Ib gliladzde tow! <sup>9</sup>Zeene gon to pa lo ndxiediḷ tib guiedz, pa lo noyacgaa grē diḷ dox, ib gdziebde to. Ib none gac grē ncuaaṅ co, per lega loxaque miṅe csilosew ga.

<sup>10</sup>Grē guiedz nroob, laaw tiḷnie saguiedz nrooba; grē zha ne rnabey grē guiedz nroob, laa zho tiḷnie sazha rnabey zho. <sup>11</sup>Nēzrii nēzrec csilo gni grē zho dox, nzian zaatne gaṅ miech gbin, zaatne glaangaa zho grē guieḷguidz dox. Nzian grē ncuaaṅe glu zhan gbaa, nzian grē ncuaaṅ co, ncuaaṅe ctseb miecha. <sup>12</sup>Per ansraa gac grē ncuaaṅ co, stsidilḷ miech to, squianaḷ zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnēz naa. <sup>13</sup>Ga nagonḷ gdeeda diidz gnee to lo grē zha co, gacnaṅ zho gaṅle cho nac naa. <sup>14</sup>Ib guṅde to tso to zhgab dieṅ pe guiab to lo zho, zeene laa to ctsire lo miṅe rquiaqui zho to; <sup>15</sup>sac naa gnedz guieḷbiini lo to, zeene laa to gnee guieṅ to pe guiab to. Zha ne gona, squiaadiag zhow, per ni gdzield zho pe ctsire zho lo to.

<sup>16</sup>Haxta pxoz to, xniaa to, bets to, grē meṅlidz to, grē zha ne ndzieeldiidz to, stsidilḷ zho to, lēēque zha tsielo to ladznia zha ne csacsi to. Lo grē to, zio zha ne haxta zet ladznia grē zha co. <sup>17</sup>Grēse miech glēē gaṅ to porne nac to zha ne no xnēz naa. <sup>18</sup>Nli stiche zho xquieḷmban to lo guidzliu rii, per, ¡ni tib guits guic to, grielod zho gnitlo zho! <sup>19</sup>Tiblique sca goḷgac, sozite to lo naa, zeena yгаа to guieḷmban ndzon ne gneedz Dios.

<sup>20</sup>Zeene gaṅ to igose guiedz Jerusalén ndxienap meṅguiib, naṅle to leṅ dze co laaw nitlo. <sup>21</sup>Grē zha ne no guiedz ne ngab Judé, none xoonḷ zho tsie zho nēz yagui, ga tsietsolan zho. Zha ne no Jerusalén nu, none grieeniob zho. Grēgaa zha ne quia dziin dana, ib guiabd zho gbire zho lad guiedz. <sup>22</sup>Tib guieḷnē dox ne csiaab Dios gaṅ grē miech rii leṅ dze co, ga gac grē miṅe raquiet lo Xtiidz me ted zho. <sup>23</sup>¡Prob grē meṅ wnaa ne lēētse leṅ dze co zoney xpēēd, meṅ ne quianiegaa mēēd ne bii radz! ¡Mbandox ted miech, guieḷnē dox ne csiaab Dios gaṅ zho guiedz rii! <sup>24</sup>Zutxuu miech zho, zha ne tedlaagaa lo guieḷgut zeyzhoo miech zho, zhaase zhaase dan ne gueynie zho zho. Hor co laa grē zha zit co, seēb guṅchenḷ Jerusalén; haxta gdzinḷ dze ne gnabey Dios griee zho.

### Ziaad Jesús stib

(Mt. 24:29-35, 42-44; Mr. 13:24-37)

<sup>25</sup>Nzian grē ncuaaṅe glu lo ngbidz, glu lo mēē, glu lo mel. Mbanse gac miech, dziebdox zho zeene gon zho bi dox ne tso tsasoli nisdoo. <sup>26</sup>Nzian zha ne haxta scow zho lo dzeb, zeene laa zho gaṅ grētaa ncuaaṅe noyac lo guidzliu leṅ dze co. Grē ncuaaṅe no zhan gbaa, nēzrii nēzrec gaca. <sup>27</sup>Hor co bii zaṅ zho gaṅle zeene laa naa zialzēēb tib lo xcow con grē guieḷndzon, con grē poder ne rap naa. <sup>28</sup>Zeene gaṅ to laa grē ncuaaṅ co rsilo noyac, nley goḷco zdoo to; ¡sac hor co laa Dios ycaania to!

<sup>29</sup>Goḷzoob cuidad gaṅle zha nac yag guigw, beelzegaa pe stib yag. <sup>30</sup>Led ran to gaṅle, zeene laa grē zhicwa racnieṅ, laa zhiblaga rsilo rdzib, gase ruṅbey

to laa mēē nēēg ziaadgaxle. <sup>31</sup>Scaque nagon zeene gan to laa grē minē rne naa lo to nu rsilo noyac, dzigo nanle to laa dze ne csilo gnabey Dios ziaadgaxle.

<sup>32</sup>Gneli naa lo to ganle, nzian grē miech ne mban niina, bii zan zho zeene laa grē ncuaañ co gac; sac ible ncuaañe gaca. <sup>33</sup>Zdziñ dze ne nitlo gbaa, nitlo guidzliu, sangue minē rne naa lo to nu nitloda; ible laaw none gac.

<sup>34-35</sup>¡Nsin sca golso, zaacse golgac! ¡Adel gal dze ne laa naa guial, leḷ lo grē ncuaañe ndzinlid, leḷ lo guielgonziu, leḷ lo grē zhgab ne rac lo guidzliu rii no to, zigne gun grēraa miech! Sac gon, lega naclew glanso naa. <sup>36</sup>Nligaa nsin golso. Tibaque golinab lo Dios, gacniē me to peet gacde to lo grē guielñe co, ine peet xtolde to zeene laa to gacredz lo naa.

<sup>37-38</sup>Gzase len dze co pseed me miech. Silgaw, miech guizhiu ne rdziñ len yadoo, parne yquiaadiag zho zhiwseed me. Guidze sca rseed me zho, laa pcow liu riebēz me cho Gui Oliv.

### Bnediidz zho dien zha gnaaz zho Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

**22** Ziaadyoble lni Pascwa, zhilni nroob men Israel, lni ne row zho quietxtil ne rquiad ncobi lad. <sup>2</sup>Grē zha ne nac pxoz rnabey ni grē maistr ley, len dze co laa zho no quiaguib zho dien zha gut zho Jesús. Noguib zho tib mod ne glisquid menguedza; sac rdzieb zho gacntseeb menguedz.

<sup>3</sup>Tib dzew, laa mendox bzēēb zdoo Judas Iscariot, tib zha ne rzēniepaa me ga, <sup>4</sup>rias Judas güey Judas lo grē pxoz rnabey co, lo grē men ne zo lo zha ne rquianap yadoo, rēb Judas zha csan Judas Jesús ladznia zho. <sup>5</sup>Zeene bin zhow per nli rley zho, nacne biaan zho diidz quizh zho Judas. <sup>6</sup>Dzigo desde hor co psilo Judas noguib Judas dien zha gdeeda diidz guiend miech csan Judas me ladznia zho.

### Dowtseenie Jesús xpēēdsuel me

(Mt. 26:17-29, 31-35; Mr. 14:12-25, 27-31; Jn. 13:21-30, 36-38; 1Co. 11:23-26)

<sup>7</sup>Mer dze ne rsilo lni Pascwa, len dze ne sca row zho quietxtil ne rquiad ncobi lad, ni rut zho carner yeēn ne rowxtsee zho. <sup>8</sup>Dze co bnabey Jesús Pedr grop Juan tsiegunlo zho xtsee ne gownie me zho wdze co. <sup>9</sup>Dzigo bnabdiidz zho lo me, rēb zho:

—¿Pa lo racladz luu guio no guiodziunlo now?

<sup>10</sup>Rēbchaa me lo zho:

—Goḷtsie Jerusalén. Zeene sēēb to lad guiedz, ga gan to tib mgui nzobyan tib re nis, goḷtsienal zhits me. Yu ne gan to sēēb me, <sup>11</sup>golguiab lo bizhuan yu co: “Znu nē Maestro, ¿pa len yu me gneedz luu gac zaatne gowxtseenie me xpēēdsuel me wdze rii?” <sup>12</sup>Ga glu me tib len yu nroob ne riaan glaa, nzhixcuaale lena, dzigo ga golgunlo zhixtsee ne.

<sup>13</sup>Dzigo laa zho zie. Güey zho zaatne pxeel me zho ga, ga beenlo zho xtsee co.

<sup>14</sup>Wdze co, zeene gol hor xtsee laa Jesús bded lo mezh gza me gza tsiipchop xpēēdsuel me. Xtsee co no zho, <sup>15</sup>zeene rēb me lo zho:

—jBlactaa gon̄ pquiambëz naa gdziñ dze rii, znu gowxtseenie naa to nawdze rii, ansraa csacsi miech naa, gut zho naa! <sup>16</sup>Lëë lultm vuelt nu gon̄ teed naa lni Pascw rii, haxta gdziñ dze ne laa Dios csilo gnabey, dze ne glupaa gan̄le zha nac xtsee rii.

<sup>17</sup>Dzigo bzhen̄ me tib cop nroob no vin, bdeed me xquizh lo Dios, blozh ga bdeed me cop co lo zho, rëb me:

—Gol̄quiin vin rii gza to. <sup>18</sup>Gneli naa lo to gan̄le, lëë lultm vuelt nu guie naa vin rii, haxta gdziñ dze ne laa Dios csilo gnabey.

<sup>19</sup>Ni bzhen̄ me quietxtil, bdeed me xquizh lo Dios, blozh ga beengrol̄ mew bdiiz mew lo zho, rëb me:

—Gol̄quiina, rrieequia gon̄ lëë xcuerp naa i, sac gon̄ znu gun̄ zho xcuerp naa parne csilaa naa to grë to. Zeñe gdeedtaaw diidz, gol̄gun̄ miñ rii parne glu to gan̄le tibaque rsoladz to naa.

<sup>20</sup>Blozhse dowxtseenie me zho, scaque bzhen̄ me stib cop no vin, blozhse bdeed me xquizh, rëb me lo zho:

—Lëë stib trat cub nu gon̄ riaan̄ Dios grë me miech, rrieequia xchen naa nu nac vin rii, ren ne gzhiee xcuert to, ren ne tso firm trat co par glu nona.

<sup>21</sup>Ni gacnan̄ to gan̄le, lo mezhaque nu gon̄ zob zha ne tsielo naa ladznia zha ne gut naa. <sup>22</sup>Naa ne nac naa Mgui ne pxeel̄ Dios, nli, ible none guet naa, parne gac mine pxeel̄ Dios naa zialgun̄ naa, jper probsaxe zha ne tsielo naa ladznia zha co!

<sup>23</sup>Hor co psilo gza zha ne zobnie me ga, rnabdiidzlsa zho dien̄ cho nac zha ne rzeet me ga; <sup>24</sup>haxta psilo zho nodildiidz zho dien̄ cho gac zha ne gacnon lo zho. <sup>25</sup>Dzigo bnee me lo zho, rëb me:

—Nli grë zha ne rnabey guiedz ne ndxie lo guidzliu, masaque rnabey zho miech zig nac zeñe bzhii zho zho, per zha gun̄raa miech, lëë gdib rxecw zho, haxta rnee zho nroob quiayun̄ zha co xyudar guiedz. <sup>26</sup>Sangue to gon̄, zha ne gnabey lo to, none guien̄ zho gac zho zig tib ngundziin lo to; zha ne racladzgaa gacnon, none guien̄ zho guiaaun̄win zho. <sup>27</sup>Lo guidzliu rii, zha ne rnabey, rzobse zho, zha ne nac ngundziin, zha co rdziib ncuane row zho. jSangue lo ne, led scad naca! jGol̄wi gan̄le, tib ngundziin nac naa lo to!

<sup>28</sup>Tose goc zha ne tibaque gocnie naa lo grëtaa mine bdeed naa len̄ dze rii. <sup>29</sup>Gane niina, laa naa gneedz tib guieInzaac nroob lo to, laa to yгаа gdziñ to zaatne bneedz PxoZ naa gnabey naa; <sup>30</sup>zeena ine znu tipse zioob ne lo xmez h naa ga, dioow ne, dio ne. Haxta so naa to, to gac zha ne cobey, pe nac mine been̄ gza tsiipchop dii ne nac menladz to nu.

<sup>31</sup>Hor coque bnee me lo Pedr rëb me:

—Bina gan̄le Pedr, racladz Satanás gon̄ ycuiib ma to, zigne run̄ zho zhobxtil. <sup>32</sup>Per laa naa bnable lo Dios, gacniñ me luu, csaand me sozitpaa luu lo naa. Gacxe waa, zeñe guien̄ luu lëda ga been̄ luu, luu gnee lo grëraa zha qui, parne tibaque dib zdoo zho gnalo zho naa.

<sup>33</sup>Pquiab Pedr rëb Pedr:

—Niicxe peraa waa gac, csaand naa luu. Tejne co zho luu ladzguiib, ye naa tso ga, jtejne gutgaa zho luu, zaatne guet luu, ga guet naa!

<sup>34</sup>—Bina ganle Pedr —rëb Jesús—. jGuieel riigazh gon, gardle ycuedz gall, tsonle vuelt rëb luu runbeyd luu naa!

<sup>35</sup>Dzigo bnee me lo zho gza zho, rëb me:

—Led rsoladz to ganle zeene pxel naa to güeyseed to miech, scase güey to, peet dimi bide to, per ni ncuaane gow to, per ni lab to bide to. jPe beenfalt ncuaane nquiin to hor co?

Pquiab zho rëb zho:

—Beenfaldedew.

<sup>36</sup>Dzigo rëbchaa me:

—Hor co nagon peet bide to, sangue niina zha ne quianie dimi, zha ne quaniegaa ncuaane gow zho, none güey zhow. Niina nagon none laa to yquiin spad. Zha ne quianieda, none maase tib xab zho cto zho, si zho tiba. <sup>37</sup>Sac nataa nagon, laa miech cteed naa mine zhobnee lo Xtiidz Dios, zaatne rnee: “Bnabey zho gut me, zigne rut zho grë zha ntseeb.” Grëse mine zhobnee teed naa, ib laaw none gac niina.

<sup>38</sup>Pquiab zho rëb zho lo me:

—jBui ganle laa chop spad nule!

Dzigo rëbchaa me:

—jMazd peet gnedraa naa lo to!

### **Bzodiidznie Jesús Pxoze me Getsemani**

*(Mt. 26:36-46; Mr. 14:32-42)*

<sup>39</sup>Blozhse ga, laa me briece zie me nëz Gui Oliv, zaatne rietaque me; ziana laque gza xpëedscuel me zhits me. <sup>40</sup>Bdziñ zho ga, rëbchaa me lo zho:

—Golnab lo Dios gacniñ me to, zeena yquiild mendox to.

<sup>41</sup>Bzë me spalal, bdziñ me zig zaatne riab tib quie ne rchel ne nia ne, dzigo ga pquiitsgzhib me, psilo me bnaab me lo Dios, <sup>42</sup>rëb me:

—Papá, laa naa rnab lo luu, tejne zala zdoo luu, psilaa naa lo grë guieñë rii. Per tejne grieeloda, mine gnëtaa luu sca gaca.

<sup>43</sup>Hor co biet tib anjl gbaa bdziñ pchoobladz zdoo me. <sup>44</sup>Mban rac me laa me nozodiidznie Pxoze me, per hor cole mazdraa rnab me lo Pxoze me; lo guieñë ro co haxta rzonis me, masaque zëbdzuun grë nis co lo me zootle ren.

<sup>45</sup>Zeene laa me guso ga, bdziñ me zaatne biaan xpëedscuel me, gon me gzase zho laa zho nixguies. Ye zho mban rac zho, lo guieñë co bguudz zho mcaal. <sup>46</sup>Dzigo pcuaan me zho, rëb me lo zho:

—jNixguies to ye? Lëda i gon, jgolsobna! Golnab lo Dios, gacniñ me to, zeena yquiild mendox to.

### **Bnaaz zho Jesús**

*(Mt. 26:47-58,67-75; Mr. 14:43-50,53-54,65-72; Jn. 18:2-18,25-27)*

<sup>47</sup>Laa Jesús quianeeque, zeene laa Judas bdziñ bdziñnie Judas tib dzoon miech. Zigne bdziñ Judas, wbig Judas lo me, dow Judas bzhid cuas me.

<sup>48</sup>—¡Judas! —rëb me—. ¿Con tib bzhid dzigo lëë glu luu naa lo grë zha qui?

<sup>49</sup>Zeene bien xpëëdsuel me, me zienaaz grë miech co, rëbchaa zho lo me: —Maestro, ¿zha dziuun ne? ¿Pe zdeed spad no zho?

<sup>50</sup>Znuse biet tib zho pchel zho tib nia spad, pchug zho diag tib xmoz men ne nac pxoz nroob. <sup>51</sup>Dzigo bnee Jesús lo zho rëb me:

—Golsaan zho, ndzinli golgac.

Hor co wbig me bzhen me diag zha co, beenguiac mew, lëëtse min derecha.

<sup>52</sup>Lad grë miech co no ndal grë pxoz ne rnabey, grë zha ne zo lo zha ne rquianap yadoo, ni spalal men ne nac zha non lo menguedz; dzigo bnee Jesús lo zho, rëb me:

—¿Pe nacne squitaa ziaad to, nzhen to yag, nzhen to spad ziadnaaz to naa? ¿Niacxe naa cho ngbaan? <sup>53</sup>Blactaa dze name gon to no naa len yadoo, ni bnaazde to naa ga. Per nole guic to nagon nawdze rii gnaaz to naa; grë min racladz to grë to mendox, niina laaw gac.

<sup>54</sup>Hor co wbig be zho bnaaz zho me, laa zho zienie me nëz lidz men nac pxoz nroob. <sup>55</sup>Bdzin zho lidz men co, bre zho xley me, bzëëg zho gui, laa zho no nodzëë zho. Ye Pedr maase zit zit nal Pedr, laa Pedr bdzin ga; laa Pedr wbig bzob lo zho ga. <sup>56</sup>Zeene gon tib wnaa ne quia xtsiin men co laa Pedr zob ga, dze rwi me, tibaque rëb me:

—¡Ye mgui qui gon rzënie men ne blansonie to i!

<sup>57</sup>—¿Naa ye? —rëb Pedr—, ¡per ni runbeyd naa men qui!

<sup>58</sup>Wdzeepaaw, laa tib zha ne zo ga, gonaque Pedr, rëb zho lo Pedr:

—¿Segur lëë ye luu nacnie men ne bgaa i?

Scasaque bneelid Pedr. <sup>59</sup>Wdzeelaaque goca, zeen laa stib zho brieequia, rëb zho:

—Lëë tib zha ne nacnie men qui nu gon. ¡Rlu zha galilé nac zho!

<sup>60</sup>Pquiab Pedr, rëb Pedr:

—¡Riend naa gon, pe nacne squi rnee luu!

Gardle lozh gree diidz co ro Pedr, zeene laa tib gall pcuedz. <sup>61</sup>Gall co nocuedz, zeene ptsire lo Jesús, dze bui me lo Pedr; dzigoraasoladz Pedr zeene rëb me lo Pedr: “¡Guiel riigazh gon, gardle ycuedz gall, tsonle vuel rëb luu runbeyd luu naa!” <sup>62</sup>Mbanse rac Pedr. Brieepedr ga, psilo Pedr biin Pedr guielnë co.

<sup>63</sup>Grë zha ne zopaa quianap Jesús, nzian grë ncuane run zho me, psilo zho noyunguzee zho me. <sup>64</sup>Pxidoo zho lo me, ni rguin zho me, rlozh ga, rnee zho:

—Luu ne nac luu men ne ziadteed xtiidz Dios, ¿bnë sca dien cho ga bdiin luu?

<sup>65</sup>Nzian grë ncuane rgoredz zho lo me.

### Güeynie zho Jesús lo zhiwxtis zho

(Mt. 26:59-66; Mr. 14:55-64; Jn. 18:19-24)

<sup>66</sup>Zeene biini liu, pcaalsa grë men ne nac zha non lo menguedz, grë zho pxoz rnabey, ni grë zha ne nac maistr ley, güey zho güeynie zho Jesús lo zhiwxtis zho. Bdzin me ga, bnabdiidz zho lo me rëb zho:

<sup>67</sup>—Bnë lo no dien, ¿pe lëë Men ne nacle diidz cxeel Dios lo guidzliu ga i nac luu?

Pquiab me rëb me:

—Niicle telne gni naa lo to nli lëë men co nu nac naa, gliladzde tow, <sup>68</sup>tel pe gnabdiidzгаа naa lo to, ctsirede to low; sac gliladzde to mine nac diidzli. <sup>69</sup>Naa ne nac naa Mgui ne pxeel Dios, zhile laa dze gdziñ zeene laa naa sob cue Dios nëz derech, men nroob ne rrieelo run grëse ncuaañe racladz me.

<sup>70</sup>Hor co grëse zho pquiab, rëb zho lo me:

—¿Xpëed Dios dzigo lëë nac luu?

Dzigo rëbchaa me:

—Tozhal name rnee, nli Xpëed me nac naa.

<sup>71</sup>Hor co rëb zho:

—¿Pe mazdraa textigw ne racladz ne! ¡Laa ne bdzionle ganle mezhal rnee Xpëed Dios nac me!

### Güeynie zho Jesús lo Pilat

(Mt. 27:1-2; 11-14; Mr. 15:1-5; Jn. 18:28-38)

**23** Hor cogazh pcaanie zho Jesús nëz, bdziñnie zho me lo Pilat, men ne nac gobernador ne nzoob zha Roma ga. <sup>2</sup>Ga psilo zho nzian grë ncuaañe rquiaqui zho me, rëb zho:

—Laa no bnaaz men rii gon ziaadnie no me lo luu, sac bgaa me noquiil me menladz no gacttseeb zho. Rnee me lo zho nonguielda gdeed zho dimi ne razh lo zhirey ne, men ne zob Roma; haxta rnee me mele nac rey ne gunbey zho, sac Dios pxeel me ziaad me.

<sup>3</sup>Dzigo bnabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

<sup>4</sup>Dzigo rëbchaa Pilat lo grë zha ne ne nac pxoz rnabey co, ni grë miech ne ziegrë zho ga:

—¡Ni tib dol rapd men rii!

<sup>5</sup>—¿Zha gapd me dol? —rëb zho —. Ni zaatne zieetaa me noquiil me miech gacttseeb zho lo zhirey ne. ¡Dible nëz Judé nu güeyted me; desde nëz Galilé brie me ziaad me haxta nu!

<sup>6</sup>Gon Pilat sca rëb zho, dzigo bnabdiidz me dien pe zha Galilé nac Jesús. <sup>7</sup>Zeene gocnan me zha nëz co nac Jesús, dzigo pxeel me Jesús lo Herod, sac Herod rnabey nëz Galilé; lëëtaque len dze co laa Herod no Jerusalén ga.

<sup>8</sup>Rley Herod zeene gon Herod me, sac ziyon Herod grëtaa mine run me; quiambëz Herod gdziñ dze ganlo Herod me, ganlo Herod gun me pe tib milagr. <sup>9</sup>Psilo Herod nzian grë ncuaañe rnabdiidz Herod lo me, per ni tib lo wnabdiidz co ib ptsired me. <sup>10</sup>Zeene gon Herod rquiabd me, ni gon Herod noque grë pxoz rnabey co, grë maistr ley co, ib rioogd ro zho rzadraa pe yquiaqui zho me, rnab zho cteed Herod me caxtigw, <sup>11</sup>nacne lel psilo Herod grë xmenguiib



Herod rzhidznie zho me, runnguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat. <sup>12</sup>Glo ib rdzieeld xtiidz Herod grop Pilat, laa dze co laa zho psilo bneewen stib.

### Bnab zho guet Jesús

(Mt. 27:15-26; Mr. 15:6-15; Jn. 18:39-19:16)

<sup>13</sup>Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menguedz, <sup>14</sup>rëb Pilat lo zho:

—Laa zho biad-zoob xdemand men rii lo naa nu, nac diidz noquiil me miech gacntseeb zho lo zhirey ne. Nacne pquiep naa me, ni blalagaa to gonā; par naa peet dol rapd me. <sup>15</sup>Niiclegaa Herod, ye Herod gon ni tib dol rapd me; gane pxeelaque Herod me lo naa. Quiayund me ncuaañe guiab ne rieguial guet me. <sup>16</sup>Miñe gaca, laa naa gnabey ted me tib caxtigw, lozh ga dzigo laa naa csilaa me.

<sup>17</sup>Nac costumbr, gzobse lni Pascw rsilaa zho tib zha ne no xcuent lo wxtis. <sup>18</sup>Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—¡Csilaad luu men qui, bnabey guetgazh me! ¡Barrabás psilaa!

<sup>19</sup>Barrabás lë tib men co no ladzguiib len dze co, sac bgaa me zo me lo tib dii zha ne noyactseeb lo rey len guiedz Jerusalén ga, ni zëëbaque me tib ngutoo. <sup>20</sup>Bguiib Pilat dien zha nrieelo nsilaa me Jesús, <sup>21</sup>per psilo grë miech co nguiedz roptsie zho, rnee zho:

—¡None guetgazh men qui! ¡Lo cruz bnabey yquia me!

<sup>22</sup>—Per, ¿pe nacne gnabey naa yquia me lo cruz? —rëb Pilat stib—. ¿Pe nac falt ne rap me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

<sup>23</sup>Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc miñe racladz zho. <sup>24</sup>Racse Pilat, laa Pilat bdeed diidz. <sup>25</sup>Blozhse bnabey Pilat psilaa zho Barrabás, zha ntseeb ne no ladzguiib ga, dzigo laa Pilat psan Jesús ladznia zho.

### Güeyquiaa zho Jesús lo cruz

(Mt. 27:32-44; Mr. 15:21-32; Jn. 19:17-27)

<sup>26</sup>Hor co laa zho brieenie Jesús laa zho zienie me zaatne yquia me lo cruz. Nëz zienie zho me, bdzieel zho tib men Ciren lë Simón wbire lo dziin dan, pcuëez zho men co, bnabey zho me bi me zhicruz Jesús; nalse me zhits Jesús, laa zho zienie Jesús. <sup>27</sup>Miech guizhiu ne zie ga, ndal grë men wnaa psilo zho roon zho no zho xquielnë me, <sup>28</sup>dzigo dze bui me lo zho, rëb me:

—Xin, nac to men Jerusalén rii, goonde to xquielnë naa. Mazd golgoon por grëtaa guielnë ne no gan to, por grëtaa guielnë ne no gan xpëed to; <sup>29</sup>sac zeene gal dze co grë men wnaa ne quianie mëed, ziaab zho: “Mazd wenaque zie zha ne quianied mëed, zha ne nanđ zha radz mëed, zha ne niaadgaap gap

mëed.” <sup>30</sup>Hor co grë miech, laa zho gnab tebaa zha pixche grë gui guiaan zho zhana. <sup>31</sup>¡Golwi ganle, telne znutaa minë nodeed naa nac naa zig tib yag nguia, pelel to dzigo ne nac to zig tib yag bidz!

<sup>32</sup>Ye schop zha ne nac ngbaan, zienie zho ga yquiaagza zho me lo cruz. <sup>33</sup>Zeene bdzin zho zaatne nac “Gui Beerguic Ngutoo”, ga pquiaa zho me lo cruz gza me ngbaan co. Tibga zhicruz zho bzo tib nëz cue zhicruz me. <sup>34</sup>Lo cruz co quia me, zeene nguiedz bnee me rëb me:

—¡Papá! Ncuane quiayun grë miech rii nu, bzhiguiel gunquizhd luu zhow; sac riend zho pe run zho.

Gza menguiib ne bdzin ga yquiaanap me, hor co tib tib zho bzhense zho tib lë xab me, laa stiba bio zho rif. <sup>35</sup>Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenguiac me, stib miech scataa bla me. ¡Pe rac me na ne riete me i? ¡Guiet me i zho, telne nli me nac Men ne zëëble diidz cxeel Dios, telne nli Dios bzooblo me ziaad me!

<sup>36</sup>Wbig menguiib co rdeed zho nziu bla guie me, rzhidznie zho me, rnee zho:

<sup>37</sup>—¡Zhirey zha Israel name nac luu! Psilaa luu lo guielnë qui nazho.

<sup>38</sup>Glaa guic zhicruz me quia choplan diidz ne pquiaa zho, rneew: “LËË ZHIREY ZHA ISRAEL NU.”

<sup>39</sup>Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—¡Led rëb luu lëë, luu nac Men ne zëëble diidz ga cxeel Dios! ¡Blu nazho nli men co nac luu, psilaa ne lo guielnë rii!

<sup>40</sup>Hor co pquiab stib zha co, rëb zho lo zho:

—¡Psiog ro luu! ¡Pe niicle niina ne laa luu guetle ib rdzieebd luu Dios? <sup>41</sup>Bien ganle, ¡tel ne ible min rii riogual ne grop ne, nu nodizh ne grë guielntseeb ne bdziun ne; sangue men qui, peet dol rapd me!

<sup>42</sup>Dzigo rëb zho lo me:

—¡Bzhiguiel zeene guiaad luu gnabey luu, ib csand luu naa tib lad!

<sup>43</sup>Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquielbley Pxoza naa.

### Gut Jesús

(Mt. 27:45-56; Mr. 15:33-41; Jn. 19:28-30)

<sup>44-46</sup>Gol gro! dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biao biini stib. Hor co pquiaa Jesús tib redz nroob, rëb me:

—Papá, laa naa rsan zhiespíritu naa ladznia luu, luu pcaaniaw.

Diidz co briece ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, groltaa goca.

<sup>47</sup>Zha ne rnabey lo zhaguiib ne pquiaa me lo cruz ga, zeene gon zho zha blozh me, bien zho Dios been min co, rëb zho:

—¡Ne nlipagaa tib meṅ peet xtold goc meṅ qui!

<sup>48</sup>Scaque grē miech ne goclo ga, zeene gon zho zha blozh me, biabguielnē zho, mbanse rac zho laa zho wbi ga. <sup>49</sup>Laa grē zha ne runbey me, zha ne gocnie me, zig nac grē meṅ wnaa ne gocgrē zha ne brieenaḷ zhits me zeene brie me nēz Galilé, grē zho laa zho ndxiee tib lad rwi zho.

### Bgueets Jesús

(Mt. 27:57-61; Mr. 15:42-47; Jn. 19:38-42)

<sup>50</sup>Lad grē zha ne nac zhiwxtis meṅ Israel ga, no tib meṅ guiedz Arimaté lē me José; lēē guiedz co ndxie xtan Judé. Tib miech wen nac me, noxco me miṅe rnabey Dios, <sup>51</sup>ye me quiambēz gdziṅ dze ne csilo gnabey Dios. Zeene bnabey zha ne nacgrē me dziin ga zha gac Jesús, ni lalnu biod me conform miṅe bnabey zho. <sup>52</sup>Nacne hor co güey me lo Pilat, bnab me diidzbey tsielit me xcuerp Jesús lo cruz. <sup>53</sup>Dzigo güey me, blozhse blit me cuerp co lo cruz, pcheḷ me me tib lo lar nroob, güey me güeyqueets me me tib leṅ baa cub ndieen tib cho quie gag ga.

<sup>54</sup>Lēē bdze dze co no zho xco ne laa dze ne gdziiladz zho lo dziin sēēb. <sup>55</sup>Grē meṅ wnaa ne sca nacgza grē zha ne brieenaḷ zhits me zeene brie me nēz Galilé ga, ye zho güeynaḷ bgueets me, gon zho pa lo bio me. <sup>56</sup>Blozhse bgueets me, laa zho zey. Bdziṅ zho bzhixcuaa zho, tiblo zēnex ne tsietēēb zho lad xcuerp me; dzigo laa zho bdziiladz zigne rnabey ley no gon zho.

### BRIEBAN JESUS

(Mt. 28:1-10; Mr. 16:1-8; Jn. 20:1-10)

**24** Laa zeene gol dze ne rzobni zhmal, silgaw laa gza meṅ wnaa co brie, bi zho grē zēnex ne bzhixcuaa zho ga, laa zho zie ro baan Jesús.

<sup>2</sup>Bdziṅ zho, gon zho laa quie ne bioog ro baan me ga bdioble; <sup>3</sup>bzēēb zho leṅ baa gon zho, niicle xcuerp me guiendle ga. <sup>4</sup>Laa zho zo ga, riend zho dien pe nacne sca nialse ro baa co, pe nacne niicle xcuerp me guiend leen co. Tibaque zeene gon zho laa chop meṅ bgui zole lo zho ga, masaque riaazbel lad xab grop meṅ co. <sup>5</sup>Hor co per nli bdzieb zho, lo dzeb co miṅe been zho laa zho pquiitsgzhib haxta bdziṅ lo zho lo liu. Dzigo rēb grop meṅ bgui co lo zho:

—¡Pe nacne ziaadguib to meṅ mban zaatne rio mengut? <sup>6</sup>¡Laa me brieebanle! ¡Guiendle me nu! Golsoladz ganle zha nē me lo to leṅ dze ne no me nēz Galilé, <sup>7</sup>nē me: “Mgui ne pxeel Dios, ible none guiab me ladznia grē miech ngoopdol, squiaa zho me lo cruz, per zeene gac tson ngbidza, laa me grieban.”

<sup>8</sup>Dzigoraa psoladz zho, nligaa sca bnee me, <sup>9</sup>hor co lēlēd güeynie zho diidz lo gza tsiiptib zha ne nac xpēēdscuel me, ni lo grēraa zha ne nacgza zho ga. <sup>10</sup>Nzianlaa nac meṅ wnaa co, lad co no Marí Magdal, no Zhuan, ni Marí ne nac xniala Jacob.

<sup>11</sup>Niicle bzodiidz zhow lo xpēēdscuel me, per con rnee zho led ncuuan gacd ga, ni lalnu bliladz zhow. <sup>12</sup>Tibaque zeene brie Pedr, rias Pedr laa Pedr zie nēz ro baa. Bdziṅ Pedr bdiixlo Pedr leṅ baa co, gon Pedr nligaa, ¡loxaque lar

ne briel me zhoob leen co! Blozh ga, laa Pedr zeyaque, rzee zdoo Pedr gon Pedr nli guiendle xcuerp me ga.

### Gon zho Jesús nêz Maús

(Mr. 16:12-13)

<sup>13</sup>Dze co brie chop xpëedscuel me zie zho tib guiedz win lë Maús. Gax Jerusalén riaan guiedz win co, maase chop hor rzè zho rdziñ zho ga. <sup>14</sup>Nêz no zho nozodiidz zho grë minë pteed miech Jesús ga, <sup>15</sup>tibaque zeene bien zho laa zho bgaa tib lo men co, gocgza me zho laa zho no nêz, per, jib biend zho lëë Jesús ga! <sup>16</sup>Ranlo zho laa me ziegza zho ga, per ni lalnu beenbeyd zho ne mew, sac zig nac zeen pe tib ncuane ptse lo zho. <sup>17</sup>Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guieñe no to?

Dzigo bzodze zho. Mban rac zho, haxta lo zho rlu nroob guieñe no zho.

<sup>18</sup>Pquiab tib zha ne lë Cleof, rëb zho:

—¿Niacxe bind luu ganle zha nactaa ncuane goc Jerusalén len dze rii? Grëse zha ne name güey Jerusalén, gocnana.

<sup>19</sup>—Nligaa —rëb me—, ¿pe dien goc ga?

Rëbchaa zho:

—Len dze rii psacsi zho men Nazaret ne lë Jesús. Tib men ne biadteed xtiidz Dios lo miech nac me, nzian grë milagr nroob ne been me; miech guizhiu ne bley pquiaadiag zhiwseed me. Rlu tib men nziuu nac me lo Dios. <sup>20</sup>Per lel brie grë pxoz rnabey, grë zho zha ne nac wxtis, bnaaz zho me, bnaab zho gut me, pquiaa zho me lo cruz. <sup>21</sup>Tibaque rdzieets no, me niac tib men ne nsilaa zha ladz ne ladznia zha Roma. Pasëse min co niac, nadzele rac tson ngbidz beet zho me.

<sup>22</sup>Per riend no dien zha nac cuent co, sac nasil güey bla men wnaa ne nacgrë no ro baan me, <sup>23</sup>zeene wbire zho bzodiidz zho lo no nê zho guiendle xcuerp me len baa, loxaque chop anjl briequia lo zho ga, rëb anjl co mban me. <sup>24</sup>Blozh ga, güeyaque bla zha bgui ne nacgrë no, gon zho nligaa guiendle xcuerp me ga.

<sup>25</sup>Dzigo rëbchaa me lo zho:

—¿Nadzpaan cow nac guic to, nadzpaan dip nac zdoo to! ¿Rliladzde to grë minë dzigo lëë bzeet zho padzeela ted Men ne nole diidz ga cxeel Dios? <sup>26</sup>Bzeetle zha co name ible no csacsi miech me, antes ne gbire me lo guieñdzon ne no me.

<sup>27</sup>Dzigo psilo me bnee me lo zho pa lo zhobnee grë minë bded me ga, psilo me desde grë minë pquiaa Moisés, haxta grë minë pquiaa grëraa zha ne biadteed xtiidz Dios. <sup>28</sup>Sca no zho nêz laa zho bdziñ Maús. Bdziñ zho ga, rac me zig nac zeene tib ted me, <sup>29</sup>dzigo quia zho rnab zho lo me cuëz me ga, sac laa dze bdezele, zhile laa liu ycow. Nacne blëz me.

<sup>30</sup>Laa zho zob lo mezh gowxtsee zho, bzhen me quietxtil bdeed me xquizh lo Dios, blozh beengrol mew bdeed mew lo zho. <sup>31</sup>Dzigoraa zig nac zeene bzhiäl lo zho, laa zho beenbey me. Per par nianraa zho me, znuse bnit me lo zho, gondraa zho me. <sup>32</sup>Hor co per nli rley zho rnee zho:

—Con razon zeene sca ziaadzga ne me nêz nonee me lo ne zha raquiet lo Xtiidz Dios, masaque tib guieñbley nroob ne biaadnie xcodiidz me zdoo ne.

Sca rnee zho, sac bien zho bdziñ tib guieibley nroob zdoos zho, zeene sca nonee me lo zho. <sup>33</sup>Lëëlädaque brieec zho ga, bio zho nëz wbire zho Jerusalén stib. Bdziñ zho lo gza tsiptib zha ne bzëniepaa me ga, ni grëraa zha ne nacgrë zho, <sup>34</sup>rëbchaa zha co lo zho:

—¡Tebaa gan to ganle nli brieecan xmaistr ne! ¡Laa Pedr gonle me!

<sup>35</sup>Psiloque zho grop zho bzodiidz zho zha gon zho me no zho nëz, per haxta horne no zho xtsee, zeene laa me beengrol guietxtil dzigoraa beenbey zho me.

### Brieecua Jesús lo grë xpëëdsuel me

(Mt. 28:16-20; Mr. 16:14-20; Jn. 20:19-23)

<sup>36</sup>Lëëtaque sca nozodiidz zho, tibaque zeen gon zho laa Jesús zole lo zho ga, pqiaabdiuzh me zho, rëb me lo zho, peet tsieniedraa guic zho. <sup>37</sup>Lele rdzieb zho, haxta rzhidz zho lo dzeb co, sac rëb zho bod ndziin ga ran zho. <sup>38</sup>Dzigo bnee me lo zho rëb me:

—¿Pe nacne rdzieb to? ¿Pe nacne riladzde to naa nu? <sup>39</sup>Golwi len nia naa, golwi zhits ni naa ganle. Golxeen naa, zeena gliladz to ganle nli naaw; sac tel ndziina, mese naca, gacd xen tow.

<sup>40</sup>Sca quianee me, blu me nia me, blu me ni me lo zho, zaatne biaaz me clav. <sup>41</sup>Per nli rley zho, rzee zdoos zho, per riladzdaque zho dien pe nliipaa lëe me ga. Gon me sca rac zho, nacne bnab me ncuaane gow me lo zho. <sup>42</sup>Dzigo bdeed zho tib lë mel bguiee lo me, <sup>43</sup>bnaz me mel co, squi ndxie zho gon zho dow me ma. <sup>44</sup>Dzigo rëb me lo zho:

—¿Pe ib rsoladzde to nile naa laa grë min rii no gac? Led ni naa lo to, grëse mine bzeet Moisés, grëse mine bzeet grë zha ne biadteed xtiidz Dios, mine raquietgaa lo Salm teed naa, ible laaw none gac.

<sup>45</sup>Psilo me clar nonee me lo zho, parne guienpaa zho zha zhobnee lo grë guits co, <sup>46</sup>rëb me:

—Ible lo co zhobnee sca teed naa ne nac naa Mgui ne pxeel Dios, rneew ib no gut miech naa, per zeene gac tson ngbidza, laa naa grieecan. <sup>47</sup>Rneew, Jerusalén nu, nu csilo gacnan miech ible none csaan zho xquieintseeb zho, gnalo zho naa, parne gon Dios zho perdon. <sup>48</sup>Ni to gon ganle, grëse min co goca. <sup>49</sup>Na len dze ne ziaadaque nu, laa naa cxel Espíritu Sant gacnieñ to, sac ib scale nac xtiidz Pxoos naa. Per guiabde to niinaga grieec to tsienec to lo miech, Jerusalénse nu golcuëz, haxta nieeda ygaa to poder ne gneedz Espíritu Sant lo to.

<sup>50</sup>Zeene gol dze ne laa me guey gbaa, dzigo güey me güeynie me zho nëz Betain. Bdziñ zho ga, blis me nia me, psilo me noyunlay me zho. <sup>51</sup>Laa me quiayunlay zho, tibaque zeene laa me bias lo guidzliu, jgonlo zho laa me bzoquia gbaa!

<sup>52</sup>Hor co pquiitsgzhib zho liu, beennon zho me, rnee zho grë diidz ndzon lo me; blozh ga ine rley zho laa zho wbi ga, bdziñ zho Jerusalén stib. <sup>53</sup>Psilo zho gzataa dze rie zho yadoo roolnie zho Dios, rdeed zho xquizh lo me.